






Ex Bibliotheca
majori Coll. Rom.
Societ. Jesu

29.5.22 22.5.8

22
4
70
22
4
62

13-2'D'H





DISCIPLINA MONASTICA

EXHORTATIONIBVS

Calag. R. DIGESTA *Jo. Jo. m.*

Cal. In Regulam primitiuam Fratrum Discalcea-
torum Ordinis Beatissimæ Virginis
Mariæ de Monte Carmelo. *Jo. m.*

Orth. Cal.

Per

R. P. F.

R. P. F. IOANNEM A IESV MARIA,
Carmelitam Discalceatum
Calaguritanum.



ROMÆ, Apud Iacobum Mascardum. MDCXV.

Superiorum Permissu.

1. MISCELLANEOUS

1. MISCELLANEOUS

1. MISCELLANEOUS

1. MISCELLANEOUS


1. MISCELLANEOUS

1. MISCELLANEOUS

1. MISCELLANEOUS

1. MISCELLANEOUS







ADMODVM R. P. N.

FR. FERDINANDO

A. S. M. A. R. I. A.

Carmelitarum Discalceatorum Congre-
gationis Sancti Eliæ Præpo-
sito Generali .

FRATER IOANNES SAL.



RCANAM Congrega-
tionis nostræ structuram ,
cùm per triennium præessem,
contemplatus, nonnulla con-
cepi, quæ per exhortationes in
regule textum digesta, omnibus quidem
perfectionis Monasticæ cupidis, sed Prælati
potissimùm, qui per hebdomadas singulas, in
patrum confessu ex more concionantur, pro-
desse possent. Hæc, uti dixi, concepta in Semi-
nario nostro Quirinali, quò valetudinis gra-
tia secessi, modicum otij nactus exaravi: ti-
bique, cui prælationis iure debentur, nuncu-

† 4 pare

pare consistui : Non flosculos respersi , non
ornatum varia eruditionis adiunxi , sed
quod (mea quidem sententia) validissimum
(christianarum concionum robur est , rationes
efficaces ad themata selecta pertractanda ,
contextere fludui , quibus animos ad nostram
Disciplinam retinendam , & perficiendam
fleeterem . Laborem ergo meum boni consule ,
ac si perspicaci visu tuo exploratum probes ,
qua nam ratione in lucem edi possit , pro sin-
gulari qua præstas , prudentia decerne . Cle-
mentissimus Deus te , ad navis nostræ cla-
uum , quem tenes , feliciter regendum , quod
impensè opto , incolumem seruet , ac inuictis
viribus armet .

z. h. nov. indictione ,
p.
p.
p.
p.
p.
p.
p.
p.
p.

F R. Ferdinandus à S. Maria, Præpositus
Generalis Carmelitarum Discalceato-
rum Congregationis S. Eliæ, concedi-
mus, vt liber hic de Disciplina Monasti-
ca, à R. P. F. Ioanne compositus, typis
mandetur, si placuerit Reuerendissimo D.
Vicesgerenti, & Reuerendissimo Patri Ma-
gistro Sacri Palatij. Datum Romæ 26.
Septembr. 1614.

Fr. Ferdinandus à S. Maria Præpositus Gen.

*Imprimatur, Si videbitur Reuerendiss. Patri
Magistro Sacri Palatij Apostolici.*

Cæsar Fidelis Vicesgerens.

EX commissione Reuerendissimi Patris Fratris Hyacinthi Petronij Romani Sac. Pal. Apost. Mag. vidi ac diligenter perlegi librum R. P. Fr. Ioannis à Iesu Maria Carmelitæ Disceatæ, cui titulus est de Disciplina Monastica, & nihil inueni quod Catholicæ Fidei, vel bonis moribus aduerfetur, immo etiam censeo huiusmodi opus ad communem religiosorum vtilitatem, typis omnino dignum, in quorum fidem his manu propria subscripsi.
Datum Romæ die 6. Nouembris 1614.

**Fr. Vincencius Cindius Sac. Theol. Magister &
Conuentus S. Mariæ super Mineruam Almæ
Vrbis Prior.**

Imprimatur,

Fr. Gregorius Donatus Romanus Lector, & Reuerendissimi P. Fr. Hyacinthi Petronij Romani Sac. Palat. Apost. Magistri Socius.

I N D E X

P A R S P R I M A

DE PROLEGOMENIS.



Ramonitio. Cap. 1. pag. 1

Exhortatio ad Regula existimationem & custodiam.

Cap. 2. 1

Exhortatio ad regula scopam agnoscendum, & petendum. Cap. 3.

Observatio. Cap. 4. 18

P A R S

I N D E X.

P A R S S E C V N D A.

De Disciplina monastica erga textum regulæ.

T Itulus, & textus primus .	19
Observatio thematum, quæ à titulo, & primo textu duci possunt, ad exhortationes solitas .	20
Exhortatio de primitivi status perfectione, ad quam aspirandum est . Cap. 1.	20
Exhortatio de Beatissima Virginis titulo, ac tutela . Cap. 2.	26
Exhortatio ad solitudinis amorem à primo textu regulæ petita . Cap. 3.	32
Exhortatio de institutarum monasticorum varietate, & instituti proprii usu . Cap. 4.	38
Textus secundus .	44
Observatio thematum .	45
Exhortatio ad obedientia votum explendum . Cap. 5.	45
Exhortatio ad votum castitatis explendum . Cap. 6.	53
Exhortatio ad votum paupertatis explendum . Cap. 7.	60
Textus tertius .	65
2 R A 4	Ob-



LECTORI.



SELECTA Disciplinae Monasticae capita, quae Monachis exemptum à mundi seruitute vitae genus ducentibus, cordi esse debent, per exhortationes multiplices, vario themate è textu regulae nostrae petito, digesti. Methodus haec est, ut habito thematis delectu, verbis aliquot exordij loco praemissis, mox rationes, quoad fieri potest, efficaces, quibus intellectus illustretur, & voluntas impellatur, ad propositum hortandum, dehortandumve subtexam. Denique insto, ut tradita doctrina ad praxim deriuetur, ac in hunc modum singulas exhortationes absoluo. Ego concionum membra compegi: ijs autem, qui labore hoc uti volent, non erit difficile, aliqua Scripturae sacrae effata, sanctorum sententias, similitudinem, aut exemplum aliquod intertexere, si orationem exornare, &

simplificare placuerit, quod aduersa mea va-
lerendo non tulit. Precor Clementissimum
Deum, afflet spiritu suo lectores omnes, sed
Prælatos præsertim conciones habituros. Si
enim spiritus flauerit, doctrina solida neruo-
sis rationibus fulta subnixa pectora (credo
equidem) dura mulcebunt.



I N D E X.

Exhortatio de causa iusta ieiunium omittendi.

Cap. 26. 159

Textus duodecimus. 164

Obseruatio thematum. 164

Exhortatio de exercitio mendicandi. Cap.

27. 165

Exhortatio de bono exemplo extra domos no-

stras prabendo. Cap. 28. 169

Textus decimustertius. 173

Obseruatio thematum. 174

Exhortatio de bono, quod in tentationibus pa-

ratur. Cap. 29. 175

Exhortatio de studio virtutum. Cap. 30.

pag. 179

Exhortatio de familiari usu verbi Dei. Cap.

31. 183

Exhortatio de otio vitando. Cap. 32. 187

Textus decimusquartus. 191

Obseruatio thematum. 192

Exhortatio de obseruatione silentij. Cap. 33.

pag. 192

Exhortatio de lingue lapsibus. Cap. 34.

pag. 196

Textus decimusquintus. 200

Obseruatio thematum. 201

Exhortatio de humilitatis cultu. Cap. 35.

pag. 201

Ex-

INDEX.

<i>Exhortatio de actibus ad humilitatem parandam opportunis. Cap. 36.</i>	205
<i>Textus decimus sextus.</i>	210
<i>Obseruatio thematum.</i>	210
<i>Exhortatio de honore Prelatis deferendo. Cap. 37.</i>	218
<i>Exhortatio de supererogationis operibus. Cap. 38.</i>	216



PARS

I N D E X.

<i>Obſervatio thematum .</i>	65
<i>Exhortatio de bono cœnobiorum , qua ad no-</i> <i>ſtram diſciplinam apta , & commoda ex-</i> <i>truuntur . Cap.8.</i>	66
<i>Exhortatio de varietate cœnobiorum , in qua</i> <i>monachi diſtribuuntur . Cap.9.</i>	72
<i>Textus quartus .</i>	77
<i>Obſervatio thematum .</i>	78
<i>Exhortatio de bono cella ſeparata . Cap. 10.</i> <i>pag.</i>	78
<i>Exhortatio de ratione cella inſtruenda . Cap.</i> <i>11.</i>	83
<i>Textus quintus .</i>	88
<i>Obſervatio thematum .</i>	88
<i>Exhortatio de diſciplina in conaculo , ſeu refe-</i> <i>ſtorio obſervanda . Cap. 12.</i>	89
<i>Exhortatio de cura rerum Priori creditarum</i> <i>non uſurpanda . Cap.13.</i>	95
<i>Exhortatio de perpetuo orationis ſtudio . Cap.</i> <i>14.</i>	99
<i>Textus ſextus .</i>	105
<i>Obſervatio thematum .</i>	106
<i>Exhortatio de horarum canonicarum dignitate,</i> <i>& fruſtu . Cap.15.</i>	106
<i>Exhortatio de modo officium divinum perſol-</i> <i>uendi . Cap.16.</i>	110
<i>Textus ſeptimus .</i>	115
Ob-	

I N D E X.

<i>Observatio thematum.</i>	115
<i>Exhortatio de bono vita communis. Cap. 17.</i>	
pag.	115
<i>Exhortatio de recurſu ad Priorem pro rebus neceſſarijs. Cap. 18.</i>	121
<i>Textus octauus.</i>	125
<i>Observatio thematum.</i>	126
<i>Exhortatio de diuina erga nos in infimis quoque rebus providentia. Cap. 19.</i>	126
<i>Exhortatio de modesto uſu animalium ad uetituram. Cap. 20.</i>	131
<i>Textus nonus.</i>	134
<i>Observatio thematum.</i>	134
<i>Exhortatio de legitima miſſa celebratione, & ministrantium officio. Cap. 21.</i>	135
<i>Exhortatio de modo ſacrum celebrandi, & audiendi, ad eius fructum percipiendum. Cap. 22.</i>	139
<i>Textus decimus.</i>	144
<i>Observatio thematum.</i>	144
<i>Exhortatio de diſciplina in patrum conſeſſu, ſiue capitulo obseruanda. Cap. 23.</i>	145
<i>Exhortatio de correptione humiliter ferenda. Cap. 24.</i>	150
<i>Textus undecimus.</i>	155
<i>Observatio thematum.</i>	155
<i>Exhortatio de bono ieiunij. Cap. 25.</i>	155

Ex-

PARS PRIMA. DE PROLEGOMENIS.

Præmonitio . Cap. I.



PRÆMONITIO, qui in cœtu monachorum, è regulæ textu in partes digesto, vt mos est, doctrinam moralem elicere constituit, rectè ager, si prolegomena nonnulla præmittat, quibus animos ad tantæ

rei æstimationem excitet. Duo verò imprimis capita duabus exhortationibus expendet iuxta exempla subiecta, quæ non ad quippiam præscribendum, sed ad indicandum rerum pondus, & ad extimulanda ingenia Prælatorum, vt meliora ipsi excogitent, proponere, ac persequi decebit.

Exhortatio ad regulæ æstimationem, & custodiam . Cap. I I.

COGITANTI mihi de dignitate regulæ, in cuius textum aliquid promere constitui, subit imago quædam Christi stateram dextra tenentis, operaq. nostra, iuxta syncerum regulæ, quam profitemur, sensum trutinantis, quæ quidem imago regulæ ipsius, vt rei planè grandis æstimationem ingenerat. Re ergò altè perpensa, multæ succurrunt rationes, quæ ad regulam plurimi faciendam, animoq. altè imprimendam satis appositæ,

& veris monachis omninò suggerendæ videntur.

Ratio prima . Ipsum nimis vulgatum , vix tamèn, vt par esset, expensum regulæ nomen rei significatæ dignitatem aperte prodit. Si enim nqr ma architecti , qua regiz aulæ partes diriguntur, tanti sit, vt quicquid contra , vel præter illam extruicur, eo ipso tanquam ineptum , ac deforme à bonis censoribus improbetur, totusq. fabricæ decor in ipsam referatur ; quid de regula morum , extra quam quicquid eius professores attentent , obliquum est, & cui Domus Dei decor ascribitur, sentiamus ? Res profectò excelsa, & pulchra est, quæ viuos lapides in Dei templum consentientes, proportionem mira coaptat, & honestat .

Ratio secunda . Status proprii æstimatio, nemini nisi deliro fortasse alicui , potest non cordi esse. Porro status cuiq. suus, non temerè sed iusta præmeditatione tādē electus, bonum quoddam honestum videatur oportet, non enim pictor, aut sculptor seligit id vitæ genus, quod ei dedecori vertatur, imò id præsertim arripit, quod honorificum, & lucri ferax existimat. Cum ergo monachus discalceatus, consultatione præuia , genus vitæ quoddam, regulæ à sublimitate, & exacta perfectione commendatæ addicū optauerit, necesse est, vt permagni faciat, quod ei coram Deo Angelis, & hominibus dignitatem tantam, honoremq. conciliat . Sanè ipse regulæ primitiæ titulus tam speciosus , & virorum sapientum præconijs exornatus est , vt rebus quoque humano more perpenfis , cordatus quisq. monachus eum vniuersis mūdi honoribus anteferre debeat. Quo
qui-

quidè ex capite, quodammodo cogitur, ne villo actu parum decore, qui sapientibus viris displiceat, se tanta regulæ degenerè professorem exhibeat. Verùm graviora meditemur.

Ratio tertia. Quot sententiæ in regula proferruntur, tot sunt prudentissima consilia, ad vitam apostolico more instituendam, quod per se quidem notum, & communi sermone celebratum est. Si ergo ad insistendum vestigijs apostolicis, mundo nos renunciassè fatemur; quomodo regulam nostram, velut apostolicam doctrinam, ac proinde ut rem pretiosissimam nō æstimemus? Profectò, quam despicabilia sunt mundi consilia, quibus vita humana vitiatur, tam sunt pretiosa illa, quibus expurgatur, & cælesti puritate perficitur. Norunt hoc veri mundi contemptores, qui disciplinæ monasticæ laude olim claruerunt, quos pauci aliquot, ætate nostra, in regulæ custodia equare conati sunt.

Ratio quarta. Aliùs caput efferamus, observemusq. singulas regulæ præscriptiones totidem Divinæ ipsius Maiestatis oracula esse, ut ex origine spectetur regulæ dignitas, & maiestas. Mihi certè perspectū est, vos de re hac interrogatos cōfessione multa responsuros, capita regulæ, effata esse Dei per regulæ ipsius conditorē, & Summum Pontificem confirmatorem loquentis, humanæq. sapientiæ longè procūldubio antecellere, & qui aliter censeret, inter instituti sui desertores reponi debere. Si ergo regulæ capita oracula cælestia sunt, quomodo cum modica eorum æstimatione professio nostra cohzreat? aut quomodo non

plurimus honor à Carmelita Discalceato ei deferatur ?

Ratio quinta . Rationes allatæ quantumvis nervosæ lentum forte aliquem parum vrgebunt , quod virtutis honestatem , ac Dei ipsius magnitudinem tenuiter agnoscat . Optandum certè , ut in præsentì cœtu nemo eiusmodi cæcitate laboret . At si quis adsit , consideret saltem , quod sub alia metaphora initio indicauimus , regulā hanc lineam quandam esse, ~~qua~~ Christus æquissimus iudex , & internorum affectuum cognitor mensurus est vitam , quā ducimus regulæ ipsi à nobis sponte alligatam . Meditetur quā debeat æstimari linea hæc , ad quam , si cœnobitica disciplina exigatur , in vniuersi mundi theatro monachus à Christo ipso laudandus , & inter inuictos milites recensendus , vel à contrario , æterno anathemate , à consortio sanctorum arcendus est .

Obfer-
uatio. Hactenus produximus rationes , quibus intellectus ad regulæ æstimationem instruitur , & voluntas incipit emolliri . Nunc voluntas ad praxim acrius vrgenda est , iuxta prudentem bonorum concionatorum vsum , qui in postrema concionum parte , affectum potissimum excitare , ac inflammare nituntur : qua certè methodo in alijs omnibus exhortationibus vtemur .

Audistis , Patres , contextum rationum , quibus euincitur , regulam nostram , non rem aliquam , vulgarem , sed egregiam , eximiam , ac planè cælestem esse , eiq. venerationem plurimam deberi . Quid ergo vobis modò videretur , si è medio confesso hoc , aliquis disciplinæ regularis impatiens

exur-

exurgeret, diceretq. non vsque adeò extolli debere regulæ dignitatem, nolletq. se illam tam religiose colere. Conspiraretis, credo equidem, in sententiam hanc, monachum scilicet eiusmodi, societate vestra omninò indignum esse, neque iudicio sanè pollere. Qui enim rem honestissimam diuino splendore lucentem minimè, aut tepidè amandam, & laudandam existimat, in dementiam aliquam incidisse videtur.

Nunc ergo vos introspicite ipsos, & exploret conscientiam vnusquisq. suam, an regulam nostram, quam cordis centro deberet insculpere, tanti pendat, ac decet. An eam sæpe, & cunctantè relegat. An selectæ illæ sententiæ breuitate, multa perstrictæ videantur ei oracula cælestia. An verba syncerè interpretetur, timeatq. ad extraneos sensus detorquere. An pro cuiusq. capitis obseruatione vellet, si oporteret, occumbere. Si enim hisce caret argumentis, iniquus æstimator est: nec sanè conscientia propria ei zelum suggeret adeò feruidum, vt delirum monachū illum, qui in medio cœtu hoc, regulam (vri posuimus) vilipenderet, sine remorsu vehementèr carpere, vel damnare queat. Si enim se nō corripit ipsum, quare illum redarguit? Respondebit fortassè, non esse parem vtriusq. culpam, seque non esse adeò impudentem, vt regulam non magni faciendam clamitet. Verùm quid si non clamitet ipse, quandoquidè ipsius opera vociferantur? Confitetur quidem se nosse Deū, cui regulæ obseruationem promisit, factis autem negat, dū lentescit, & à sensu sacrarū præscriptionum longè recedit.

Ceterum bene est, quod è presentibus nemo reperitur, qui regulam aspernari, vel lentè obseruare velit, quod Diuinæ bonitati, planè tribuendum est, quæ in vos pluuiam bonorum affectuum effundit. At quò effusio vberior est, eò timendum magis, ne quis non ità feliciter progrediatur, vt parem diuino semini fructū referat. Quamobrem hortor vos, Patres, vt quod ad conscientiam spectat, regulæ nostræ textum ità legatis, vt animò totus integer ac incorruptus hæreat, ità interpretemini, vt germanum sensum sine vlla detortione tueamini, ità recolatis, vt memoria nunquam excidat.

Quod verò ad alios exemplo instruendos attinet, ità veneremini, ità obseruetis, vt alij qui vobiscum commorantur, facilè animaduertant, regulam nostram vobis librum esse vitæ, quem indignè tractare, quoddam sacrilegij genus videatur. Hoc si præstetis, testis quisq. minimè stupidus facile iudicabit, regulam à vobis, vti decet, æstimari, quo ipse stimulo ad piam æmulationem excitabitur.

Hic verò non credendum, rem hanc, quam exigo, nimis arduam vobis, qui æternæ vitæ studio incensi estis, vllò pacto videri. Cur enim ardua videatur? Si Athenienses Solonis, & Lacedæmonij Lycurgi leges tam cupidè amplexi sunt, tam inuiolatè obseruarunt, sola rei honestate, naturali lumine ostensa conuicti; quid vos in hoc genere præstare fas sit, qui leges nostras regulæ testis latas, non vt ethnici alicuius legislatoris inuenta, sed vt diuinæ Sapientiæ oracula intuemini?

An

An Atheniensibus, vel Lacedæmonijs profuit illa tam exacta suarum legum æstimatio ad cæleste regnum perquirendum? Potuit ne labor ille custodię legum impensus auctores suos ab interitu præservare? Minimè quidem? Si ergo leges illæ steriles tantoperè æstimatæ, & observatæ sunt, quanto sit æquius, ut leges nostræ, quibus ad æternam felicitatē via sternitur, à vobis magni fiant, & fidissima custodia vigeant? Profectò monachi nomen indignè vsurpat, qui ubi de regulæ apicibus agitur, illorum quemq. non tenacissimè retinet, & velut sacri cuiusdam textus notam, seu litteram vnam expūgere, locūq. movere formidat.

Hæc fuit maiorum nostrorum laus, quos non tam litteratura, sacrarum concionum fama, principum gratia, quàm fida legum observatio fecit insignes: quibus ab ipso monasticæ disciplinæ tyrocinio penitus impressum fuit, ut legum nostrarum æstimationem, atque custodiam ut amplum patrimonium acciperent, & ad posteros, perruptis omnium mundi aduersitatum repagulis, non integrum modo, sed cumulatam quoque transmitterent. Hi fuerent parentes nostri, quos qui non strenuè imitatur, genus negat, fidem monasticam abiurat.

Immortales Deo gratias ago, quòd hæredes legitimi tanti patrimonij nonnullos habemus leonibus fortiores. Quos ego ubi tacitus commemo, tanti facio, ut eos Congregationis nostræ firmamenta vocem, Cur autem non vocem? Cur non prædicem? Debentur sanè illis celiberrima præconia, multa q. in re optimo rependitur gratitudo,

tudo. Quid non debuit Hebræorū Populus Eleazaro viro inuictissimo, idoneoq. legum sanctarum æstimatori? Datur ei optio, vt simulet se Antiocho esum porcinæ carnis lege vetitæ imperanti obedire allatis carnibus alijs, quibus ei iuxta leges patrias vesci licebat. Contemplamini virum ætate prouectum, vultu decorum, & sapientia diuitem. Ei defertur electio, vt legis transgressionem fingat, & viuat honoribus auctus, vel, si id nolit, intereat. Quid respondet constans legum æstimator, & custos? Respondet citò, præmitti se male in infernum, & à carnificibus arreptus honesta morte perfungitur. Hæc legum æstimatio est. Huic planè fortissimo viro similes appello selectos illos, qui Congregationem nostram regulæ æstimatione cōdecorant. Vnus profectò ex hoc lectissimo numero multis cōcionatoribus, librorum scriptoribus, & id genus alijs æquo iudicio antefertur. Illi quippè grandia effantur, ac scriptitant, hic verò grandia patrat, quæ scriptione, & pro concione laudari possint. Discrimen verborum, & operum expendite, & rectum ferte iudicium, omnia lustrate: iudicium expecto. Quid iudicatis? At quorsum vobis iudicium defero, quod Christo supremo iudici à Patre delatum est? Non ego vos pressè nunc iudices, sed velut testes accerso, testiumq. iudicium exposco. Testificamini, quod à Christo probatum, & in supremo iudicio laudandum, remunerandumq. censetis. Intuemini bonos regulæ estimatores ijs oculis, quibus Christus eos intuetur. Intuemini ac æmulamini. Date animas vestras pro
testa-

testamento patrum nostrorum, & B. Virginis, Fundatricisq. nostræ Teresiæ disciplinæ, quam instaurata primitiua regulæ obseruatione condidit, tota animi contentione, spe cumulata mercedis erecti congruite.

Exhortatio ad regulæ scopum dignoscendum, & petendum. Cap. III.

PRudens quisq. cuiusuis disciplinæ professor instituti proprii finem prænosse curat, vt laborem in scopum certum dirigere, & quæ fini dissimilanea sunt, reijcere valeat. Qua quidem in re, quæ pondus habet immensum, dolendum est, Patres, quam grauiter tû ab alijs, tû à plerisq. monasticæ disciplinæ professoribus erretur. Multi quippè, qui curiosa sectantur, nihil nō cognoscere satagunt, astrologiæ, architecturæ, artis poeticæ libros euoluunt, vt variâ ad conciones, vel priuata colloquia syluam conferant; qui tamen de instituto proprio, sineq. ad quem se tendere profitentur, rogati vix quicquam exploratum se habere demonstrant, quod planè mirû est. Quid enim admiratione, & reprehensione dignius, quàm viatorê, qui iam iter inchoauit, nescire quò tendat? Profectò ignoratio hæc tam est rudis, & hominis ingenio dissona, vt cum ratione naturali, & vniuersorum philosophorum moralium sententia pugnet. Ii enim summa consensione tradiderunt, finem esse actuum moralium principium, hoc est, omnem actum deliberatum finis alicuius gratia ita produci, vt primum, quod ab homine concipitur,

pitur, finis ipse sit, in quem omne studiū, laborq. omnis appositè fertur. Quæ quidem doctrina, quamvis à nemine traderetur, tam est per se perspicua, ut in dubium reuocari nequeat. Nullus enim nauta, agricola, mercator, navigationē, sationem, mercimonium attentat, nisi prius finem aliquem honoris, lucri, aut voluptatis sibi præfigat. Cum ergo regulæ nostræ labor in finem seu scopum certum dirigatur, non absque culpa, & stupiditate à vobis ignorari, aut parùm oculatè considerari posset. Exploremus igitur finem, hunc, ut in eum studia nostra collimemus.

Statuo, vos ex maiorum nostrorum doctrina, & varia lectione nosse, instituti nostri finē duplicem esse, alterum potiore, qui est contemplatio, alterum minus principalem, qui est actio, ita ut vita quā ducimus ex duplici parte mixta, & contexta sit, inæquali tamē pondere, cum in contemplationem diutius, & sollicitius quàm in actionem incumbat. Hoc ergo statuo, cum in ipso constitutionum prologo satis expressum sit, & tam sæpè legatur, Neque fert animus de fine minus principali verba facere, & an ordini nostro cozuus, vel posterius annexus fuerit, hoc loco differere. Impendam ergo tempus. hoc modicū potiori fini pensitando, eiusq. dignitatē demonstrare conabor.

Et primū sanè, quòd contemplatio finis nobis potior sit, ex toto regulæ contextu palàm deducitur, cum ibi quicquid ferè præcipitur, ad recessum, orationem, silentium, solitudinemq. pertineat: quæ quidem capita, aperta vitæ contemplatiuæ signa sunt, quæ viris, qui seculi iugum ex-

cus-

cusserunt, & in solius Dei amplexus aspirant, mirificè congruunt. Quod certè argumentum è regulæ textu spontè natum, cùm ad principalis scopi, seu finis nostri demonstrationem, & confirmationem validissimum sit, argumenta alia conglobare, & rei luculentæ lumen afferre superuacaneum existimo. Nostis quid contemplatio sit, actus videlicet intellectus in æterna spectacula, intenti, & admiratione suspensi. Huc ergo aspirandum vobis est, per fidissimā regulæ custodiam, ut licet in terris mortali corpore prægauati moreremini, spiritus, velut pennis euectus, in cœlis versetur, & subtili æternorum bonorum contemplatione, ac pura voluptate inde orta delectetur, quod subiectis rationibus breui suadebo.

Ratio prima. Contemplationis studium adeo per se honorificum est, ut quamuis nullo quis vinculo astringeretur, deberet sponte illud arripere, eique impensè vacare. Quid enim honorificentius, quàm Diuinæ Maiestati assistere, cū rerum omnium conditore verba facere, summo, ac sempiterno bono arcè adherere? Porro inter homines nihil solet à mundi sectatoribus auidius expecti, quàm principū obsequijs proximè destinari, coram eis detecto capite versari, ab eorum conspectu nunquàm recedere, ut satis ex moribus palatinis, & ambitione palam grassante perspicitur. Quod si hæc tanquam nimis humana segnitèr moueant, attollite mentis oculos in Dei ciuitatem, in supernam Ierusalem, cuius dispositione hierarchica, & pulcherrima partium concinnitate late mini. Ascendite ab infimo primæ ad summum ter

tia hierarchia angelica ordinem, ibique spiritus seraphicos, in quodam velut Angelorum vertice consistētes, & Diuinæ Maiestati proximè assistentes animo concipite. Inferiores certè spiritus mundi administrationi, hominumq. custodiae destinantur: at Seraphim tanquàm nobilissimi principes in aula regis æterni quiescunt, & sublimissimæ contēplationi diuinitatis intenti ad functiones alias obeundas minime recedunt. Hæc dignitas seraphica est, cui statum planè similem sortiti estis, dum toto regulæ tenore ad contemplationis scopum petendum destinamini. Huc fertur recessus, silentiū, Dei præsentia, & exercitiā nostra à seculi strepitu exempta, quæ profectò cælestibus exercitijs, & nobilitate, & suauitate similia sunt. Quis ergo potioris partis nostræ dignitatem non expetat?

Ratio secunda, quæ potioris partis nostræ dignitatem cum vtilitate connectit, vt ex eo etiam capite optanda, & exercenda sit. Nimirum rebus theologicè perpensis, vtiliora sunt exercitiā contemplatiuæ partis, quàm actiuæ, auctioris videlicet meriti, cum in ijs amor diuinus, qui meriti mensura est, felicius crescat, & vires acquirat. Si ergo lucrum illud, cuius vel minima pars vniuersis mundi opibus antefertur, vobis placet; si æternis diuitijs affluere cupitis; conatus omnes in scopum vestri instituti constantè intendite, & verba illa euangelica, *Negotiamini dùm venio, mercaturæ vestræ prudenti sensu adaptate.*

Ratio tertia. Si non vtilitatem tantum, sed voluptatem captatis, quid tam in hac vita voluptuo-

ptuosum, quàm contemplationis studium castæ
lætitiæ feracissimum? An ignoratis vel vnum ho-
ræ quadrantem, vbi lætitiæ illa percipitur, omni-
bus seculi voluptatibus per annos multos affluē-
ter succedentibus esse optabiliorem? Nolo testes
alios accersere, quàm vos ipsos, si tamen gusta-
stis, quàm suavis sit Dominus. Non dissero nunc
de torrente voluptatis, quo potantur, qui ad
vitæ fontem limpidissimū post vitæ huius agones
peruenerunt, qui satiantur vbertate Domus Dei:
quis enim possit Oceanum illum mente concipe-
re, nisi qui iam sese pelago immerfit ipsi? Loquor
ergo de rore solo, vel de stillicidijs, quæ arentes
viatorum linguas humectant. Ij, siqua fides pijs,
& veracibus habenda est, facile assueverant, gut-
tam vnā mundi fluminibus pretiosiores esse,
seq. donèc gustarunt, nescisse, in hoc exilio, tam
subtilem, puram, penitissimèq. illabentem suavi-
tatem à mortalibus vnquàm delibari. Quid ergo
quæritis? Cui sortem invidetis? An sors vestra
felix non videatur? At excipiet tepidus aliquis,
contemplationis voluptatem esse profectò diui-
nam, verum paucis contingere? Sed exceptio
infirmā est: licet enim intima quædam, & puris-
sima gaudia, quæ viris prouectissimis familiaria
sunt, alijs minùs prouectis non itā permittantur,
certum autem est, voluptatem illam, quæ tyro-
nibus, contemplationis studio deditis instillatur,
ipsorum testimonio, eam esse, cum qua nihil in
hac mortalitate quantumuis delectabile confer-
ri possit. Compertum item est, tyronum volu-
ptatem satis esse crebram, ita vt veterani diui-

nam in hoc genere liberalitatem demirentur. Quid, quòd licèt bonum tantum semel duntaxat in hac vita laborantibus impenderetur, deberet adhuc, ob nobilitatem, & spem, quam ingenerat, regum delicijs discrimine lato præferri?

Ratio quarta, quæ validissima videtur. Fin- gamus, vos nondum instituti nostri disciplinæ col- lum subdidisse, & hac ipsa hora, qua loquor, con- sultare de statu deligendo, optareq. vehemen- ter, ut fors felicissima obtingat. Rogo nunc vos; adeste animis, & rem penitus capite. An felix vo- bis non videatur fors, quæ ipsi æternæ felicitati velut contigua est? Profectò felix omnino vide- bitur. Quæro nunc, suprema, & sempiterna fe- licitas, quam in re consistat? Respondebitur in aperta Dei visione, ac fruitione consistere. Rectè quidem, ac theologicè responsum est. Vtteriùs tamen sciscitor, an sit in hoc exilio status aliquis, qui ad eam ultimam, perfectamq. beatitudinem propè accedat, & modo tandem aliquo initium, siue inchoatio felicitatis appellari queat. Respon- debitur proculdubio, si quid in hac mortali vita eo nomine insigniri debeat, esse illud bonum, quod inter omnia felicitati ultimæ simillimū est, ac proindè ad eam propiùs, quàm bona alia, demùm accedit; quemadmodum si ultima ho- minis beatitudo in summo pontificatu locata es- set, quædam eius inchoatio, & quasi penulti- ma felicitas ad statum Cardinalium referretur. Cum ergo ultima beatitudo nostra in Dei visio- ne, fruitioneq. ponatur; & aliundè constet, vi- tam contemplationi additam, ex nobilissima

Dei

Dei notitia, & inde enata voluptate componi; quis adeò cæcus, & proteruus sit, qui potio- rem instituti nostri partem contemplationi consecra- tam, in loco sanè dignissimo non constituat, quoddamq. summæ felicitatis initium, siue in- choationem non appellet, eiusq. studio se cupi- diffimè dedat?

Non dubium, Patres, quin ex allatis rationibus, iudicetis, quàm graui pondere beneficij diuinitus accepti onerati sitis, ex quo Deus quasi suæ pa- tritios ciuitatis ad nobilissimas contemplatiuæ vitæ functiones vos gratis euocauit, innumeris alijs, velut ad plebeia ministeria reiectis. Non dubium, quin rei honestas fructus, & suauitas animos vestros verarum virtutû cupidos inflam- ment. Quid ergo cogitatis? Quid mente reuo- luitis? Expendite modò, quàm libentèr, ac ex- pedite baiuli, siue onerum gestatores, qui panem improbo, ac nimium duro labore lucrantur, one- ra excuterent, si à principe aliquo vocarentur re- pentè, vt ante ipsius cubiculum ingenuam con- ditionem nacti, inter primores versarentur. Vix illi latitiæ vim ferre possent, vix crederent, quæ experirentur. Quomodò ergo credi possit, in præsentī confesso inueniri aliquem, qui principa- lem vitæ nostræ scopum non accurate petat. Quo- modò verosimile censeatur, malle aliquem ple- beiam, quàm ingenuam sortem optare? Quo- modò credatur Carmelitam Discalceatum pro- positi sui obliuisci, & ordine præpostero actiuam vitam contemplatiuæ præponere, vel æquare? Porro minimè id credendum, cùm indecorum, ac planè

planè absurdum sit . Recolite , precor, B. Tereſiæ Fundatricis noſtrę ſtudio in hoc genere mirum, & ad vrgendos quoq. deſides efficaciffimum. Latuit illa , quoad potuit contemplationi dedita ; verùm vbi ad immenſam Dei gloriam è clauſtro exire oportuit, adeò exactè contemplationis ſtudio retinuit, vt (quod raro legatur) in medijs itineribus, vbi ſtatę orationis horę accedebant, ſilentiũ imperaret , aut etiã à ſecularibus rei tantę ignaris pretio impetraret , vt in curribus ipſis , cum ſacris Virginibus , quę ſimul vehabantur , præſtituto tempore orationi vacaret , non ſecus ac ſi in monaſterio deliteſceret . Quid vobis de exemplo tanto videtur ? Num eiufmodi mos retineri potuit , ſtrepitu ſecularium intercepto ? Num animus moris tenax eſſe potuit , niſi principalis inſtituti finis altè impreſſus ex antea præmeditatione, ac digna eſtimatione fuiſſet ? Minimè quidem. Quid ergo diceretis, ſiquis degener B. Tereſiæ filius in oratorio percommodo, & contemplationi ſacrato præſtare detrectaret, quod illa in curribus conductis, & incommodis tot victis difficultatibus præſtitit ? Hiccinẽ ſit monachus , hoc eſt, monadi intentus ? Simus ne adeò hebetes, vt de huiufmodi homine, propoſiti finis deſertore bene opinemur ?

Luſtrate, precor, mentis oculis cœnobია in quibus morati eſtis, & proferte mihi ſaltem vnum in Congregatione noſtra laudatum, qui de fine principali inſtituti noſtri exquirendo , lentè egerit . Nullum credo equidem, proferetis . Si qui enim ex hoc capite malè audiunt, velut in fronte ipſa

æquo Dei iudicio gestant modicæ existimationis inscriptum. Hoc nempe Dei iudicium est, ut in cœtu Sanctorum cōmuni suffragio explodantur, qui partes instituti, quodificentur, explere nolunt, in eo præsertim capite, quod maximè decorum, & status monastici proprium est. Valeant hominum gratia, egregiè concionentur, miracula, si possint, patrent, non tamèn à bonis censoribus veri monachi existimabuntur, quandiù potiorem instituti finem pigrè quæsierint.

Doctrinis ergo peregrinis, patres, nolite abduci. Quicquid à vobis splendidum præstari potest, à principali sine deriuetur, necesse est, ut quæ sublimia, salutariaq. contemplati estis, cum proximis, ubi id prælatus iniunxerit, communicetis, ut potissima cura salutis, ac perfectioni propriæ impendatur, & cum occasio proximis iuvandi inciderit, ità eam functionem piam obeatis, ut cura prior, & potior nullum patiatur detrimentum.

Iam ergo quid superest? Rogabo, an instituti desertores, vel fidi custodes esse velitis? Certum omninò est (ut mihi persuasi) velle vos, quod ex tot capitibus honestum, Deo, & hominibus acceptum est, iugi intentione moliri. Strenuè certandum, corporiq. spiritum deprimenti imperādum est. Contemplatio rerum diuinarum is scopus est, qui sanguine quoque fuso peti debeat. Quid obstat? Erigite corda, quæ in cælum perennitèr suspiratura statum monasticū elegerunt. Bono animo estote; cōstituti enim estis super excelsam terram (ut olim populus Israel) ut fugatis mel de petra, oleumq. de saxo durissimo. Austeritas quippè durior.

Deut.
31.

Deut.
31.

durioris disciplinæ oleo internæ lætitiæ, & melle dulcoris intimi in contemplatione prouenientis imbuitur. Oculos in cælum tollite. Terra enim, ad quam possidendam ingressi estis (ut olim hebraico populo dixit Moyses) non est sicut terra Aegypti, ubi iacto semine in hortorum morem, aquæ ducuntur irriguæ: Sed montuosa est & campestris de cælo expectans pluuias, quæ sacri textus verba ad rem nostrâ appositisima sunt, Debuit electus populus, quos in Aegypto didicerat, mores dediscere, neque mentem humi defixam, aquæ Nili fidantem gerere: sed ascensu difficili in montes Palestinæ contendere, ubi vel ipsa aquæ penuria coactus Deum largitorem, oculis in cælum sublatis, precareretur. Hæc sors vestra est. Cælum suspicite, maiestatis Diuinæ præsentiam mente versate, regnumq. Dei studio contemplationis constanti perquirite.

Observatio. Cap. IV.

Inueniant alijs varia prolegomena, quæ textus expositioni prætexant. Nos pauca, grauiaq. selegimus, quæ exempli causa deprompsimus: neque credimus, tam esse utilia alia, quæ excogitari hoc loco possent, quàm quæ e textu enascuntur ipso. Nunc ad textum eo ordine, diuisioneq. capitum, quæ vti mos est, accedamus.

PARS SECVNDA.

DE DISCIPLINA MONASTICA

ERGA TEXTVM REGVLAE.

TITVLVS.

Regula primitiua Ord. Beatiss. V. M. de monte Carmelo à B. Alberto Patriarcha Ierosolymitano tradita, & ab Innocentio I. V. confirmata.

TEXTVS PRIMVS.

ALBERTVS Dei gratia Ierosolymitana Ecclesia vocatus Patriarcha, dilectis filijs Brocardo, & ceteris fratribus Eremitis, qui sub eius obedientia, iuxta fontem Elia, in monte Carmeli morantur, in Domino salutem, & Sancti spiritus benedictionem. Multifarie, multisq. modis Sancti Patres instituerunt, qualiter quisq. in quocunque ordine fuerit, vel quemcunque modum religiosae vitae elegerit, in obsequio Iesu Christi viuere debeat, & eidem fideliter de corde puro, & conscientia bona deferuire. Verum quia requiritis à nobis, ut iuxta propositum vestrum tradamus vobis vitae formulam, quam tenere in posterum debeatis, &c.

Observatio thematum, quæ è titulo, & primo textu duci possunt, ad exhortationes solitas.

Et titulo duci potest thema vnum, de primitiui status perfectione, alterum de ordinis titulo, & Beatissimæ Virginis tutela. E textu primo peti poterit vnum de amore solitudinis, alterum de monasticorum institutorum varietate. Possent alia themata è titulo textuq. primò deduci; ac nobis pauca, & salubria seligere, consilium est. Singula singulis exhortationibus expendemus.

Exhortatio de primitiui status perfectione, ad quam aspirandum est. Cap. I.

DVm ruinam collapsæ disciplinæ monasticæ multorum ordinum, qui olim florere, contemplor, patres, cernere mihi videor Ierosolymitanam cladem, quam Ieremias Propheta alto cum sensu lamentatus est. Fuerat olim Ierusalem Deo acceptissima, opibus, & honoribus aucta, secundisq. rebus adeò fortunata, ut nihil ei aduersum accidere posse videretur. Quod satis apertè propheta significauit in hæc verba:

Thre.
4

Non crediderunt reges terræ, & vniuersi habitatores orbis, quoniam ingrederetur hostis, & inimicus per portas Ierusalem.

Quis enim in primæuo vrbs sanctæ statu, successuram vastitatem suspicari potuisset? & tamèn in eam calamitatem prosperitas illa versa est, ut propheta idem viatores cladem horrendam spectantes, & stupentes inducat in hunc modum:

Plausc-

Plauserunt super te manibus omnes transeuntes Thre. per viam: sibilauerunt, & mouerunt caput suum²⁰ super filiam Ierusalem. Haccine est Vrbs, dicentes, perfecti decoris, gaudium vniuersa terra?

Hic sensus captæ, & euerse Ierusalem. Simile quiddam contigit monasticis ordinibus multis, quorum primæua firmitas tanta visa est, vt nunquam euertenda, vel grauitèr labefactanda videretur. Erat excelsus mundi contemptus, vberimus in ijs, qui mundo renuntiauerant, pœnitentiæ fructus, prælationum fuga, humilium obsequiorum æmulatio, orationis, & perennis Dei præsentis studium, penè miraculosa frugalitas, sedatus, & cælestibus desiderijs plenus psalmorum concētus, & quod caput est, mutua charitas christianæ perfectionis numeris absoluta, quæ diutissimam pollicebatur firmitatē. Quis inter tot cœnobiticæ vitæ munimenta constitutus excidium præfagiret? Quis aduersos impetus formidaret? Et tamèn multi, quasi lapides sanctuarij è quadro lapide firmissimè constructi, dispersi iam sunt in capite omnium platearum, cùm passim videamus plurimos antiquæ disciplinæ professores ab antiquitate longissimè remotos, & negotijs secularibus implicatos, ferè abiurata militia, cui nomina dederunt.

Rogamus nunc, quænam tantæ desolationis extiterit causa? Quæ nam vis tanta, quæ montium fundamenta subuerteret? Responsio tam vera, quam communis in promptu est. Cecidit spiritalis fabrica, quia degeneres professores cœperunt à primæuo studio sensim tepescere, & nouis

abusibus viâ aperire. Hęc funesti casus origo est, nec alia quidem requirenda. Hęc planè causa est luctus, quem exhibet collapsa ordinis disciplina. Hoc spectaculū, quod saxea corda moueret, mouit certè pectus B. Teresiz nostrę, vt dirutam magna ex parte fabricam incredibili animi magnitudine restitueret, restitutamq. nobis traderet, in primitiua firmitate sustinendam, quod ratio multiplex à veris filijs tantę parentis exigit.

Prima ratio à gratitudine orta. Quis enim non liquidò perspiciat, ingrati esse animi non in Deū solummodò sed in B. Fundatricem nostram, quod accepimus, patrimonium profana prodigalitate dissipare? Imensos illa labores pertulit, vt fabricam extrueret, nos in eius labores singulari Dei beneficio introiuimus; quàm ergo turpe, & generosis animis indignum esset, si beneficio tanto abuteremur, neque ius primogenitorum ad successores nostros integrum transferremus?

Secunda ratio à similitudine hæreticorum ducta. Qui in rebus ad primitiuam disciplinam attentibus audacter quippiā detrahunt, vel nouum quid inuehunt, non absimiles sunt hæresum satoribus, qui sacro textu corrupto, aliquid ex prisca Ecclesię doctrina decerpunt, vel nouo inuento adiungunt: quorum ausus, quàm sit noxius, ex introducta semel peste, & ad posteros deuoluta, conuincitur. Facile quippè imprimitur, quod semel impressum aut rarò, aut nunquam auertitur. In hunc modū obseruata humani generis fragilitate, nonnulli monachi (vt mitissimè dicam) imprudentes inducunt laxas primitiuę obseruan-

: interpretationes, quæ auidè ab alijs arripiuntur, fiuntq. nouorum dogmatum auctores daturi ad Deum iudicem pœnas acriores, quàm putant, ob successorum damna indè subsequuta.

Tertia ratio à propagatione Congregationis extita. Diuino consilio factum est, vt de propaganda renati Carmeli perfectione cogitemus, uam ad rem honestè tentandã, & absoluendam, porteret sanè perfectionis primitiuæ capita arithmeticè percensere, & illibata seruare, vt sine diminutione vlla in varias prouincias inferrètur. Quis enim non videat, graue communis boni detrimentum esse, si disciplina monastica, quæ in decimo perfectionis gradu in regnum aliquod transferri posset, transferatur in octauo? Nemo profectò mentis compos rem hanc inficiari, nemo sine acri conscientia remorsu, hac ipsa de causa, de primitiua austeritate quicquam remittere posse videtur.

Quarta ratio à perfectione propria enata. Licet nusquam disciplina nostra propaganda foret; ipsa primitiui floris conseruatio tot bonis referta est, vt à nullo cordato monacho negligi, aut non magni fieri possit. Profectò quod ad propriam cuiusq. perfectionem, quæ inter potissima bona recensetur, attinet, exploratum est, neminem perfectionis bono potiturum, qui ad primos patres disciplinae nostræ conditores non aspiret. Quos enim ductores alios sibi finget? Porro hos nobis Deus ad imitationem proposuit. Quis ergo extra Dei consilium perfectionem sibi promittat?

Quinta ratio ab ira, vel gratia Dei profecta.

Ex sacris liquet historijs, ut ex Apostolorum actibus, primitivæ observantiæ destructores à Deo severe punitos, conservatores beneficijs auctos, quod è chronicis quoque monasticorum ordinum notum, & vulgatum est: quod Divinæ Sapientiæ ordini, divinæq. bonitatis magnitudini congruit. Quo enim maius est beneficium, quo quis ad primitivas opes, velut primogenitus admittitur, eò indignatio maior in degeneres, quos Deus velut monstra à filiorum consortio depellit. Qua fortassè de causa, nonnulli primitivæ perfectionis impatientes transitum ad mitiores ordines conatu magno velut extorserunt, & modicam salutis spem, conscientia remorsu teste, reliquere.

Sexta ratio à monachis observantia claris iam defungentibus orta. Si de felici obitu per salutis æternæ signa, iudicium pie, ac prudenter ferri potest; experientia diuturna constat, egregios monachos primitivæ sanctitatis antiquorum patrum æmulos, quos novimus, feliciter in cœnobijs nostris fuisse defunctos, ijs signis exhibitis, quæ nullus certè animus, nisi spe firmissima fretus præferret. Lætitia enim illa, verba illa fiduciæ plena, sensus ille rerum divinarum palam ostensus, alijs, quàm fidis primitivæ sanctitatis hæredibus, inter nostros, non videtur posse congruere. His autem congruit maximè. Vbi enim ad supremum mortis agonem ventum est, animus fidelis memor observantiæ ad primitivum sensum exactæ, viribus divinis se sentit armari, nec facile immensum bonum, quo gaudet, valet oculere, aut lætitiæ motus cohibere. Præstiti (ait conscientia) quod debui: à

maio-

maioribus degenerare nolui: ad palmam nunc fidenter ascendendum est. Quid modo desideratur, patres? Quid deest? Audistis, quàm sit è re vestra, primæum Ordinis nostri florem tueri, ne tragædia aliqua tremenda contingat. Rei non modò honestatem, & vtilitatē, sed necessitatem quoque vidistis. Cur ergo Sanctos maiores nostros non impigrè imitemur? Num res nostra non agitur? Cur non arduitatē quamlibet superemus? Contendite intrare per angustam portam, & Christi consiliū æstimate. Mementote oraculi illius Apostolici: Omnis disciplina in præsentī quidem videtur non esse gaudij, sed mæroris: postea autem fructum pacatissimū exercitatis per eam reddet iustitiæ. Propter quod remissas manus, & soluta genua erigite. Hæc Apostolus. Ne cedatis difficultatibus, quas sanguis, & caro prætexunt. Firmiter retinete, quæ primis renunciationis vestræ diebus didicistis. Nouissimum vestri laboris exitum præmeditamini, mihiq. dicite, qua spe vos roborandos, qua voluptate perfundendos existimatis, ubi obitu imminente, antea actæ æmulationis recordatio subibit? Quid respondebitis, ubi quisq. vestrū ita secum ratiocinabitur: Ego nihil non conatus fui, ut primitiæ sanctitatis hæreditas inuiolata consisteret: Ego, ubi in cœtu monachorum quicquam primitiæ obseruantie consentaneum propositum fuit, valide institi, ut executioni mandaretur; obstitiq. quoad potui, ne quid dissentaneū admitteretur: Ego, quod ad partes spectauit meas ab omni nouitate, ab omni laxa interpretatione primitiuorum rituum, & traditionum abstinui:

Ego

Hebr.
12.

Ego pro flore primo alendo alacritèr occubuissem, si id tulisset fors? Non ne perspicitis, quod hortatus sum, intimo solatio plenum, & æternæ felicitatis spe subnixum esse? Agite ergo, & velut iurati Christi milites primitiue sanctitatis arcem inuictis animis propugnate.

Exhortatio de Beatissimæ Virginis titulo ac tutela. Cap. I^a.

Mirum diuinę prouidentię consilium fuit, patres vt ordo noster honorificentissimo Beatissimæ Virginis titulo exornaretur: quod facile perspicietis, si quā possumus, consilij diuini rationem indagemus. Non enim, honorem tantum temerè arreptum, aut fortuito delatum credere, par est. Porro reges, qui prudētia excellunt, non promiscuè omnes ciues, aut vrbes titulo aliquo insigniunt, sed re prius expensa, sineq. aliquo peculiari sibi proposito, qui regiā prudentiam deceat. In hunc modū, pro humano captu, de Christi sapientia sentiendum est. Equidem finis, qui Christum decuit, hic fuisse videtur, vt Beatissima Virgo eius parens honore summo afficeretur, & singulari ritu coleretur ab ordine aliquo, in id sanè piissimum officium destinato. Huic autem diuinę sapientię scopo congruebat, vt Virgo ipsa purissima gentis cultui ipsius additæ tutelam susciperet, & ordinem titulo ipsius decoratum peculiari cura protegeret. Hic diuinę prouidentię concentus harmonicus fuit, qui ad vniuersi terrarum orbis fines perfertur, dum nos Summis Pontificibus

id probantibus Beatissimę Virginis fratres, in genuo scilicet nomine, aut cognomēto appellamur.

Quanti autem à bonis, æquisq. iudicibus titulus, & tutela sublimissimę calorum reginæ fieri debeant, & ad quam vitę perfectionem nos adigant, subiectis rationibus suadetur.

Ratio prima. Ex ipso titulo, quem Beatissima Virgo nō dedignata est, vniuersus mundus agnouit, ordinem nostrum ad numerum earum rerum, quę ipsi Virgini Sacrantur, pertinere: Vnde, & nos, velut exemptum genus, ad supremę mundi reginæ aulam admissos, & tanquā palatino signo notatos intuetur. Quid autē hoc honore splendidius?

Ratio secunda. Excelsissima angelorum regina, ex quo titulum nostrę tutelariis accepit, nos in filios peculiari tandem ratione aliqua velut adoptauit; non enim, absq. fundamento aliquo, ordo noster non huius, aut illius Patriarchę, vt S. Dominici, vel Francisci, sed Beatiss. Virginis ordo iam olim nuncupatus est. Si ergo Professores Ordinis S. Dominici, aut S. Francisci eorum filij, modo peculiari, qui non alijs attribuitur, appellātur, & sunt; profectō & nos tātę reginę filij peculiari ratione aliqua, quę non vniuersos ordines peruagetur, nuncupari debemus; quod quā sit pretiosum, & præclarum, satis ex primi nequit. Non defuerunt certē ab origine Sancti, quibus titulus ordinis tribueretur, siue censeatur verum, nos ab Elia Propheta genus ducere, siue ad noui testamenti Sanctos, primos nempe Carmeli mōtis incolas disciplinę nostrę conditores, siue ad B. Albertum

bertum regulæ auctorem referamur. Cur ergo non ijs titulus, & adoptio ascribitur, nisi quia cælesti consilio, Beatiss. Virgini debebatur? Igitur si ipsa parens nostra est, peculiari Dei electa consilio; necesse palàm fit, ut quadam filiorum prærogatiua, non meritis nostris, sed bonitati diuinæ ascribenda, nos à cælorum regina in sortem ipsius acceptos sentiamus.

Ratio tertia. Titulus non sterilis, non inutilis est. Ex ipsa quippe tutelaris functione Beatissima Virgo id nobis præstare credenda est, quod tutelares alijs suis ordinibus præstant, ut scilicet peculiarem gerant eorum curam, & apud maiestatem diuinā pro suis alumniis instant, omniaque eorum negotia feliciter expediri satagant. Si ergo alij ex ipso tituli, & protectionis iure, id officium fideliter explent; quid de tutelari nostra, quæ Dei opes velut proprias dispensat, censendum est?

Ratio quarta. Licet omnia fileremus rationum momēta, fileri nequit officium vnigeniti filij Dei erga suam parentem, ad cuius optata, cælestes diuitias liberaliùs, quàm dici possit, effundit. Si ergo Christus, liberalitas, videlicet ipsa, filijs alienis, hoc est, peccatoribus abundè bona largitur; quid non erogabit matris suæ filijs, quos ipse ad quoddam tantæ matris, velut cōsortium asciiuit? Profectò si filij, & hæredes: & cùm hæreditatis procuratio ad eius genitricem, protectionis iure pertineat, credi non debet, Christū, ad postulata matris, in filios deriuanda, nō fore promptissimū.

Ratio quinta. Non solis, ac ieiunis rationibus
inni-

innitimur, ne quis aduersus ea, quæ promptissimus, quippiam excipiat. Rationes certè multis experimentis fultæ sunt, puta vestis, siuè scapularis, quod à Beatiss. Virgine accepimus, & beneficiorum planè grandium, quæ in eius officio nobis à sacra rituum Congregatione concessio attinguntur, vt reticeamus alia, quæ nimis onerosum esset recensere. Si ergò tituli, ac tutelæ argumēta adeò illustria, & tam multa accepimus, quis non iudicet, tituli, tutelæq. ipsius bonum magni fieri debere, nosq. ijs fretos spem firmissimam summi, ac sempiterni boni posse concipere?

Expendite modo, patres, vim rationum, quas protulimus, vt ijs ad honestum æstimandum, & exquirendum vtamini. Habetis tutelarem, cuius puritate nihil absolutius infra Deum potest cogitari. Eius filij, virgineo quodam velut partu in lucem Congregationis nostræ editi estis. Agnosce genus, & attentius explore, an generosi, vel degeneres sitis. Profectò Beatiss. Virginis filios parenti similes esse decet, nam qui dissimilis euasit, turpi se labe fædat. Si ergo vitæ similitudo filiorum nota est, cum cælorum regina profundissimam humilitatem, sincerissimam obedientiam, patientiam inuictissimam, dulcissimam mansuetudinem, charitatem ardentissimam coluerit; quis non animaduertat, Carmelitam Discalceatum, quod profitetur, esse nō posse, nisi virtutes similes parare studeat? An Virgo humilis monachum superbum, obediens proteruum, patiens impatientem, mitis iracundum inter filios reponet suos? Quomodò Discalceatus loquax tacitæ

cite matris filius, commoditatis amans inopis filius, oculorum licentia impudens modestæ filius, secularium consuetudini deditus abdite Virginis filius existimerur? Si filius sapiens matrem exilarat, quid de filiis insipientibus dicemus? Porro si angelorum regina capax iam mæstitiæ foret, timendum, ne mæror ex aliquorum filiorum stultitia conceptus lætitiæ omnem, vitamq. ipsam adimeret. Quod ne omnino gratis dictum videatur, argumentum hoc validum audite.

Ex rationibus superius propositis euincitur, Beatiss. Virginis tutelam ad nos roborandos, & cælestibus auxilijs muniendos, esse appositissimā, ipsamq. officio protectionis minimè deesse. Quomodo ergo non pauci alumni Ordinis ab ea protecti parum religiosè vitā instituunt? Quomodo quod attinet ad veras virtutes cōquirendas, non proficiunt magis, quā si vitam monasticā veste mutata deseruissent? Quomodo post annos sex octo, aut decem, sub auspicijs reginæ cælorum exactos, tanta bonarum affectionum, & operum sterilitate interarescunt, ac si in seculo litibus, & fraudibus intenti remāssissent? An Clementissima Virgo si doloris, & mortis ictibus confici posset, non gravitèr sauciaretur, ex auersione filiorum, quos tam enormiter aberrare conspiceret? Bene est, quod sicut Christus resurgens ex mortuis iam non moritur, ita eius genitrix à mortali ad immortalem vitam traducta sit. Verum degeneres filij ex hoc capite minimè culpas extenuant, cum quod ad se attinet, id efficiant, quod dolorem, & necem posset asferre.

Dege-

Pars Secunda.

Degenerent tamen alij, si volent. Vos tamen, patres, ne officium deseratis. Mundus sanè existimat, vos veros, & in delicijs habitos Virginis filios esse: & cum ad solemnes proceditis actus, candidatum agmen, velut prolem intermerata parentis intuetur. Ne ergo committatis, ut in re tanta orbis terrarum seducatur. Unigenitus Virginis filius agnus est. Vos quoque agnorum nomen, & mores præferte. Quale, rogo, monstrum foret tigris, vel lupi animus agni vellere obiectus? An coram agno Dei prætexet vellus? An prætexet titulum filij Virginis? Dei oculis omnia nuda, & aperta sunt, neque Deus unquam irridetur.

Beati agno. Beati veri Virginis filij, qui modestiam, puritatem, mansuetudinem, ceterasque virtutes statui consentaneas colunt, & Beatissimæ Virginis mores, (qui potissimus eius cultus est) quam possunt impensè imitantur. Hi perfectionis primitias legitima hæreditate sortientur, & ingenua prærogativa gaudebunt. Hic reginæ cœlitum verus cultus est, in quo, nostros, ad proportionem tutelæ, oportet excellere. Hoc cultu qui claruerit, quibus, putatis internis divitijs cumulabitur? Quibus oculis illum regina Virginum intuebitur? Quibus illum suprema mortis hora munimentis armabit? Quam læto vultu è prælio mortalitatis reuertentem curia cœlestis quæ reginæ suæ filios estimare novit, excipiet? Quid nunc attexam? Reddite patres, quod præclarissimæ tutelari nostræ iure summo debetis, & ad æternas opes, sub eius aspicijs festinate.

Ex-

*Exhortatio ad solitudinis amorem à primo
textu regula petita . Cap. III.*

DE solitudinis amore dicturus, patres, quo aptiore vtar exordio, quam ipsis regulæ verbis, quibus Albertus Ierosolymorum Patriarcha Eremitis, iuxta fontem Eliæ, in monte Carmelo, morantibus salutem dicit? His quippe verbis, loci consilio diuino selecti ad locanda nostræ disciplinæ fundamenta, descriptio compendiarie præmittitur, quæ bonos admonet Carmelitas non primè quæ duntaxat sanctitatis, qua maiores nostri claruerunt, sed loci etiam, in quo, velut in solo pingui, sanctitas ipsa coaluit, quod à nobis oscitanter prætereundum non est. Cum enim patres nostri locum illum à mundi strepitu longè dissitum, & ad animos in cœlestia bona erigendos peropportunum elegerint, ut posteritas eo exemplo erudiretur: necesse profectò est, si eorum menti congruere velimus, ut loca similia, & amemus, & quoad fieri possit, exquiramus, quod subiectis rationibus suadetur.

Ratio prima. Potior instituti nostri finis est diuina contemplatio, ut in prolegomenis expensum est. Cum ergo ex communi omnium sententia solitudo sit contemplationi opportunissima; quis non iudicet patres nostros appositè ad scopum, quem sibi præfixerant, locum elegisse, nosque si idem conemur, medium prudentissimum ad instituti nostri finem electuros?

Ratio secunda. Familiare est ijs, qui Deo vacare

care cupiunt, secedere in desertæ loca, ob eam commoditatem, quam solitudo exhibet, studij in cælum intenti, nec interpellati: Patet hoc quotidianis negotiatorum exemplis, qui ubi per dies paucos negotia intermittere, diuinisq. rebus animum intendere statuunt, locum aliquem deuium in primis petunt, rati se aliàs nõ satis ad votum, quæ statuerant, expleturos. Cum ergo nos non per dies aliquot intercalares, vt negotiosi illi, sed per totius vitæ decursum contemplationem cælestem profiteamus; quomodò poterimus incensum professionis nostræ studium cum modico solitudinis amore connectere? Aut quomodò non à propria conscientia redarguetur, tanquàm principalis studij tepidus executor, qui solitudinis medium finis appositissimum minimè, aut leuiter curat?

Ratio tertia. Exploratum est, Congregationis nostræ menti consentanea esse solitudinis desideria, cum de cœnobijs eremiticis, cellisq. ad morem primitiuum, & antiquum separatim extruendis leges tulerit, exemplo Congregationis Hispanicæ, vnde genus duxit. Si ergo doctrina, quàm tradimus, legibus nostris consona est; profectò desideria solitudini aduersa, parùmue congruentia extra leges aberrare videntur. Neque vis rationis enervatur, quod Congregatio nostra neminem ad solitudinem cogat, cum omnibus eam, vti rem honestissimam, & à primæuo statu nostri Ordinis deriuatam proponat. Neminem sanè cogit; at vehementer laudat studium eorum, qui ad solitudinem de prælatorum venia se recipere nituntur: qui ex communi sententia præferri solent.

alijs id non ita expetentibus, quippè qui solici-
tius, quàm alij, meliorem partem à Christo pro-
batam exquirant.

Ratio quarta. Tametsi qui loca deserta, iuxta
disciplinam, legesq. nostras exoptant, à nemine
commendarentur, profectus spiritualis certis ex-
perimentis deprehensus eos prædicaret. Negari
quippè nequit, quantum è signis humano more
conijcere licet, interiorum iudicio cognitori Deo
reservato, eos, qui prælatorum concessu in solita-
ria loca se abdunt, maiorem, quàm alij præfere-
rant, mundi contemptum exhibere, ardentioribus
cælestium bonorum flagrare desiderijs, in exerci-
tia spiritualia accuratiùs incumbere, communi-
bus regularis disciplinæ actibus frequentius inte-
resse, sacræ Scripturæ, piorumq. librorum lectioni
diutiùs vacare, ab humanæ laudis, aut gloriæ va-
næ occasionibus longiùs recedere, altioremq. Dei
sensum concipere. Hæc profectò nota, & cõmuni
sermone vulgata sunt. Si ergo hæc ita se habent,
sanè qui sui profectus cupidus est, quoad per obe-
dientiam licebit, se Marthæ laboribus, ac discursi-
bus subtrahet, & otium Magdalenz, in recessu,
ad pedes Christi requiret.

Ratio quinta. Prætexit fortassè aliquis, se vel
morbis, vel melancholicis impressiõibus, vel
alijs causis ab studio solitudinis auocari. Cete-
rùm exceptio hæc non ad solitudinem reprehenden-
dam, sed ad exceptorem excusandum confert:
cui non vertitur vitio, si iustis de causis eam mi-
nimè petat, secùs si minimè laudet, aut probet.
Quòd enim vnus, vel alter excipi, ob animi cor-
po-

poristie intemperiem, debeat, cur communi probandæ solitudinis obstet doctrinæ? cur obstet experientiz?

Ratio sexta. Nemo è nostris post spiritualem tyrocini educationem adeò cæcus esse possit, ut varijs postea curis studijs, aut laboribus intentus non animaduertat, se velut alterum hominem, ab eo, qui primùm noua Christi infantia per religionis ingressum renatus est, euasisse, quantumuis pia munia, puta concionum, & Sacrarum Confessionum obierit. Si enim hanc vitæ rationem minimè dignoscit, modicum lumen natus est. Profectò clarissimi sancti eam in se ipsis obseruarunt, & alto cum sensu fleuerunt. Cum ergò mutatio hæc frequens sit, remediumq. morbo contrarium, & præsentaneum sit solitudo; nescio qua mente à Carmelita Discaleceato reijci, aut non optari queat.

Ratio septima. Suppetunt exempla communibus historijs vulgata Sanctorum Ecclesiæ græcæ, & latinæ, qui eo tempore, quo mundus eorum præsentia maximè indigere videbatur, se à medijs vrbibus proripuerunt, ut spiritus pastu pinguiore in solitudine reficeretur, & vegetior effectus ad cõsuetæ officia rediret. Si ergo Sanctorum exempla pondus habent, & aliundè vitæ institutum non modo non obstat, sed inuitat, prælatorumq. venia datur; profectò solitudo postulata, & obtenta virtutis augendæ minimè despicienda occasio est.

Ratio octaua. Christus, ut è textu liquet Evangelico, plerumq. secessit in solitudinem, ut nos exemplo tanto instrueret, ad cõsuetudinem illam

filiorum Dei ab exilio in patriam suspirantium æmulandam. Quod sanè tanti præceptoris documentum animis Sanctorum altè adeò infedit, vt repleuerit deserta anachoretis, & à cœnobitica in solitariam vitam illustrissimos viros multum cum laude traduxerit.

Quid de rationibus productis iudicandum esse existimatis, patres? Quòd, rogo, iudicium ferretis de monacho Carmelita; qui contemplatiuam profitetur vitam, & solitudinem odit? An hæc possint coherere? Quid de illo censendum, cui cœnobia ab vrbibus remota, & ad solitariam penè formam accedentia ex eo capite displicent, quòd à secularibus minimè frequententur, ægreg. fert eam, quam sancti expetiuerunt, commoditatem, ad res diuinas sine interpellatione pertractandas? Beati, aiebat Augustinus, quorù omne opus oratio! Hi verò se beatos iudicant, vbi ab orationis exercitio, frequentia secularium instante recedunt. Hi certè nimis ad res humanas videtur affecti, neque vnquam inter diuinos viros reponentur. Profectò qui solitariam ducit vitam (vt Aristoteles primo politicorum dixit) est bellua, aut Deus, hoc est, (vt S. Tho. interpretatur) vir diuinus. Cum ergo solitudo, quàm suademus, non ad vitam ritu belluarum, sed cælitum more instituentem pertineat; efficitur, vt qui eam obedientiæ ductu sectantur, in numerum diuinorum virorum referendi sint. Etsi enim, quod ad externum spectat habitù, alijs similes sint, quod tamen ad mores mundo altiores attinet, ea inter hos, & alios, quæ inter ingenuos, & plebeios differentia conspic-

2. 2. q.
188. ar.
8. ad 5.

spicitur, quod similitudine satis apposita è sacris litteris petita demonstramus. Sanè si onagros, asellos, scilicet sylvestres, & domesticos quod ad corporis habitum pertinet inquæamur, exacta constabit similitudo: si verò mores, mirum est inter utrosq. discrimen. Domestici enim seruli more onera gestant, religantur, verberantur: sylvestres ab oneribus, vinculis, fustibus ingenua conditione exempti sunt, & liberrimè campos, montesq. pererrant, sicut scriptum est:

Quis dimisit onagrum liberum, & vincula eius ^{Iob 39} *quis soluit? Cui dedi in solitudine domum, & tabernaculum eius in terra salsuginis. Contemnit multitudinem ciuitatis, clamorem exactoris non audit. Circumspicit montes pascua sua, & virentia quæquæ perquirat.*

Ecce quàm liber à seruitute asellus, qui solitudinem percurrit, antithesi facta ad eum, qui in medijs vrbibus seruit. Hac certè de causa opportuna similitudine onager solitarium virum, qui mundi iugum excussit, domesticus asellus hominem seculi onera ferentem significat. Ex quo palàm efficitur, vt monachus, qui secularium frequentiam affectat, in seruitutem domestici aselli ritu degeneret. Vos autem patres frui potestis libertate, qua Christus vos liberauit, & seculi strepitum per interualla declinare. Quam ergo sortem eligitis? Quam conditionem optatis?

Tempus breue est: animusq. in multa studia diuisus vix sapientiam primoribus labijs delebat. Vtinàm dies hos paucos vitæ fugacissimæ magna saltem ex parte ibi transigeremus, vbi sola bono-

rum æternorum desideria æstuant, & veræ pœnitentiæ lachrymæ essent nobis aquæ scissæ in deserto, & torrentes in solitudine! Fugite, quoad potestis, è medio Babylonis, & tabernacula Iacob, vbi modica quies est, ne importunè requirite. Diligite potiùs portas dulcissimæ Sionis, & pacem, quæ superat omnem sensum, dum per obedientiam licet, opportunitate loci parate.

Exhortatio de Institutum monasticorum varietate, & proprii instituti usu. Cap. IV.

Diuinam profectò Christi sapientiam decuit, patres, ita Ecclesiæ fabricam extruere, quemadmodum mundi molem principio condiderat. Vt enim varia in orbe vno loca, temperie, fertilitate, rerum maiore, minoreuè copia distinxit, ita in ecclesiæ corpore partes varias diuersa perfectione discreuit. Ex quo certè miro partium discrimine, non quidè soluto, aut ægrè cohærente, sed aptissima proportionem concinno, spiritualis ecclesiæ pulchritudo cõsurgit. Confert itaque ad sponsæ Christi decorem varia diuini cultus disciplina, ordinibus distinctis aptè disposita, eamq. velut reginam forma præstantem mirificè exornat: quòd psalter regius extulit in hæc verba, absolutam sponsæ pulchritudinem Christo gratulatus:

Pla. 44. *Astitit regina à dextris tuis in vestitu deaurato circumdata varietate.*

Hic ordo contemplationi, ille actioni, alius mixto destinatur instituto, & ex mixtione ipsa mul-

multiplex ordo temperatur; atque in hūc modum vestis quādam polymita , & velut auro , sericoq. intertexta sponſę Chriſti circumdatur. Hęc regi- nę forma, hic amićus eſt .

Nunc ergo boni prudentiſq. monachi partes ſunt, varietatem hanc Eccleſiæ multis monaſticis ordinibus ornataē habere perſpectā, & proprium inſtitutum, quod ſemel arripuit, relictis alijs ex- actē obſervare , nulla extranea doctrina obtruſa , vel admiſſa, quod his rationibus monetur.

Ratio prima . Deus omnia fecit in numero , pondere, & menſura, quod non minùs propriè in corporibus myſticis, quàm in phyſicis ſeu natura- libus accipiendum eſt . Quocirca cū rem quāq. mathematicè, vel etiam arithmeticè (vt itā dica- mus) diſtinxerit , quæcunque pars loco proprio non conſiſtit , ordinem pulcherrimum à Deo di- ſcretum, quoad poteſt, perturbat, atque confun- dit . Monachus ergo, qui intra ſuę profeſſionis metas non ſe continet, diuini ordinis perturbator eſt , quoties aliena inſtituta certat inuadere , ef- ficitq. id , quod extumefcens mare minatur , vbi præſtituta littora obruere velle videtur . At mari imperatum eſt ?

Vſque huc venies & non procedes amplius, & hic Iob 12
confringes tumentes fluctus tuos.

Cui certè imperio ſimile eſt illud à regio vate de aquis decantatum :

Terminum poſuiſti, quem non tranſgredientur, neque conuertentur operire terram .

Sic Deo obtemperandum eſt à monacho , qui aliena inſtituta aggrediēdi tentatione infeſtatur.

Ratio secunda. Quod in corporis humani constitutione cernimus, hoc in corporum mysticorum spirituali, seu morali habitudine experimur. Vt enim corpus vnumquodq. humanum figuram, temperiemq. habet eam, cui aliā per omnia consentientem nusquam reperire continget; ita Religio quæq. eas habet proprietates consilio diuino præscriptas, quibus aliæ ex omni capite cōgruentes in ordine monastico nullo concresecunt. Vt ergo figuras, vultus, & habitudines humanorum corporum velle conciliare ineptum est, ita monasticorum institutorum concordiam ex omni parte, aut ex ea, quæ à quolibet instituto, iustis de causis excluditur, quærere, absurdum censetur.

Ratio tertia. Si ratio suppeteret aliqua, ob quam monachus alia instituta cum proprio permiscere deberet, esset certè maior aliqua vitæ perfectio. At hæc exceptio nullius ponderis est. Si enim Deus non eum vocauit ad statum illum perfectiorem, quorsum se intrudit ipsum? Non enim ab eo Deus in supremo iudicio exiget eam perfectionem, ad quam non eum euocauit: præterquam quod si perfectionis vrgetur desiderio, dedat se perfectionis studio in eo instituto, quod proficitur, & adipiscetur bonum, cuius imagine delusus aliena meditatur. At obijciat, institutum aliud sibi videri cōmodius ad vitæ perfectionem comparandam. Ceterum non benè consultat: res quippè iam decisa est, neque de statu electo prudenter iam consilia noua init. At dicet, institutum sanè ab origine bonum est, verum monachorum vitio laxatū. Sed obiectio hæc fortasse alijs à pri-

primitiua obseruantia in calamitosam sortem col-
lapsis congrueret; nostris autem diuino munere
societatem florentem nactis minimè consonat,
manifestaq. dæmonis suggestio videtur, aliud
optare,quàm quod cælitùs concessum est.

Ratio quarta. Admittamus, aliquod tandem
vitæ monasticæ institutum feliciùs modò florere,
quàm nostrum, quod diuino consilio floret. Hoc
tamen admissio, ratio diuinæ prouidentia, qua no-
bis hoc præ alijs institutum inspiratum est, non
fert, vt de bonis alijs, sed de proprijs nostris aga-
mus: non enim alia, sed hoc peculiare vitæ genus
à Deo nobis iniunctum est, huiusq. perfectio à
nobis ità exigitur, vt in eo exactè præstando laus
nostra posita sit. Simile quiddam in varijs Eccle-
sia ordinibus, ac in actibus tragediæ, comædiq.
perspicimus, vbi quisq. laudatur, non ex nobili-
tate personæ, quam finxit, sed ex proprietate, si
ad viuum personam expressit; atque adeò præfer-
tur is, qui plebeium negotiatorem verbis, gesti-
busq. aptè repræsentauit, ei, qui imperatoris per-
sonam minus aptè retulit. Sic profectò, qui status
propriij partes explet, antefertur ei, qui altioris
status perfectionem minus æquat; quod crebrò
accidere solet.

Ratio quinta. Experientia constat, eos, qui ad
aliena instituta se affici patiuntur, plerumq. se-
duci, vel transitu attentato, vel animo à proprio
statu saltèm auerso. Ex quo fit, vt certam propriij
instituti, & perfectionis iacturam faciant: & pa-
rùm felici exitu, quantum coniectare fas est, de-
mum intereant. Cuius certè mali origo fuit mo-
dica

dica proprii status æstimatio leuibus ex occasionibus orta, quæ proinde procul arcenda est.

Ratio sexta. Ordines monastici, qui laudem primam promerentur, sunt ij; qui non modò ex alienis institutis noua dogmata suis non intexuerunt, sed qui formulam sibi traditam adeò tenacitè retinuerunt, vt ne ex minimis quidè ceremonijs olim acceptis quippiam detrahere, addere, vel mutare, melioribus quoque ritibus propositis voluerint. Etsi enim multa ex genere meliora olim præscribi potuerint; statuta tamen bona in morem inducta ex prioris electionis, & consuetudinis circumstantijs, alijs ex genere melioribus præferri debere visa sunt.

Ratio septima. Nemo adeò imprudens esse posse videtur, qui magnum argenti pondus bono consilio repertum cum incerta spe auri effodiendi commutet. Qua ergo mente, qui bonum proficitur institutū minimè remissum, vbi multam vim bonorum operū contrahere potest, animum adiciat ad incerta lucra, quæ faciliè animo concipiuntur, rarò tamen ex sententia succedunt? Sanum consilium est, benè cœptis insistere, & aliena officia minimè vsurpare.

Ex his, quæ promptissimus, liquet, patres, magni interesse, si quisq. nostrum in opus proprii instituti totus incumbat, expendatq. verba illa, Verùm quia requiritis à nobis, vt iuxta propositum vestrum tradamus vobis vitæ formulam, quam tenere in posterum debeatis. Quibus ex verbis patet, patres nostros noluisse aliena instituta vsurpare, propriamq. vitæ formam à B. Alberto postu-

laile

lasse, & obtinuisse, sibiq. rudes, ac informes fuisse visos, donèc formulam certis limitibus circumscriptam acceperunt. Hanc ergo & nos accepimus à B. Teresa fundatrice nostra restitutam, à qua recedere piaculum est. Hanc nonnulli à proprio & nativo statu detorquere, & varijs institutorum generibus adulterare conati sunt: quibus aprè obijci posset illud Apostoli ad Galatas:

Miror, quod sic tam citò transferimini ab eo, qui Gal. 1. vos vocauit in gratiam Christi, in aliud Euangelii: quod non est aliud, nisi sunt aliqui, qui vos conturbant, & volunt cōuertere Euangelium Christi.

Et illud:

Currebatis benè: quis vos impediuit veritati non Gal. 5. obedire? Persuasio vestra nō est ex eo, qui vocat vos.

Hoc scilicet, quod Apostolus Galatis, qui priùs syncerum Euangelium cupidè amplexi fuerant, postea doctrina extranea corruperant, exprobrauit, posset ijs obtendi, qui institutum nostrum germano sensu antea susceptum, peregrina, & violenta mixtione peruertunt. Cauete ergo, patres prodigium hoc, ne in vos feratur sententia anathematis, quo Apostolus instituti nouatores peruellit in hæc verba.

Licet nos aut angelus de cælo euangelizet vobis, Gal. 1. preterquam quòd euangelizauimus vobis, anathema sit.

Formulam vobis præscriptam sincero sensu tuemini; & præstitutos vobis à Deo fines transilire ne satagite. Hæc est sapientia nostra, à qua, ne latum quidem vnguem, etiam sacrificij prætextu discrepandum est. Præscripsit Deus Saul per Samue-

Samuelem formulam, qua vteretur in eade Amalec: ille verò accepta formula, nec syncerè retenta, pietatis colore doctrinam permiscuit alienam partimq. factæ præscriptioni, partim admixtæ doctrinæ demum ad hæsit. Qua de causa, & ipse, & totum, quod egit, à Deo grauiter reiectum est, per verba illa:

1. Reg. 15. *Pœnitet me, quòd constituerim Saul regem, quia dereliquit me, & verba mea opere non impleuit.*

Ecce sine distinctione partis, quam expleuerat respuitur, quia non syncerè formulam mandati retinuit, nec profuit ei exceptio illa, siue animus immolandi, quæ ex eade subtraxerat, & reseruauerat. Hoc quippè non ad eius pertinebat institutum, quod memoriæ mandandum est. Scripta ergo, traditiones, mandata, & vniuersa, ex quibus nostrum conflatum institutum, vti Dei gratia cœpistis, cōstanter obseruate. Peregrinas impressiones validè repellite. In castris Ecclesiæ militantis, in ea statione, quæ vobis contigit, animosè persistite: & ijs armis, quibus obsepti estis, regnum calorum, quod vim patitur, amplissimæ spe mercedis expugnate.

TEXTVS SECVNDVS.

De Priore habendo, & tribus sibi promittendis.

Illud in primis statuimus, vt vnum ex vobis habeatis Priorem, qui ex vnanimi, omniumq. assensu, vel maioris, & sanioris partis ad hoc officium eligatur, cui obedientiam promittat quilibet aliorum, & promissam studeat operis veritate

tate seruare, cum castitate, & abdicatione proprietatis.

Obseruatio thematum, quæ duci possunt è secundo textu regulæ, ad exhortationes solitas.

P Romi possunt tria grauissima, & utilissima themata, vnum ad obedientiam, aliud ad castitatem, aliud ad paupertatem commendandam: & sub quouis themate plures conciones, siue exhortationes fieri poterunt. Nos exempli gratia tres duntaxat exhortationes subiiciemus.

Exhortatio ad obedientiæ votum explendum.
Cap. V.

D Icturus de obedientiæ voto, inter solennia nobilissimo, patres, primo loco obseruandum existimo, quàm sapienter in regulæ capite collocetur. Hæc quippè prima præscriptio est, vt vnus eligatur Prior, cui obedientia promittatur, quæ primo, ac dignissimo loco statui debuit, cùm totius disciplinæ monasticæ basis, totiusq. perfectionis compendium sit. Quocirca eam pensitabimus, & habito delectu, è plurimis, quæ depromi possent, pauca proferemus, è genere illorum, quæ salubriora videntur. Et primū quidem supponendum, votum obedientiæ, à virtute obedientiæ ita discerni, vt, quod lugendum est, pleriq. annis multis voto astricti perseuerent, qui obedientiæ virtutem minimè nacti sunt. Primo quippe vocationis calore concepto, votum emisere: at veros obediētiæ actus exercere detrectarunt, atque adeo

virtu-

virtutis, quam parare debuerant, expertes, solo voti vinculo innexi permanent, velut sterilitate damnati, quorum consortium tanquam morbi contagiosi genus vitandum est.

Obseruandum mox, obedientiæ exercitium, quo virtus vera paratur, in eo situm esse, ut monachus imperata intellectu miti probet, voluntate prompta amplectatur, expediteque exequatur, non quod ingenio ipsius congruant, vel alijs ex capitibus honorifica, vtilia, vel delectabilia sint, sed ea dumtaxat ratione, quod sint prælati iussa spontè nata, non extorta, aut aliunde profecta. Annotandum præterea vitium frequentissimum, quod serpsit in claustra, cum ratione, modoue ipso obedientiam colendi, aperto bello pugnare. Nihil enim crebrius, quam prælatum urgere, varijs hinc, inde rationibus mirificè contractis, & concinnatis, ad persuadendum, ut hæc, illaue postulata concedantur, vbi perspectum est germanum obedientiæ cultum nequaquam inueniri. Nihil item frequentius, quam fuga eorum, quæ à prælatus iniunguntur, nisi fortuito placeant, quæ sanè vbi explentur, quia placeant, profanus quidam obedientia prætextus est. Animaduertendum denique, in claustris etiam florentibus paucos obedientiæ cultores omni maiores exceptione reperiri, cum obedientiæ perfectio sine multiplici, ac perillustri proprii intellectus, voluntatisque victoria, perquiri nequeat. Intellectum autem, ac voluntatem raro ita pervinci, & in obsequium fidei redigi, compertum est.

Hæc immensi ponderis capita præfari oportuit,
ut ijs,

vt ijs, quę dicere paramus internum admoueat
auditum, & ad obedientię æstimationem animi
excitentur vestri, quorum res agitur, vbi de obe-
dientia colenda, ad votum reddendum sermo fit.
Vt ergo tantę virtutis studio vos dedatis ipsos,
& quos optatis fructus referatis subiectas ratio-
nes attentę percipite.

Ratio prima. Omnino certum est, vos mundo
nuncium remisisse, vt primam, & potissimam vi-
ctimam propriam scilicet, iudicium, ac volunta-
tem Deo immolaretis, qui est ipse proprius obe-
dientię cultus. Cum ergo in eodem proposito per-
sistatis quale delirium foret, quod spondidistis
diuinę maiestati, nõ reddere, & spiritali, detesta-
biliq. furto res Deo cõsecratas profanę vsurpare?

Ratio secunda. Inter clementissimum Deum,
& voti nuncupatorem quidam contractus, quod-
damq. spirituale, velut matrimonium initur, ita
vt, qui votum emisit, sui iam iudicij, & volunta-
tis vsum legitimum non habeat, nisi vt diuinę vo-
luntati à prælatis nunciatę cõsentiat, reciprocoq.
modo diuinum iudicium, ac voluntatem, vti pro-
pria bona recipiat, quę voti obedientię comple-
xio est. Quis ergo adeo desipiat, et contractum
honestissimum infelici, turpiq. diuortio soluere,
nec Dei iudicio, ac voluntate gubernari velit?

Ratio tertia. Licet nullus vnquam contractus
intercederet, obsequium obedientię, diuinę ma-
iestati præstitũ, res tam decora, & honorifica est
vt summis votis expeti debeat: quod facile de-
monstrant seculares pij obedientię voto minime
astricti, qui spontaneam suis confessarijs obe-
dien-

dientiam fidelius, quam monachi multi suis præ-
latis, reddunt, rati honestissimum esse, aliquem
sibi præponere, qui Dei loco præsit: quod quam
sit Deo ipsi acceptum, ex fructu pietatis cumu-
lato, quem recipiunt, prudenter conijci potest.
Si ergo rei honestas seculares allicit, cur mona-
chum non demulceat?

Ratio quarta. Quamvis omissa interim hone-
state, sola conscientie securitas expenderetur,
deberet profectione obedientia studiosissime coli, &
prælati iussa, velut oracula cælestia excipi. An via-
tor solitudinem vastam pererrans belluarum fre-
mitu territus implexis truncorum capitibus insi-
stens non magni faceret ductorem regionis bene
gnarum, quo præeunte in locum tutum sine am-
bagibus, periculisve concederet? Multi sunt vitæ
mortalis anfractus, incerta providentia, anceps
consilium, ibiq. plerumq. latent peiora discrimi-
na, ubi salus tutior credebatur. Cum ergo nihil
in hoc exilio sit optabilius, quam in patriam cæ-
lestem, rectis itineribus absque defectione, erro-
req. contendere, constetq. veros obedientes tuto
agere, dum à prælatis se sinunt duci, eamq. viam
regiam à cunctis sapientibus existimari; dicen-
dum prorsus videtur, monachum, qui obedien-
tiæ ducatum refugit, stupidè ineptire, aut etiam
insanire.

Ratio quinta. Si aliquod suppetit perfectionis
acquirendæ desiderium, eo ipso vigere debet co-
lendæ obedientiæ studium. Cum enim obedientiæ
ipsa virtutes omnes, è quibus monasticæ perfe-
ctionis componitur integritas, in animum indu-
cat;

eat, aut à progressu perfectionis, in quam monachus tendit, desistendum, aut obedientię cultui insistendū est. Porro nemo inficiari potest, obedientiam virtutes omnes secum connexas inducere, cum constet prælatorum iussu actus virtutū aliarum, puta, humilitatis, charitatis, prudentiæ, temperantiæ, exerceri. Si ergo tam decora, honestaq. societas placet, cupitisq. animū veris virtutibus excolere, obedientię studio impensè vacandū est.

Ratio sexta. Quoties obedientię resistitur, bellum geritur, prælato ius exigente suum, subditoq. negante. Quis autem bellum iustum ex parte subditi pertinacis esse contendat, cum videamus monachos minimè paucos obedientiæ desertores, & apostatas conscientiam gerentes, neque valentes requiescere, à quibus si petatur tantæ calamitatis origo, respondebunt, si vera fateri velint, se in eas angustias incidisse, quod cum prælato concertare, neque cedere voluerint? Prætexant subditi quicquid volent: raro enim tam se iustos evincunt, ut à prælato iniustum bellum geri conuincant, in ijs ordinibus, vbi spiritus, & legum custodia vigent, quod nobis experiētia compertum est. Qui ergo stabilitam cum Deo pacem tueri cupit, ne cum prælatis eius vicem gerētibus confligat, sed eis fido obedientiæ cultu concedat.

Ratio septima. Si res, è quibus imperfecti monachi ansam obedientiam violādi arripiunt, contemplerur, maior multò, quàm aliās inobedientiæ videbitur turpitudine. Malè quippè erga prælatos affici, eorumq. mandata præterire, aut non magni pendere assuescunt, non alijs de causis, quā

D

quia

quia papyri folium, imagunculam aliquam, vel id genus alia petita non indulgent, aut difficultè annuunt: quod experimētis multis deprehensum est. Quis ergo non miretur incredibilem fragilitatem hanc, & muliebrem animum, cuius affectus ijs de causis erga prælatus intepuit? Quis non apertè perspiciat expeditum, & facilem esse obedientiæ exercitium, & non posse vllam idoneam excusationem afferri, vbi quæ obstant, adeò exigua sunt? Profectò inter monachos obediētes recenseri non debet, qui leuissima illa non aspernatur, & obedientiam sine vlla animi perturbatione æquè colit, siue cōcedantur, siue denegētur.

Ratio octaua. Prætextitur absurditas rerum, quæ interdum iubentur. At quis te constituit iudicem iudicis tui, monache degener, & curiose, rerum explorator? Sit quisq. domus proprię cenfor. Certè quod ad nostram Congregationem attinget, non imperantur absurda, sed honesta, & ut plurimum indifferentia, quorum pars altera probabilis eo ipso fit probabilior, quòd prælatis probatur: quo in euentu boni monachi non est, aduersum partem propugnare, sed collū Christi iugo subdere, quod vtinam lectorum animis hæreat.

Ratio nona. Re inter monasticę disciplinę consultos collata deliberatū est, multos, qui sibi obediētes videntur, per quam rarò vllum syncerum obedientiæ actum producere. Cuius rei efficax argumentum est illorum sollicitudo ad comparandum prælatus animum, & incundum quoddam familiaritatis genus, quo vtuntur, vt nihil molestū eis prælatus iniungat, sed cum eis tanquā cum
æqua.

æqualibus versetur, facileq. ac pròptè, quæ postulantur, indulgeat. Rogo nunc quādo isti obedientiam colunt? Apud bonos Theologos rei monasticæ peritos constitutum est, omnia hæc, quæ ab istis tam sedulò quæruntur, extra germanā obedientiā esse: nihil enim quo ad possunt, solo prælati iussu iniunctum, sed præuia ipsorum diligentia sibi adaptatum amplectuntur, statimq. ac quipiam diuersi generis imperatur, apertè verbis, aut nutibus, aut prætensa mæstitia dissentiunt. Quando ergo obedientiā colunt? Profectò timendum est: & monachus quisq. si has culpas admittat, formidare debet, ne qui sibi videtur sapiens, in re omnium grauissima desipiat.

Ratio decima. Veris monachis, obedientiam fidei opus esse scientibus, satis esse deberet exemplum Christi obedientis, vt sine instructo tot rationū agmine flecterentur. Quod enim lapideum cor non moueat filius Dei vnigenitus, sempiternusq. Deus creaturis suis obtemperans? Quis vnquam concepisset animo rem tam longè ingenia mortalium superantem, diuinam scilicet maiestatem obediētiæ partes explentem? Credo equidem Beatissimam Virginem, eiusq. sponsum Ioseph identidem altiùs quā dici possit, obstupuisse, dum æternum Dei Verbum eis subditum, obsequijsq. deditum cernerent. Si ergo filius Dei didicit (vt ait Apostolus) ex ijs, quæ passus est, obedientiam: quis vnquam Discalceatus Carmelita obedientiam, vel obediendi modos synceros, integros, inuiolatosq. respuere velit?

Satis processum est patres. Quis tendat vltra?

Vt ad Filij Dei, vsque ad mortem obedientis scholam ventum est, quis non succumbat? Exemplum hoc lectissimū orbis terrarum florem mundo eripuit, piamq. prædam in monasteria transtulit. Vnus Achatius à Climaco relatus, obedientiæ cultor fidissimus è sepulchro, in quo corpus exanime iacebat, respondit, se mortuū non esse; quomodò enim vir obediēs interiret? Hoc oraculum reddidit vnus: at multi post eam atarem tumulati sunt, qui possent idem efferre, si diuinæ prouidentiae ordo id exigeret. Exemplum quippe Christi fortissimos viros procreauit, qui pessundatis mundi, carnis, ac sanguinis legibus, nouo quodam christianæ infantiae candore, quicquid scientiæ, ac prudentiæ olim comparauerant, abdicantes, sub austeri prælati disciplina mirabiles fecere progressus, qui dum ab historicis referuntur, velut è sepulchris clamitant, & se mortem proculcasse persuadent. Huc patres aspirandum, & conspirandum est. Cur enim non eò peruenire nitamur? An desunt exempla? An non proponuntur certatoribus præmia? An res nō honesta, utilis, delectabilis est, quam primaria mundi nobilitas cupidissimè arripuit? Porro si iusta trutina obedientiæ appēderetur virtus, multi diuinæ gloriæ, communis boni, salutisq. propriæ studio incenderentur, & sanctitatis laude clarerent. Pauci tamen aliquot ætate hac rem dignè æstimantes in cœtibus monasticis gloriam adepti sunt. An non animaduertens, quanta apud nostros sit obedientiæ laus? Nostis certè itā æstimari, vt qui obedientiæ laude præcellit, ad omne opus egregium cen.

cenſeatur idoneus, meritisq. maximis locuples exiſtetur. Noſtis, nonnullos è noſtris ante prælatum genua flexentes nec ſurgere iuſſos noctes integras in eo poſitu illuſtri ſui victoria perdu- raſſe. Noſtis alios à prælatis repræhenſos, & ad ſtabulum grauitè amandatos, ibi cum iumentis ſyncera obedientia à fide genita pernoctàſſe. Noſtis, alios in media cæna vocatos, parcū, peneq. neceſſarium victum fameliſcos reliquiſſe. Noſtis, alios eadē ferè hora, quæ prælati iuſſio innouit, inſalutatis amicis ad regna longinqua migràſſe. Noſtis & alia, quæ multis in hoc genere penè miraculoſa videntur. Hæc antiquæ Sanctorum obedientiæ æmulatio eſt. Hæc eſt nota militum fortiſſimorum, qui emiſſi voti memores, obedientiam exactè, promptè, ſtrenuè per medios enſes, & ignes exercere decreuerunt. His annumerari ſatagite, & quamlibet obedientiæ transgreſſionem, detortionem, interpretationem violentam, & quicquid tantæ virtutis integritatem deterit, velut ſcelus idololatriæ perhorreſcite. Certate bonum certamen fidei, quæ fidelibus oculis piam caliginem offundit, & vitā æternā apprehendite.

Exhortatio ad votum Caſtitiſ explendum.

Cap. V I.

FORTIS eſt vt mors dilectio, patres, quos Clementiſſimus Deus è ſeculo euocauit, & inſtatum monaſticū aſſeruit, vt curis omnibus alijs proculactis libero affectu, & à terrenis rebus exempto, in amoris diuini opus ſtrenue incumbere-

retis. Dilectio, qua praeuenti estis ab eo, qui vos è densis mundi tenebris eripuit, ut in statu hoc candidissimam caeli lucem aspiceretis, fortis est, ut mors. Ut enim mors res duas strictissimè cohaerentes animam, videlicet, corpusq. sciungit; ita diuina charitas, vos arcto prius vinculo caducis rebus religatos auulsit, & pio diuortio secreuit. Quod diuinæ charitatis genus eò destinatum est, ut amore nullo peregrino capti cor integrum summo bono cōsecratis. Atque adeò caelesti consilio castitatis votum vobis inspiratum, & à vobis emissum est, quod ad eum scopum, quem sapientia diuina praefixit, erat appositissimum. Quemadmodum enim nihil est, quod à caelestium bonorum studio efficacius hominē auertat, quàm impurus creaturarum amor, ita nihil esse posse videtur ad amoris diuini studium opportunius, quàm castitatis votū, quo & obscenitas omnis, & licita quoque aliàs corporū voluptas ictu vno praeciditur. Felicem sanè statum hac de causa sortiti estis, quòd medio castimoniae voto, diuinā maiestas vos totos sibi reseruare, & strictum amoris fœdus vobiscum inire dignata est. Cui certè immenso beneficio, ut rependatis vicem, nuncupatum puritatis votū superata quavis arduitate reddendum est, quod his rationibus asruitur.

Ratio prima. Finis instituti nostri potior est diuina contemplatio, illustris scilicet diuinæ bonitatis, pulchritudinisq. notitia. Cùm ergo ex communi sanctorum sententia, tam castitas ad intellectus aciem, rerumq. diuinarum notitiam, quàm obscenitas ad obtusionem, ac cecitatem

con-

conferat; omninò efficitur, vt castitatis cultus contemplationi intellectum mirificè adaptet, & à nobis eius votum exactissimè obseruandum sit.

Ratio secunda. Tam eximia est castimoniz pulchritudo, & honestas, vt animus quilibet benè institutus eam diligere, ac exquirere debeat. Est enim virtus ingenua, decora, sordium expultrix, candida, splendida, angelica, & spirituali Christi thalamo digna. Quod non adeò arcanum est, vt omninò seculi sectatoribus celetur. Quin etià adeò compertum est, vt oculi nequeat populo christiano, cui vt libidinosa vitæ licentia turpissimè sordet, & quodam modò ferri nequit, ità castitas arridet, ipsosq. intemperantes suo splendore perstringit. Quid quòd infideles ipsi hominem castum demirantur, & diuinum quoddam sub candido eo amictu latere concipiunt? Si ergo tot ex capitibus castitatis pulchritudo confurgit, & impios animos forma capit, cur non & pios? cur non & eos, qui eius voto se obstrinxerunt ipsos?

Ratio tertia. Vix exprimi possit, quàm sit Beatiss. Virginis filijs consentanea castitas, & quàm foret horrendum impuritatis monstrum in ea adoptione genitum. Quid enim tetrius, & detestabilius Virginis filijs castitatis insigne quasi gentilitium candida veste gerentibus, quàm obscenitas, cuius vel solum nomen animus audire horret? Si ergo tantæ parentis adoptio placet, omnis impuritas, quantumuis modica validius, quàm corporis mors refugi sanè debet.

Ratio quarta. Suppetit ratio alia à B. V. Tere-
sia fundatrice nostra, cuius eximia puritati, &

sublimissima contemplatio de qua scripsit, & corporis integritas, incorruptione mira fidē astruit. Quomodo autem ad eius familiam pertinere dicatur, cui omnis impuritas exosa non est, & qui castimonię pulchritudine captus non malit mori, quā fœdari?

Ratio quinta. Christus amore singulari prosequitur fidos castitatis cultores, ut liquet ē Sancto Ioanne Evangelista, quem castitatis prerogativa ampliore dilectione fecit dignum, ex multis purissimarum Virginum millibus, quę in hac etiam mortali vita, subtilissima cęli gaudia ē Christi fonte hausta, in signum fœderis delibarent. Qui ergo a Christo impensē diligi, & purę voluptatis illapsu gaudere cupit, prudentissimo certē consilio ad tanti boni lucrum utetur, si castitatis amore capiatur.

Ratio sexta. Prætexitur labor, qui ad corpus castigandum, & motus effrēnes compescendos, subeundus est. Cæterum si castitas res honestissima, & pulcherrima est, cur labor obtēditur? Quid enim boni sine labore paratur? Turpiter ergo labor obijcitur, præsertim cū maior multō exhauriatur labor pro caducis rebus, quę tantę virtutis dignitatem æquare nequeunt. Quinetiā nuptiæ ipsę ab intemperantibus tantoperē expetite duriores pariunt labores, quā certamen castitatis, cuius conscientia animum exhilarat.

Ratio septima. Concipiamus animo homines duos, alterum intemperantem, qui expleta libidine in adolescentia ipsa, corpus effœtum præmatura senectute, tæbe, & diris doloribus conficit,

tarta.

tattariq. tormenta præsentit, quod creberrimè accidere nimis notum est; alterum castum, qui animum à culpa, corpus à corruptela præservat, & duram disciplinam in bonæ spei argumentum vertit. Vter è duobus vobis probatur? Cuius sorrem appellatis felicem? Res profectò perspecta est. Quis ergo castitatis honestatem non affectet?

Ratio octava. Mercedem, quæ corporis dormitoribus in celo reposita est, oculus non vidit, nec auris audiuit, clarissima quippè castitatis victoria est, sanissimo de hoste relata. Quapropter vel ipsa certaminis magnitudo animum erigere deberet, proposito amplissimo præmio, mensura scilicet illa Evangelica, bona conferta, coagitata, quam fatigati animi sinus excipiet. Si ergo præmij cumulandi, in certamine castitatis fœcunda occurrit occasio; quis eam detrectet ex ijs, qui ad cænobiticam palæstram accesserunt?

Ratio nona. Multa fortissimorum militū agmina pro castitatis decore in monasterijs, in eremis, in antris decertarunt, & maluerunt omni mundi solatio carere, corpusq. vigilijs, inedia, frigoris, calorisq. patientia, cilicijs, verberibus penè conficere, quam florem candidissimū castitatis amittere. Alij etiam à licitis nuptijs iam contractis prudentissimo consilio abstinerunt, ne affectu minus libero in æterna gaudia suspitarent. Quis ergo è nostris statu, quem profitetur dignus sit, nisi pro voto castitatis observando dura quæq. sustineat?

Ratio decima. Si rogem vos, quò feratur iugis labor disciplinæ monasticæ, quem fertis, oratio quo.

quotidiana, Dei præsentia, aliaq. instituti nostri capita, respondebitis eò tendere, vt incatur vnio spiritus, qui in Christi amplexu quiescat. Hæc videlicet quies finis vestri laboris est. Hæc modò prægustatur fausto quodã præfagio, quæ, vti speramus, in patria cælesti demùm perficietur. Cùm ergo castus animus ad vnionem sponsi, qui pascitur inter lilia, faciliè admittatur, quid cogitatis, si castimonie candorem nõ auidissimè exquiritis?

Longo satis rationum contextu patuit, patres, quàm sit è re nostra formosissimũ castitatis splendorem summo prosequi amore nihilq. arduum ea de causa formidare. Quid nunc attexam? Quid loquar? An existimatis vos satis generose dimicasse, si vsitato modo castitatem colere pergatis? Benè quidem est, quòd oculos reprimatis, ne elegantem corporum formam aspiciant. Benè est, quòd parco victu, duro lecto, somno interciso, varioq. labore corpus eneruetis. At vbi est antiqua laus eorum, qui acerrimo prælio tentati florem intemeratum seruauere? Vbi fortitudo Susannæ, quæ maluit neci tradi, quàm senibus impudicè suadentibus assentiri? Vbi fortitudo martyris illius, qui in lecto molli cubare coactus, immisso scorto linguæ partem dentibus præcisam in faciem expuit? An putatis vos inter prætoriarum cohortis milites à Christo recensendos, quòd intra claustra latentes occasionibus submotis, corpori proprio imperetis? Porro ad clariores victorias aspirandum est; Vt animo comparati sitis, ad sanguinem in quaui occasione fundendum, pro castitate tuenda, Propositum quippè pium, quod nul-

nulla commendat experientia, etſi laudi aſcribitur, non tamen laudi primæ, quæ Virginis filios omnino decet.

Si autem communes victorias ad laudem primam non pertingere decernimus; quid de lentis militibus dicemus? Spero equidem, Dei munere, ſub candida Virginis veſte, neminem reperiri, qui candide non agat. Verum non ideò virtus abſoluta eſt. Qui enim e noſtris turpia, quæq. horret, ſed ea, quæ tutiora, purioraq. ſunt non auidè ſectatur, diuinis beneficijs parum gratus, ſtatuq. ſuo parum dignus eſt.

Ne ergo parcatis equo fallaci: frænum aſperius in os inducite, & calcar adſtringite, ne vos præcipites agat. Ne vos frangat importunus inſultus: validè illum repellite, & pro virtutis decore pugnite. Oculorum, linguæq. licentiam coercete, primosq. internos motus recentèr excitatos, velut draconis capita præcidite. Omnia ſub ſole tranſeunt, vexatioq. veſtra tranſibit. Nunc per confragosa loca, & prærupta ſaxa iter facitis, propter verba labiorum ſponſi cuſtodientes vias duras. ſed poſtquam viam emenſi fueritis apparebit amœniſſima regio viuorum immortalivirore lata, & vitali fructu fœcunda. Ibi famelicus animus dulciſſimo paſtu ſaturabitur, & ſitis omnis puriſſimi potu fontis explebitur. Hęc, patres, animo concipite, hæc identidem recolite, & per mortalitatis labores, & ærumnas, ad Ciuitatis Dei requiem, & vbertatem, ſine defectione contendite.

*Exhortatio ad paupertatis votum explendum.**Cap. V I I.*

Q Vi per arduam salutis viam, proculcatis mundi legibus, progredi decreuerunt, faciliè animaduertunt, se diuitijs oneratos iter illud, quod agilitatem multam, expeditionemque requirit, non posse, qua cupiunt, celeritate conficere. Quapropter à temporalium bonorum abdicatione perfectionis iter inchoant, per antiquo ecclesiæ nascentis vsu, & succedenti per omnes ætates multiplici sanctorum exemplo. Hisce nos vestigijs insistimus, patres, postquam cupiditatis vela contraximus, & apostolicam vitam ducere constituimus. Vt verò arrepti propositi amor altius imprimatur & voti paupertatis observatio procuret exactius, quanti fieri debeat monastica inopia, ex rationibus hisce perpendite.

Prima ratio. Eo ipso, quod temporalia bona respuistis, molestissimam quoque reiecistis sollicitudinem, quæ velut stimulus animo infixus opum possessores infestat. Ea quippè est vitæ præsentis conditio, ut vel modicum aurum sollicitudinem generet multam, & requiem omnem depellat. Quantò ergò vobis commodior est inopia nostra tranquillè suscepta, quàm opulentia seculi sollicitudine anxia?

Secunda ratio. Vbi opes congeruntur, litium sparguntur semina, quibus apud grauias tribunalia æquales, aut maiores plerumque fiunt expensæ, quàm sit victoriæ lucrum. Ex quo efficitur, ut qui
ampla-

amplarum diuitiarum heredes instituuntur, peius interdum vexentur, quàm si inopia premerentur. Quantò ergo preciosior est pax nostra, quam litigiosæ diuitiæ? Rem considerate, & statum vestrum æstimare pertendite.

Ratio tertia. Quò quis in seculo ditior est, eo plures ofores, & insidiatores patitur, qui ei vitam adimere, prædam, diripere vellent. At quò monachus pauperior est, eò plures habet amicos ad largitionem pronos, & misericordes, quod experimentis quotidianis didicistis. Quis ergo paupertatem apostolicâ mundi opulentia non præferat?

Ratio quarta. Perpauci diuites inueniuntur, qui opes iuxta sanctorum doctrinam impendant, sed alij in auaram retentionem, alij in prodigalitatem degenerant, quod nimis vulgatum est. Experientia ergo conuincit, diuitias in vitiorum fomenta frequenter verti. Quantò ergo felicior fors vestra est, qui actu vno diuitias mûdi omnes contempsistis, vt vitiorû materiam procul pelleretis?

Ratio quinta. Philosophi multi naturalis scientiæ amore capti, opes aspernati sunt, rati cum philosophiæ studio diuitias non posse connecti. Quomodò ergò cum diuinæ sapiëntiæ studio concilietur? Quantò est vtilius, & delectabilius scientiæ sanctorum, quam auri conseruationi, & incremento studere? Quis ita desipiat, vt libertatem filiorum Dei è rerum fluxarum contemptione ortam ad animum in caelestia bona subleuandum non magni faciat?

Ratio sexta. E seculi decliuio in excelsam statum monastici regionem ascendimus, vt tanquàm è pro-

è propinquiore loco in cælum semper aspirare-
mus. Certis autem experimentis nouimus ino-
piam ipsam esse veluti stimulum quendam, quo
veri pauperes excitantur ad res necessarias è cæ-
lo requirendas, quæ in terris desiderantur. Præ-
clare ergo nobiscum agitur, vbi res quoque ne-
cessariæ deesse videntur, vt paupertatis apostoli-
cæ experientia excitati à clementissimo patre,
panem fidentiùs postulemus.

Ratio septima. Exploratum est, hanc plane fe-
licem sortem manachis contigisse, vt pro ijs, à
quibus eis in seculo victus, & vestitus prouideba-
tur, successerit fidissimus prouisor Deus, cuius
promptuaria sterilia esse non possunt. Quanto er-
go securior est nobis diuina prouidentia, quàm
secularibus humana: præsertim cum diuites
egeant, & esuriant, inquirentes autem Dominum
non deficiant omni bono?

Ratio octaua. Experientia nobis notum est,
ingenuos plerosq. qui in paternis ædibus opipa-
re vescebantur, ac pretiosè induebantur, rudi vi-
tui, ac vestitui nostro assuetos saniores, & vali-
diores euasisse, vt paupertas apostolica animi,
corporisq. vires roborasse videatur. Quis ergo
huiusmodi inopiam non exspectat, & spem in Deo
firmissime non collocet?

Ratio nona. Recenseri nequeunt innumera
apostolicorum agmina pauperum, qui relique-
runt omnia, vt modico pretio regnum cælorum
compararent, quos Christus robusta spe æternæ
hereditatis erexit, ne inter inopiæ labores con-
ciderent. Omnino autem compertum est, opta-
bilius

bilius esse, ad spem tantam cum Christi laude, coniunctam promoueri, quã vniuersi mundi opibus, & honoribus affluere. Huc, & vos pertinetis.

Ratio decima. Vnigeniti filij Dei vox est illa, quæ pectora saxi duriora mulceret:

Vulpes foveas habent, & volucres cali nidos: filius autem hominis non habet, ubi caput reclinet. Matt. 8.

Vox hæc filij Dei, qui cum esset diues, egenus propter nos factus est, vt illius inopia nos diuites essemus, deberet monachum summa afficere læticia, ob similitudinem sui redemptoris, quam gerit. Membra quippè capiti congruentia, post exantlatos labores in capitis consortium proculdubio accersenda sunt, vt inopia brevis opulentia æterna repensetur.

Quò iam procurrat oratio? Quid à monachis se Christum sequi profitentibus rationes allatæ non obtineant? Quis nõ diuitijs regum inopiam nostram anteponat? Profectò cordi callum obduxit, qui paupertate apostolica minimè gloria- tur, qui commodum lectum, cellam, & id genus alia captat, qui laceras vestes, rudemq. victum horret, qui labores paupertatis comites detrectat. Cùm enim honestissima inopia hæc tam sic ad regnum cælorum parandum apposita, eoq. regno potiri nolle, extremæ insanix genus sit; necessario dicendum videtur, monachos paupertatis ofores, aut infidos observatores obduruisse, quippè qui ad opus tam sibi salutare, ac honorificum ægre inducantur, aut etiam obsistant. Qui eò peiores euadunt, quò commoditates, quas in claustris exquirere possunt, minores, ac viliores sunt.

sunt. Quid enim abiectius quàm monachum, qui amplum despexit patrimonium, post eam insignem mundi victoriam, ita degenerare, ut affectum, quem millenis aureis annuorum reddituum in seculo affixisset, rudi vestimento, aut lecto ad dicat, neque minùs rei tam despicibilis privatione in cœnobio mœreat, quam reddituum illorum iactura in seculo doluisset? Hæc est Aegypti servitus, à qua Dei munere redempti estis, caelesti libertate fruituri. Quid ergò cogitatis? Cùm non pergitis aspernari, quæ primo vocationis orsu despexistis? Sanè, qui inter nostros, monastica perfectione præstiterunt, obsoletas vestes novis, panem duriorē recenti, cellam incommodam commodæ præferre consueverunt, cuius rei nos testes oculati sumus. Quin etiam ubi panis necessarius consueta prandij hora defuit, mirum est, quanta cum lætitia, & gratulatione, voti paupertatis exercitium exceperint. Hæc primæ sanctitatis æmulatio est, ubi non modò sine murmure, aut querimonijs, sed intimo cum gaudio penuria sustinetur.

Quid iam de accurata observatione illa rerum ad vsum concessarum attexam? Mos enim inter nostros inualuit, ut libros, operimenta lecti, & quicquid à prælatis providetur, ita deinum accipiant, & tractent, uti deposita mox repetenda, usurpari solent, ne quid attritum, sordidum, aut alio modo violatum appareat, quo monachi alij sine horrore uti non valeant. Quo quidem in vfu ita paupertati studetur, rerû integritate, ac munditia seruata, ut charitas erga alios ijsdem rebus

vsuros

vfuros eximiè colatur. Quid denique de ijs subij-
ciam, qui iter facturi pecuniam sponte oblatam
reijciunt, vt panem emendicare, & raro saltem
& voti exercitio conscientiam explendi promissi
cupidam sedare queant? Hæc, plurimaq. alia ex
fida voti obseruatione profecta ijs è nostris, quos
sine exceptione laudamus, nostis esse familiaria.

Ne sinatis occasiones elabi, & de voti custodia
solo proposito concepta ne vobis blandiamini: si
necessaria suppetunt, & vbi desunt, mœstitia su-
bit, qualis, rogo, voti custodia est? Absit à no-
stris perfidia hæc: mentis cæcitas absit. Liberta-
tem ingenuam ne cum turpi seruitute commute-
tis. Reddite Deo votum, quod nuncupastis, &
apostolica inopia opes æternas comparate.

TEXTVS TERTIVS.

De receptione locorum.

LOca autem habere poteritis in eremis, vel
vbi donata vobis fuerint, ad vestræ religio-
nis obseruantiam apta, & commoda, secundum
quod Priori, & Fratribus videbitur expedire.

*Obseruatio thematum, quæ ex hoc textu duci
possunt ad exhortationes solitas.*

QUod ad exhortandos monachos attinet, er-
ga hunc textum differi potest de bono cœ-
nobiorum, quæ ad nostram disciplinam apta &
commoda extruuntur. Posset etiam agi de variet-
ate cœneborum, quorum alia in eremis, alia

propè vrbes conduntur ad instituti nostri distinctas partes explendas, quibus satisfieri sine eade varietate non posset.

Exhortatio de bono cœnobiorum, quæ ad nostram disciplinam apta, & commoda extruuntur. Cap. V l l l.

SIUC de cœnobijs eremiticis, siue de alijs propè vrbes constructis sermo fiat, non absq. excusationis, vel ingrati animi nota ædificij consideratio præteriretur. Est quippè mirum, & sane magnum diuinæ prouidentie opus, in nostram commoditatem, & solatium per antiquo vsu destinatum. Et quidem si mûdi principu sollicitudinem ad extruendas ædes amplissimas intentam admiramur, æquum omnino est, vt diuinæ maiestatis curam ad ædificanda nobis domicilia impensam demeremur, & in tanti patris prouidentiam nos, nostraq. omnia referamus. Quod vt à nobis rectius fiat, rationes hæc animo imprimenda sunt.

Ratio prima. Si monachus quisque in seculo fuisset locupletissimus, non valuisset certe domũ sibi tanto sumptu ad quemcumque humanæ vitæ finem extruere, quanto Deus elementissimus ei domum ædificauit. Quis enim, nisi regem aliquem, aut ditissimum principem excipiamus, tantam pecuniæ vim contraheret, ac insumeret, quantum in singulis ferè monasterijs diuina prouidentia ad fabricam congesta est. Hoc ergo beneficium, nisi quisque sibi vti proprium adaptet, cæcus, ac plane ingratus est.

Ratio secunda. Licet quisque nostrum princeps in seculo fuisset, tantam molem nusquam sine innumeris molestiis, & iurgiis conderet. Et tamen æternitis, ædificia nostra, sine vlla molestia, sine vlla contentione inchoari, & absolui, cum crebra, & propemodum quotidiana diuinæ largitatis experientia. Profectò totum hoc vestri gratia fit, neque sine nota reticere potest.

Ratio tertia. Siue fabricæ firmitas, siue forma, siue commoditas spe ætetur, certum est, quæ in seculo reliquistis, cum iis, quibus sine labore frui-
mini, non posse conferri. Rogo enim quis in seculo domum tot cubitulis discretâ, & ad pluias arcendas, æstusq; avertendum tam opportunam nancisceretur? Nec rationis huius vis enervatur, quod quisq; nostrum non omnes claustrî partes peculiari suæ commoditati vendicet: neque enim seculares vulgo id efficere possunt: præterquam quòd quoties opus est, non materialis ædificij modò, sed spiritualis quoque partes, cuiusq; vestrum obsequio subiiciuntur. Animadvertite ergo quam paternam vestri curam Deus in hoc genere gesserit.

Ratio quarta. Opulentissimi principes in vrbe natali, vel alibi pro libito vnum alterumq; palatium construunt. Vos verò multo plures domos varijs in regnis habetis, quas fidentiùs petere, incolereq; potestis, quam illi suas: tam stricto quippè, ac tam integro iure vobis, quàm iis, qui eleemosynas ad fabricam emendicarunt, domus illæ debentur, quoties prælatorum iussu hinc illuc migratis. Dicite ergo, quæ nam regum morta-

lium erga hæredes suos prouidentia cum hac diuina, quam erga nos perspicitis, comparetur? *Ratio quinta.* Non solum Clemētissimus Deus domos amplas, multasq. prouidit: sed famulatio, & omni necessario apparatu instruxit, quod ex hoc discrimine palam euincitur. Potentissimus quisq. rex ex vrbe regia egressus in oppido sui ipsius regni finitimo, iac exiguo emit panem, & pretium diuersorij soluit. Vos verò in cœnobium nostræ Congregationis diuertitis tam fidenter, ac in paternas ædes, & non gratis tantum, sed cum insigni amoris ostensione, pro necessitatibus modo, lectò, ac mensa recreamini, quin & viaticum accipitis. Quid quòd sine vllò differentie vestigio antiquiores minùs antiquis, doctiores, & nobiliores non ita doctis, & nobilibus alacriter ministrant? Profectò nulli mundi totius principi obsequia talia in palatijs magnificentissimis redduntur. Contemplamini nunc, quàm liberaliter tractemini.

Ratio sexta. Quamuis Domus Dei, quod ad corpus spectat, incommoda semper foret, vt in locis recēter acceptis ad tempus esse solet, inter summa ipsius Dei beneficia eius inhabitatio poni deberet, tametsi quis postremis obsequijs destinaretur. Quantò ergo cumulatiùs beneficiù est, non inhabitare tantum sed tot bonis ibi sine discrimine frui, quibus locupletes etiàm mundi domus proculdubio carent?

Ratio septima. Nulla domus instructior, quàm quæ periculis repentè hatis, præsentī remedio statim succurrit: nulla securior, quàm cui minùs

inuide.

inuidetur; & quæ ita munita est, ut fures formidine depellat: Omnino autem certum est, monasteria, ubi multi Christiana pace fœderati commorantur, eiusmodi esse, cū ibi interdiū, noctuque ad omnium commune; & cuiusque priuatū bonum omnes concorditer accurrant: quod tum in alijs euentibus, tum in mortis discrimine summi solatij genus est. Iudicate ergo quam benè misericors Deus domos nostras instruxerit, atque munierit.

Ratio octaua. Cœnobia monachorum habent tutelares sanctos, quorum patrocinio perstant integra, ea præsertim, quæ Beatiss. Virginis titulo decorantur. Quæ nam ergo regū palatia cum ijs conferantur quamuis tormentis muralibus, & excubijs accuratè dispositis se muniri iactent.

Ratio nona. Magni sanè solatij genus est sub eodem tecto in concilio iustorum, & congregatione morari. Quid enim non sperandum, quando Clementissimus Deus Sodomorum, & Gomorrhæorum multitudini enormibus peccatis fœdata, Abraham intercedente, veniam pollicetur, si decem iustos reperiat? An qui innumeris peccatoribus parceret ob iustos paucos, non ignoscet monacho vni ob cœtum iustorum in preces incumbentium, si forte pro humana fragilitate peccarit? Nescit mundus æstimare, quàm sit ad animos roborandos efficax iustorum sub vno tecto societas.

Ratio decima. Superest summum planè cœnobia bonum à paucis (ut par esset) expensum. Quod ut digne ponderetur, ponendum est, eccle-

fiat cœnobijs contiguas, potissimam ædificij partem esse, quæ cuique monacho, velut domus propria, & satis ampla est, cum è claustro ad eam pateat semper ianua, ibiq. actus ecclesiastici ab omnibus rite celebrentur; Rogo nunc, Nonne ibi Eucharistiæ Sacramentum asseruatur, & sub eisdem tectis Christus vobiscum habitat? Videtur ne vobis habitatio hæc ad cœnobiolorum dignitatem; vestrumq. solatium parùm attinere? Incredibilis profectò mentis hebetudo, cordisq. duritia foret, si rem hanc planè grandem non maximipenderetis. Utinam diuinæ maiestatis dignationi iustum gratitudinis tributum redderetur.

Ex ijs, quæ promptissimè facillè cognoscetis, quid sub illis regulæ verbis, loca ad vestrę religionis obseruantiam apta, & commoda, lateat. Perspexistis quippè, quanta sit aptitudo, quanta commoditas in cœnobijs nostris ad vitam tranquillè ducendam, & ad animum non modò veris virtutibus excolendum, sed etiam recreandum, ac roborandum, quod diuinę bonitati acceptum ferendum est. Nunc ergo si tantà ad omne opus disciplinę monasticę commoditas suppetit; quid censeretis, si quis vestrum illa abuteretur, & ubi sanctior facillè posset euadere, fieret spontè deterior? Cœnobiolorum aptitudo, lapidesq. ipsi, quibus conscant; clamitare, & christianam perfectionem à nobis stricto iure videntur exigere: quid igitur, si quis Dei immemor, nihilò melior in claustrò sanctimonix feraci fieret, quàm si in profano loco versaretur? An putatis, impunè laturum eum, à quo loca sancta polluantur? Obseruate; quid

alijs religionibus contigerit, quarum cœnobîa deserta, & templa in stabula conuersa cernuntur, hæc ipsa ætate, quæ mœstissimorum prodigiorum spectatrix effecta est. Floruerunt olim loca illa, quæ viridaria ad Christi delicias culta videbantur: sed monachi degeneres aptitudine, & commoditate illa abuti cœperunt, perrexeruntq. donec ira Dei efferbuit, sedibusq. antiquis legum violatores depulit. Contigit eiusmodi locis, quod olim Sion, de qua Ieremias Thren. 2. Repulit Dominus altare suum, maledixit sanctificationi sue: tradidit in manus inimici muros turrium eius.

Hæc Propheta, ad cuius sensum sacra monasteria profanè violata lugeri possent. Qua propter cauendum est, ne quis nostrum iram Dei prouocet, & quod ad se attinet, fabricam demoliat, quam sustinere deberet. Nulla funestior in clade Ierosolymitana calamitas fuit, quam loci Deo consecrati pollutio, & subsequuta deuastatio; neque vlla luctuosior in ordinibus monasticis excogitare posse videtur, quàm ubi monasteria, quæ a Sanctis condita, & inhabitata fuere, ab irato Deo reijciuntur. Sanctè ergo sancta tractate, & commodam parandæ perfectionis occasionem adepti, ne otio torpeatis. Expendite dignitatem loci sacri, multis prærogatiuis exornati, vos qui statis in domo Domini, in atrijs domus Domini nostri. Exhibete vos loco dignos, & celestis Ierusalem imaginem referte. Ne committite, vt indecorum quippiam deprehendatur, quod Dei domum dedeeat: sed celestes angelorum choros apta communium actuum proportionem, miti ani-

mo, & modestissimo corporis habitu æmulamini. Hic cœnobiorum nostrorum cultus sit, qui æterna mercede repensabitur.

Exhortatio de varietate cœnobiorum in qua monachi distribuuntur. Cap. IX.

Divinam profectò sapientiam decuit, patres, in hac nova Carmeli instauratione, ita cœnobis institui, atque discerni, ut amplo B. Teresie fundatricis nostre proposito cōgruerent, ne quid desideraretur ad bonum, quod animo cōceperat, exequendum. Quocirca consilio calitus inspirato, à maioribus nostris quaterna, aut quina cœnobiorum genera, iuxta sensum verborum regulæ, quæ nunc lecta sunt, distincta novimus, alia solitudini, alia tyronum educationi, alia studiis, alia professorum profectui, alia missionibus destinata, ex quibus varia quædam vestis velut opere plumarij elaborata contextitur, quæ Congregationem nostram exornat. Vestem hanc magnificare, & pro capta quisq. suo tueri debet, ne laceretur, vel inquinetur, quod divinæ maiestatis gloria, & ipsius Congregationis dignitas excelsa requirit. Quia vero nullus vestem lacerandi modus expeditior est, quàm si quis præscriptum sibi in vnoquoque cœnobio ordinem ihuere, aut sine prælati concessu ex alijs in alia migrare contendant, rationes proferam minime contemnendas, quibus, quoad posero, expendam, quàm sit expediens, monachum quemq. in loco sibi assignato permanere, nec iniussu prælati

lati mutationem ullam attentare.

Ratio prima. Congregatio nostra diuino munere disposita est, velut castrorum acies ordinata, praelatis oculatissime obseruantibus quem vnicuique cœnobio assignent, quam functionem cuique demandent. Quando ergo monachus, sine causa coram Deo efficaci, prælatus vrget, vt locum, functionemque mutet, nihil agit aliud, quam si miles decretam sibi stationem absque causa desereret, & exercitus, vel agminis ordinem confunderet. Rationis vis seipsam luculentius prodet, si qui eo modo, se tentari finit, fingat quid mali succresceret, si alij eiusmodi fragilitati succumberent. Exploratum est quippè, si id crebrò accideret, omne Congregationis bonum monachis variè dispersis, interiturum. Si ergo in alijs id minimè probandum est, quid de seipso, qui non est alijs iustior, respondebit?

Ratio secunda. Mutationis cupiditas oriri passim solet ex fuga mortificationis, qua passionēs non dum domitæ excitantur. Cum ergo, qui eiusmodi est, passionēs secum ferat, cæcus est, si non apertè perspiciat, nō loci, sed animi mutationem ab eo querendam esse, si conuiescere velit.

Ratio tertia. Prætexunt aliqui, in alijs cœnobijs non esse exercitia prorsus similia, non parem seclarium frequentiam, maiores virtutis parandæ occasiones. Ceterum ij, qui disciplinæ monasticæ benè consulti sunt, huiusmodi prætextus fallaces iudicabunt, cum frequenti experimento pateat, eos, qui hæc excusant, ex inconstantia potius, & impatientia, quam ex amore virtutis mutatio-

tatio-

tationem optare. Licet autem vera essent, quæ proponunt, quandiu ex obedientiæ præscripto in loco vno morantur, certò sciunt, se iuxta Dei voluntatem, ibi manere, incertum autem est, an iuxta Dei placitum, de mutatione cogitent. Cur ergo incerta certis præferre velint?

Ratio quarta. Quandiu monachus prælati iussu vni ascribitur cœnobio, non exigit Deus ab eo alia exercitia perfectiora, quàm quæ ibi frequentantur, certumq. est, cuiusvis cœnobij exercitia ea esse, quibus christiana perfectio possit acquiri. Si ergo ea sufficiunt, & Deus à monacho non alia exigit, quid ipse causatur, vt cælum mutet?

Ratio quinta. Prætexit prælati asperitatem, vel id genus alia. Verùm quomodò nouit prælatum, cui subesse cupit, mitiorem sibi fore? Manifesta demonis impostura est, quam multi serò deprehendunt. Notum est quippè, monachos in hoc genere fragiles, velut extorta ad transmigrandum licentia vsos, duriores incurrisse in prælatos, quos planè suaves sibi fore leuiter coniectauerant. Quod equo Dei iudicio accidere, sapientum consensus est, in pœnam culpæ, quam commiserant, dum diuinæ voluntati in decreto sibi monasterio perseueranter parere detrectabant.

Ratio sexta. Si mutationis cupiditas ad conscientiæ sensum examinetur, ex multis patebit euentibus, monachos cœnobia in varia inhiantes perpetuum sibi creare remorsum, quo iugiter vellicentur. Qui enim prælatum molestia afficit, donec mutationem impetret, iam inde nouit, se Dei voluntatem quasi violento motu pertrahere velle,

velle, ut proprio sensui adaptetur. Mox quicquid mali in locis, ad quæ migrat, accidit, in grauiorem vertitur desolationem, cōscientia scilicet infesta quæ dicitur, illum non in eas angustias à Deo inductum, sed propria voluntate præcipitatum, ac propterea, non illa Dei auxilia ad animum deiectum erigendum recepturum, quæ in loco diuinitus electo consistens è caelo reciperet. Qui inconstantia morbo laborant, hanc veritatem, vel coacti asserunt.

Ratio septima. Religiosi per itinera parùm necessaria vagantes magnam interiorum affectuum iacturam faciunt, ægreque postea ad se redeunt. Quomodo ergo, qui rerum spiritualium curam gerit, induci potest ad loca longè diffusa petenda, vel optanda? Qui à prælato communis boni gratia missi iter faciunt, vix ea damna vitant; quid ergo, qui licentiam extorquent?

Ratio octaua. Qui inter nostros verarum virtutum laude præcellunt, horrent eiusmodi itinera postulata, & verentur, ne à Deo deferantur, si ipsi loca assignata deferere velint. Bonorum ergo mos argumentum est, ad alios diuersè opinantes ex hoc capite minimè laudandos.

Ratio nona. Ex quo, quis cepit leuibz ex causis cōnobia mutare, spiritu quodam vertiginis correptus intra paucos menses pro nouis mutationibus prælatum torquet, ut satis vulgatum est; ex quo bonum suum nomen obscurat, & aliorum irrisioni se ipsum exponit. Quanto ergo salubrius est, mutationis appetentiã recēter ortam coercere, quàm permittere, ut nouo passu vires acquirat?

Ratio

bi Ratio decima. Vbique pro regno Dei mala sustinenda sunt. Ibi autem fructuosius tolerantur, ubi Deus liberalius fauet. & ubi conscientia suggerit, hominem non querere, quæ sua sunt, quod exploratum est, felicius succedere, ubi quis ex prælati arbitrio moratur. Prudentius ergo consilium est, ut sinamus nos obedientiæ ductu regi, & locorum delectum tanquam disciplinæ nostræ partem prælati Dei vicem gerentibus deferamus.

Rationes depromptæ id efficiunt apud monachos verarum virtutum cupidos, ut vel cum iustæ causæ suppetunt, à prælati mutationem loci postulare non audeant, sed rei iudicium eis deferant, causa ut plurimum sincere proposita. Audaciæ quippè genus eis videtur, quicquam flagitare ob allatarum rationum pondus, quod conscientia ferre recusat. Quod enim solatium (aiunt illi) nobis accidere possit, si non simplici obedientiæ ductu, sed importunis postulatis aliò migremus, ibique acres tentationes, grauesq. molestiæ ingruant? Qua fronte Deum precabimur, ut auertat mala, quæ aduersus legitimum sinceræ obedientiæ usum nos ipsi quæsiuimus? Mala sponte quæsitæ formidant, & præcauent, qui Dei ductum æstimare norunt, cum tamen penis à Deo illatis humeros generose supponant. Alij vero, qui modicum lumen nacti sunt, crasso quodam ratiocinandi genere permoti satis iusti sibi videntur, si quæ apertum peccati inscriptum præferunt, declinent; loci vero mutationem, & sexcenta alia, quæ eam turpitudinem non ostendant, passim expetunt, & effragitant. Ceterum à fructibus
corum

eorum cognoscetis eos : cum enim interna leuiter eurent, in exteriora se totos effundunt. Ne vos horum contagio infici patiamini, sed maturę mentis, inuictę patientię, & virilis constantię signa præferte.

Monachi diuinę voluntatis explendę, perfectionisq. parandę cupidi, dum distincta cęnobia mente perlustrant, debent secum ita pacisci : Deus hæc loca discreuit, non secus, ac dum constituit terminos populorum, iuxta numerum filiorum Israel, quando diuisit eis terram in funiculo distributionis. Si ergo Deus lineam duxit, si loca ipsa mensus est, si distinxit : partes nostrę sunt, diuino consilio acquiescere, nec extra metam nobis præfixam consilio humano recedere. Hęc si præstiteritis, non dubium, quin in sorte quisque sua cōsistens maiora Dei beneficia recepturus, auctiora merita cumulaturus sit. Hinc etiam existet firmior, & permanētior pax, animo nihil terrenū ad solatia captanda experiri, sed in æterna bona suspirare nitente. Nullam ergo mutationem meditamini, nisi illā, quę est calamitoso exilio in dulcissimam patriam, in Ciuitatem videlicet Dei, peracto mortis agone, transferendi estis. Hęc bene percipite, & in supernam Ierusalem, per arctam viam, obedientię ductu contendite.

Deut.
32.
Pl. 77.

TEXTVS QVARTVS.

De Cellis Fratrum.

Praterea iuxta situm loci, quem inhabitare proposueritis, singuli vestrum singulas habeant

habeant cellulas separatas, sicut per dispositionem Prioris ipsius, & de assensu aliorum fratrum, vel sanioris partis eadem cellulae cuique fuerint assignatae.

Observatio thematum, quae ex hoc textu deduci possunt, ad exhortationes solitas.

Posset differi de bono cellae separatae. Deinde agi posset de instructione cellae. Singula persequamur.

Exhortatio de bono Cella separatae. Cap. X.

Cellarum discretio, uti res planè gravis, & ad monasticæ disciplinae fructum peropportuna, hoc textu praescribi debuit. Etsi verò discretio hæc maior olim fuerit, & celebrior, quam arte hac, modò tamen ad antiquitatis imitationem, in locis eremiticis cellae per intervalla extruuntur; & in cœnobijs, ubi solo discernuntur pariete medio, ea disciplina in hoc genere observatur, quæ ab eremitica non longè recedit. Quæ propter doctrinam de bono cellae separatae communis erit, quæ pro separationis diversitate pondus habebit.

Primum ergo, caelesti cōsilio factum credimus, ut separatio præciperetur, ob immensum bonum, quod inde provenire certis experimentisprehendimus. Et quidem, quod ad divinæ maiestatis cultum attinet, benè coniiciunt, qui sentiunt, cellas in claustris structuras discretas à monachis inhabitari.

habitas referre mirabile illud fauorum opificium architectonicè in cellas diuifum, & fuauiſſimi liquoris ſaporis oppletum, quo ita Clementiſſimus Deus delectari videtur, ac opera apum alueorum curator, cui totum deſtinatur mellificium. Quòd verò ad monachum quemq. ſpectat, vix exprimi poſſit, cella ſeparata quàm ſit bonorum ſerax, quod è ſubiectis rationibus cenſetè.

Ratio prima. Vulgatum eſt illud, quod iam in prouerbiũ verſum eſt. (Pax in cella.) Cùm ergo creaturæ vniuerſæ pacem inquirant, & Deus monacho modum pacis inueniendæ in aſſignata ſibi cella clementer oſtenderit, errabit ille perfectio, ſi cellæ bono frui detrectauerit.

Ratio ſecunda. Monachi perfectionis auidi experientia conuicti fatentur, ſe extra cellam, alios eſſe ab ijs, qui intra cellam ſunt, culpaſq. multas reſeſſu illo ſe vitare animaduertunt: atque adeò quàm citò poſſunt, à negotijs ſe ipſos expediunt, vt ad cellam, tanquàm columbæ, in ſua receptacula redeant. Quid ergo de minùs perfectis cenſebimus, quibus crebrior, & faciliør lapſus, tardior, & tardior reſiſiſcentia eſt? Quàto citius hi ad cellam ſe recipere deberent?

Ratio tertia. Fructus, qui ex reſeſſu prouenit, multiplex eſt, ſi exercitia ſpiritualia, quibus more noſtro vacandum eſt, contemplemur, Cuiuſmodi eſt oratio, pia lectio, ſcriptio, genuflexio, proſtratio, & huiuſmodi alia, quibus merita multa in cella parantur. Si ergo ſerue perfectionis deſiderium, media hæc tam opportuna ſine ſtupiditatis nota negligi nequeunt.

Porro

Però magnus cellæ prouentus est.

Ratio quarta. Spectato actuum nostri instituti contextu, vel ipsa commoditas cellæ amorem deberet inducere. Multò enim esset laboriosior disciplina nostra, nisi alterna cellæ quiete labor actuum communium temperaretur. Intercalata verò quies adeò moderata est, ut recessus ille sui potius appetentiam, quàm fastidium pariat, si qua perfectionis monasticæ æstimatio subsit. Cur ergo non optetur? cur non exquiratur?

Ratio quinta. Quanti sit ponderis cellæ bonum, ex eo perspicitur, quod nostræ salutis inimicus importunè, & grauitèr ad exitum urget, Nouit enim ipse, quæ damna ex recessu patiatur, quæ lucra exitu conquirit. Si ergo hostis nocendi cupidissimus tantopere exitum suggerit, necessario asserendum est, illam cellæ custodiam momenti maximi esse.

Ratio sexta obseruata instituti nostri ratione, ac rei examine identidem factò, constat eos, qui in cellis parum latere, indeq. frequenter egredi assuescunt, & cultura spiritus modicè proficere, & alijs quodammodò exosos fieri. Quod æquo Dei iudicio eis rependi videtur, quòd rem sanè pretiosam non magni faciant. Bonum ergo consilium est, in cellæ statione persistere.

Ratio septima. Quieta illa cellæ custodia tam est fini principali instituti nostri, contemplationi nempe, consentanea, ut vix credi possit, aliquem e nostris ad finem, quò vocatur seriò tendere, & cellam nò impensè amare, quòd ità per se notum videtur; ut id rationibus asserere superuacaneum sit. Si

fit. Si ergo potior instituti nostri finis animo hæret, & animus cellæ adhæreat, necesse est.

Ratio octava. Illustres in cella victoriæ à monachis veris desidiâ, & torporem executientibus comparantur, spectante Deo palæstram, & præmia cumulata decernente. Eoq. victoriæ illæ tutiores sunt, quò ab hominum conspectu exemptiores. Quin & oratio ipsa, iuxta consiliû Evangelicum, ostio clauso, intra cubiculum Deo animorum cognitori oblata, purior, & acceptior esse solet. Quid ergò prætexit, qui cellæ bonum, lentè diligit.

Ratio nona. Monachis in cellâ abditis à Deo internæ latitiæ oleum dignatione multa solet instillari, quo fessi recreantur, & exhilarantur felicius, quam oleo materiali vidua illa, quæ ostio clauso de consilio Elisei vacua vasa demum explevit. Cur ergo nos ipsos, in cella clausa, huic celesti refrigerio, non aptare curemus?

Ratio decima. Quàm sit eximium cellæ bonum, tam est per se exploratum, ut ab ipsis secularibus propemodum cæcis fidem æquirat. Ij quippè, (quod nobis notum est) in claustra monachorum in cellis sine vlllo strepitu latentium, ingressi vehementer admirantur, quòd tot homines alijs natura similes longas cellarum serie in recessu quisque suo, quiescant, quòd natura horrere videtur. Qua ex meditatione alta trahunt suspiria, & vim lachrimarum effundunt, quasi recessus ille è petris aquam eliciat. Si ergo seculares cellæ bonum, quasi diuinum quiddam demirantur, cur monachi id non extiment? Cur

F non

non in Christi militia, in decreta sibi statuta
permaneant?

Multa satis argumenta congeessimus, quæ ad
cellæ amorem parum etiã pios animos excita-
rent. Quid autem de piorum motione subijciam?
Vos, patres, pietatem colitis, & instituti nostri
amore capti estis. Vos ergo appello, & rogo, an
memineritis sanctorum, qui in spelûcis, & cauer-
nis terræ vitam duxerunt, subtrahentes se varijs
solicitudinibus, ut exactius de grauissima æternæ
salutis causa coram diuinâ maiestate agerent?
Porro si causæ huius pondus dignè perpèderetur,
credo equidem, multa millia, quæ modò per pla-
teas otiosè vagantur, se se reciperent, & secretis-
simas eremitarum cellas, vel antra peterent. Si
enim, ubi aliqua cœlestis inspiratio ab eis perci-
pitur, molliuntur, & se in oratoria abdunt; quid
rogo efficerent, si sensus ille Dei diutius perma-
neret? Cum ergò vos Dei sensû nacti sitis, & diu-
turna meditatione vestræ salutis causam æstima-
re noueritis, quid superest, nisi ut apicularû mo-
re, vos intra cellas condere, & spiritali mellifi-
cio operam nauare pergatis? Explorete vos ip-
sos, qui meliores non estis Theodoro, qui expe-
rientia conuictus, monachû extra cellam, alium
ab eo, qui in cella foret, alium inquam non san-
ctiorem, non feruentiorem fzebatur. Omnia cir-
cumspicite, omnia mutuo conferte, & facile ani-
maduertere poteritis, in vnoquoque cœnobio
eos, qui fideiiores cellæ custodes sunt, spiritu fer-
uentiores euadere, & cœlestibus donis cumulâ-
tis augeri. Res tam còperta est, ut nolim alios,
quàm

Calli-
nus col-
lat. 6.
c. 20.

quàm vos ipsos testes accire . Sentietis nonnumquam quendam velut pruritum leuiter exeundi, ipsaq. pigritia causas exitus apparenter iustas depinget : verum ne credite : ignauiam excutite, & paulò post imposturam deprehendetis .

Cella nidus est, non auium rapacium, sed initium, vbi necessario volatu fessæ requiescunt . Nidum repetite, nido vos auidè inferte . Expendite columbam, quam emisit Noè, quæ postquam prolixo volatu longum tractum peruagata est, cum non inuenisset, vbi pes eius requiesceret, in arcam se se recepit pascenda, & captatura quietem . Hæc cogitate, certoq. statuete, neque quietem, neque pastum vos extra cellam errantes reperiuros . Inuenietis fortassè cadauera putria ad pastum, & arborum ramos inconstanter aquis insidentes ad infessum, vt columba illa : ceterum, salubria esculenta, & firmam sedem minimè comperietis . Quiescite ad pedem scalæ, quæ à cella in cælum expeditum, ac facilem præbet ascensum, vt sapientum benè librata consensio est . Scalam aspiciate, & anagogicis cordis motibus, è profunda lachrymarum valle, in qua versamur, in editissimum Dei montem, pinguem, & coagulatum ascendite .

Exhortatio de ratione cellæ instruendæ .

Cap. X I.

Qui cellam vnicuique seorsim assignari iussit, eo ipso cellam necessarijs rebus instruendam præscripsit . Quæ quidem in re, mi-

rum est, quàm sollicitè nostræ salutis hostis disciplinam monasticam labefactare contendit. Ipso quippè necessitatis titulo honestatem præferente abutitur, ut multa persuadeat, quibus à primæuo sanctorum more nos demum auertat. Ex quo efficitur ut cellæ monachorum lentescere incipientium, rebus multis saltem inutilibus instruantur, quas interdicere oporteret. Succurrit illud, quod Machabæi fecerunt, ubi in atrio templi virgulta tanquam in saltu nata conspexere, quibus auulsis locus sacer expurgatus est. Quia verò nullus expurgandi modus optabilior videtur eo, qui spontè nascitur, rationibus subiectis suadebimus, cellas nostras modestissimè instrui debere.

Ratio prima. Cellæ nostræ, & oratoria, & cellæ sunt, quod è communi omnium sensu patet, cum non minus orationi, quam captandæ quieti destinentur, quod bonorum monachorum usus euincit. Si ergo locus sacris vsibus dicatus est, facile perspicitur, quàm sit indecorum, res ibi inutiles, superfluasq. reponere, quæ seculi odorem siue foetorem exhalant.

Ratio secunda. Quicquid ultra sacram imaginem, lectum, mensam, sedile, paucos libros, lucernam, scopam, quæ sufficiens est monachi suppellex, admittitur, perfectis monachis idolum quoddam videtur esse, quod in loco sancto, aduersus diuinæ maiestatis cultum, statuitur. Consideret ergo, qui alia curiosa, vel inutilia congerit, quantoperè à cōmuni exhorbite consuetudine, & illud monasticæ idololatriæ genus perhorrescat, si fructum è cella referre cupit.

Ratio

Ratio tertia . Res nulla, quantumvis exigua , præter eas, quæ parçitati monasticæ consentiunt, pacata conscientia in cella retineri, vel admitti potest : neque enim prælati id indulgent, aut iuste concedere possunt . Si ergo aduersus obedientiæ mentem , nihil conscientiæ prodesse credendum est; quid monachus cogitat, qui in cellam quicquam insolitum, aut superuacaneum infert ?

Ratio quarta . Certis experimentis nouimus, monachos propriæ conscientiæ curam gerentes, ferre non posse stimulum, quo lacerantur, si vel papyri folium minimè necessarium in cella videant ; libētiusq. eos dæmonis præsentiam, quàm paruam eiusmodi rem instituto suo dissētaneam perlaturus, cum præsentia dæmonis absque illorum culpa, rei verò illius minimæ receptio vel retentio, non absque illorum consensu, ac proinde non sine culpa contingat. Hoc itaque experti sumus. Quomodò ergò alij adeo oscitāter hæc prætereunt, neque vllò infestantur scrupulo, si quatuor, sex, aut decem superfluas res, quas dicunt minimas, in cella se habere sciant ? Quomodò somno indulgent, cum sciamus alios non posse requiescere, nisi priùs rem quamlibet, tametsi minimam, disciplinæ nostræ aduersam ad prælatum deferant ?

Ratio quinta . Solent monachi tepidiores voluptatem capere è thecis reliquiarū affabrè elaboratis, ex minio tinctis imaginibus, è crucibus odorati ligni, vel colore aliquo natiuo splendentibus, è forficibus hoc, aut illo modo aptatis, è breuiario sic vel aliter tecto, & ex id. genus alijs,

quibus cellas instruunt, obliti simplicitatis, quam profitentur. Certum est autem, harum rerum sollicitudine verarum virtutum studium languescere experientiaq. constat, imperfectos monachos graviter mœrere, si res illa eis subtrahatur, quod est immoderati amoris argumentum. Accedit ad hoc perfectorum usus monachorum, qui similia proprii amoris fomenta, neque in cellis reponere, neque admittere assuescunt.

Ratio sexta. Quò pauciora, & vscatiora quis habet, eò minus eis hæret, eoq. spiritus libertas maior est. Cur ergo libertas pro nullius momēti rebus in discrimen adducatur ab ijs, qui è mundi servitute clementer erepti sunt?

Rationes, quas protulimus, credo equidem, vobis probantur, ut nulla apud vos in cellis anathemata latere patiamini, quæ diuinæ oculos maiestatis offendant. Perfectò timorati monachi, si fortè, quod accidere solet, quippiam superfluum in cella indeliberato actu reponat, aut retineant, statim ac animadvertunt, tanquam scorpionem, aut basiliscum aliquem eiiciunt. Rem quippè, quod ad conscientiam spectat, venenatam esse sciunt, cuius proinde aspectum formidant. Quin etiam ubi dubium eis videtur, an ex ijs, quæ in cellis iamdudum posuere, quicquam necessarium sit, tanquam contagiosum repellunt. Quid vero in hoc genere subtexam? Prælati ipsi suspectam habentes subditorum fragilitatem ex officio cellas explorant, & paucula quædam fide non prorsus mala in usum accepta refecant, ne ut cellæ separatæ sunt, ita res illæ minimæ, quæ alijs deferuire

uire possunt, à communi usu separentur, & ad
vnius cellam instruendam conferantur. Profectò
si Dei sententia spectetur, quæ per regulam nobis
innotuit, cellæ separatio commendatur: at cum
vita imperetur communis, & è communibus of-
ficinis omnia necessaria promantur, aptè deduci-
tur, vt ad cellas instruendas paucis opus sit. Si
verò sententia hominum quicquam momēti ha-
bet, satis constat, viros cordatos, & cœnobiticę
disciplinæ consultos non boni consulere cellarum
ornatum, sed simplicem dispositionem, ac mun-
ditiam. Quin & quò supellex pauperior, & mino-
ris numeri est, eò eis pretiosior videtur, & maio-
rem sanctitatis opinionem ingenerat. Cellas er-
go, patres, nō rebus superuacaneis, sed pijs exer-
citijs, & lachrymis, ex concepta peccatorum,
pœnitundine fluentibus instruite, & affectum va-
rijs irritamentis excitatū compescite. Nunc san-
cti se ipsos exonerant, & in cellis, velut in diuer-
sorio inopi manent, beneq. est, vt quatuor parie-
tibus nudis sepiantur, quibus ea merces reddend-
a est, vt exultent, in gloria, & latentur in cubi-
libus suis. Sedulus viator non ornata, vel super-
flua, sed necessaria quærit: vnde & nos, qui fu-
turam inquirimus, doctrinam eandem debemus
amplecti. Arctus, & parùm instructus, fuit car-
cer Iosepho, ceterum præclarè res illi cessit, qui ad
amplam & satis instructam regis Aegypti aulam
eductus est. At quorsum ego Iosephum comme-
moro? Recolite potius Christum, eiusq. purissi-
mam genitricem, & quàm parùm instructam do-
mum incoluerint, obseruate.

Historias legite, & exemplum domus ex Illyrico in lauretanum agrum ab angelis illatae contem-
plamini, quod animos caelesti luce perfusos admi-
ratione suspendit. Sanè inopia illa domus tam
exigua, ac parum instructa, quam Unigenitus Dei
filius inhabitare decreuit, tepidis monachis acris
reprehensio, feruentibus acerrimum calcar est.
Onera ergo superuacanea exemplo tanto per-
moti deponite, & ad caelestes opes alacres, ac ex-
pediti viam carpite.

TEXTVS QVINTVS.

De communi refectiōe.

ITa tamen, quod in communi refectorio, ea quae
vobis erogata fuerint, communiter aliquam
lectionem sacra scriptura audiendo, ubi commodè
poterit obseruari, sumatis. Nec liceat alicui fra-
trum, nisi de licentia Prioris, qui pro tempore fue-
rit, deputatum sibi mutare locum, vel cum alio per-
mutare. Cellula prioris sit iuxta introitum loci, ut
venientibus ad eundem locum primus occurrat, &
de arbitrio, & dispositione ipsius postmodum, quae
agenda sunt, cuncta procedant. Maneant singuli
in cellulis suis, vel iuxta eas die, ac nocte in lege do-
mini meditantes, & in orationibus vigilantes, nisi
alijs iustis occasionibus occupentur.

*Observatio thematum, quae ex hoc textu peti
possunt, ad exhortationes solitas.*

AGi potest primum de disciplina in refectorio
obseruanda. Mox de cautione illa, ne locus
iniussu

iniussu prioris mutetur, & de cella illius primo in loco sita, & omnium dispositione illi credita, quæ tria ad unum thema redigi possunt, scilicet ad hoc, ne quis curam rerum Priori creditarum usurpet. Denique de perpetuo orationis studio intra cellas & extra. Singula expendamus.

Exhortatio de disciplina in cœnaculo seu refectorio obseruanda. Cap. XII.

Permulta sanè antiqui vitæ monasticæ institutores de cœnaculi disciplina tradiderunt, quæ in Congregatione nostra diuino munere coaluisse perspicimus: quæ ut felicius crescant, erit ad rem, ut de tanti ponderis capite appositè ad praxim differamus. Et primum quidè intemperantis monachi deformitas ob oculos ponenda est, ut id monstrum horrentes, in eam, quam à maioribus nostris accepimus, formam exactius conspiremus.

Tria sunt, quæ monachum in cœnaculo deturpant, alienatio mentis à sua lectione, ingluuies, siue voracitas, & incompressi gestus siue immodestia, quibus ita se deformem, ac exosum efficit, ut vix à temperantibus, & modestis ferri possit. Non accumbit præmeditatus, non sibi metam ullam præfinit, & incompressis obtutibus, manuum, & totius corporis motibus, edacitatis vitiū prodit, & solam saturitatem, ceterasque gulæ partes, quicquid alij iudicent, se affectare demonstrat. Contemplamini nunc monstri huius turpitudinem: contemplamini, & exhorrescite.

Ut au-

Ut autem graue hoc malum procul arceatur, tria remedia presentanea in promptu habenda, & admoenda sunt, attentio videlicet ad lectionem piam, gulæ correctio, & modestia, è quibus primum spiritui, secundum corpori, tertium proximis debetur. Quanti vero ponderis hæc tria sint, è subiunctis rationibus patebit.

Ratio prima: Lectio pia à sanctis in morem inducitur, ut spiritus alatur, & homo dum corpus reficitur, in duas velut sectus partes, minus capiatur cibi voluptate, qua illectus facile metam excederet, nisi remedio illo in officio contineretur. Confert quippè lectio sacra ad multiplices cordis motus excitandos, quibus velut ex acutis gladijs intemperantiæ capita præciduntur. Non ergo congruit sanctorum instituto, qui à lectione in cœnaculo sponte diuertitur, tanquam si in diuersorio cum secularibus veleretur.

Ratio secunda. Familiare est monachis nostris à cibo extra horas cōsuetas abstinere, atque adeò non absque necessaria causa cœnaculum petunt. Quò ergo iustior causa suppetit, eò facilius animus causæ fidens seducitur, ut appetitui laxet habenas. Debet igitur monachus se comparare, & presenti lectionis remedio uti, ut vehementem cupiditatem moderetur, & sine edacitatis culpa naturam sustineat.

Ratio tertia. Antiqua nobis experientia constat, in cœnaculis nostris, maiorem plerumq; piorum affectuum, & lachrymarum prouentum, quam in oratorijs extitisse, ob attentionem pie lectioni præstitam, ut opus fuerit animum à lectione rari-
rillum

tillum diuertere, ne importēs affectus necessarium cibum adimeret. Quàm ergo degeneres essent, qui modò cursu contrario animum lectioni ad-mouere nollent, & se in corporis pastum belluarum more totos effunderent?

Ratio quarta. Ex præmeditatione successuri gulæ conflictus, & præsentis lectionis occasione, monachi nostri perfectionis cupidi clariores in cœnaculo victorias; quàm in ciliciorum, catenarum, & verberum exercitio comparare solent, multa sibi sine valetudinis damno subtrahentes, quibus gula irritatur acrius, vt multiplicem hostiam Deo sacrificent. Quàm ergò longè à fortium Christi militum consuetudine recederet, qui cœnaculo ad pastum sine alia monastica disciplina, & lectionis æstimatione abuteretur?

Ratio quinta. Anima bene disposita, & spiritali pastui intenta incompósitos motus, deformesq. gestus minimè parit. Quid ergo sentiamus de ijs monachis, qui omnia in cœnaculo lustrant, caput huc illuc torquent, signò vix expectato map-pam celeriter explicant, apertis inmoderatè appetentię signis cibos ori ingerunt, nec vnquam se expleri demonstrant. Profectò hi hæredes Esau pro pulmento vno spirituale patrimonium venundare velle videntur.

Ratio sexta. Diuino consilio in Congregatione nostra vsus percrebuit, vt inter vescendum varia mortificationum genera exerceantur de prælati venia, hoc surgente, vt ei vnusquisque è toto confessu alapam vnâ impingat, alio genibus flexis singulorum pedes osculante, alio in terram pro-

cum-

cumbente, vbi pane dumtaxat, & aqua reficitur, alio genibus flexis tergo nudo, sensimq. verberato in medium cœnaculum ingrediente, & culparum veniam precante. Hæc scilicet varia mortificationum genera ad appetentiam coercendam, motusq. corporis moderandos, & spiritum alendum opportunissima sunt. Cùm ergo tot habeamus ad bonum cœnaculi vsum prouisa remedia, quis non iudicet eum, qui nihilò seciùs eo loco abutitur, se non tam monachum, quàm secularem hominem intemperantiæ nota infamem exhibere?

Ratio septima. Tot suppetunt recentia nostrorum exempla ad persuadendum monasticum refectiois vsum, vt antiqua requirere opus non sit. Certò quippè nouimus, alios, vt cibus saporem, adimant, modicam instillare aquam, alios fellis Christi memores absynthij pulueres inspergere, alios dum panis canistra circumferuntur, duriora semper fragmēta seligere, alios vix paucas vini guttas aquæ admiscere, alios interim dum comedunt, alterum pedem à terra subleuare, vt molestia illa vexati escarum sapore minùs delectentur. Hæc apud nostros, qui generosè certant, exerceri nostis: quæ spiritualia quædam inuenta sunt ad cœnaculi vsum piè temperandum. Ex quibus profectò liquet, locum illum sanctis semper fuisse suspectum, quandoquidem tot machinas in Christi militia excogitarunt ad gulam expugnandam, & abstinentiam in quotidiana refectioe colendam. Quid ergo dicendum de ijs, qui inter tot munimenta fragiliores euadunt, & velut animales homines, ea, quæ sunt spiritus Dei non magis percipiunt,

cipiunt, quàm si in seculo inter intemperantes versarentur?

Ratio octaua. Qui è nostris cœnaculo abuteretur, reprehensione videretur dignior, quàm alij lauta esculenta naſti, cum excessus ille non gulę irritamentis, sed vitio gulę verteretur. Peior quippè, & vehementior fames est, quæ ad rudes cibos vorandos, quàm quæ ad delicatos perurget: ardentior item sitis, quę in aquam turbidã, quàm quę in pocula suauia hominem impellit. Quid ergò prætexet monachus, cuius animus cœnaculo sterili totus hæret, ibiq. sui compos non est?

Ratio nona. Potior instituti nostri pars est contemplatio, ad quam quò quis melior est, cò constantius aspirat. Cum ergò omninò comperitum sit, vitio gulę mentem hebetari, & à rerum cœlestium studio, ad cõmunia cum animantibus rationis expertibus oblectamenta diuerſi, quis è nostris in cœnaculo se non temperanter geret? Profectò corpus cibis licèt rudibus immoderatè grauatum deprimit animum ne spiritualia sensa concipiat. Aut ergo frugaliter agendum, aut à principali fine nostro desistendum est.

Audistis, quàm sit decorum, & instituto nostro debitum in communi refectionis loco, vbi ex regulę præscripto conueſcendum est, disciplinam à sanctis traditam retinere. Reliquum ergo est, vt eam accuratè obseruetis, & pro communi ac priuato cuiusque veſtrũ bono temperantiam ibi colatis. Cur enim virtutem maiorum non emulemini? An non suppetunt arma, & satis firma munimenta? An veſtra non interest, in quotidiano
prælio

prælio victoriam meditari? Non agimus de victu necessario subtrahendo, sed provide ministrando, nec tam sumus austeri, ut cum valetudinis damno severam disciplinam suadeamus. Non fert animus, id monere. Quin etiã nec veniam tantam impartiri cogitamus, quantã multi exoptant quorum postulata, satis accepta diuinæ maiestati sacrificia sunt. Mitius ergo vos habere, consultò volumus. Hoc dumtaxat hortamur, ut quod turpe, ac noxium est, vitetis, & cibum, potumq. congruentem spirituali sensu, & multiplici cum merito sumatis, ac in rebus saltem minimis appetitum compescere memineritis. Quod ut efficiatis arrigite cordis aures, & lectioni sacræ vestri partem offerte. Sermo enim Dei viuus, & efficax, & penetrabilior omni gladio ancipiti, pertingens ad diuisionem animæ & spiritus, præstabit hoc, ut sectio quædam arcana fiat, & pars vestri nobilior suo quoque alatur pastu, interim dũ corpus proprio suo nutritur. Ne spiritus nutrimentum respuatis. Tempus breue est, mundus trãsit, & concupiscentia eius; virtutis fructus æterna stabilitate perstabit. Quod si, ut ignaui prætexunt, corpus eneruetur, tantumdem roboris, aut magis multò spiritus acquireret, maiusq. multo lucrũ esset, quàm detrimentum. Quid enim damni iacob ex luctu claudicans retulit, qui cælesti benedictione prosperatus est? Luctamini & vos, neque iactum aliquem cæcum formidetis, ut clementissimus Deus augeat animi vires, & felicius cælestia bona refundat.

*Exhortatio de cura rerum Priori creditarum
non usurpanda. Cap. XLII.*

INter alia, quæ in lecto regulæ textu, iuxta sanctorum doctrinam, pensitari debent, meritò reponitur cautio illa, ne quis cellam sine superioris venia mutet, aut permutet, illudq. subiunctum, ut Prioris cella sit iuxta introitum loci, ut primus venientibus occurrat, & prudenter cuncta disponat. Ex quibus profectò verbis liquet legislatoris mentem fuisse, omnium rerum ad cœnobium iam conditum attinentium providentiam, & expeditionem ita Priori credere, ut monachi nihil sponte sua attentarent, aut se negotijs iniussi vnquam ingererent. Hic regulæ sensus syncerus est, cuius congruentia licet se satis manifestè spectandam exhibeat, humana tamen fragilitate, quæ non sine multo conatu à claustris extruditur, factum est, ut in florentibus quoque ordinibus nonnulli seioli, & lenti suarum passionum domitores, plerisque in rebus prælatorum officium antevertere, & multa sine illorum concessu moliri contendant. Cui certè malo, ne nostræ Congregationi officiat, occurrendum est, ut ex rationibus his cēfere poteritis.

Ratio prima. Indecorum est, ut membrum aliquod capiti subiectum auctoritate priuata capitis munus obire velit. Eo quippè ipso, qui à Deo probatus est ordo inuertitur. Cum ergo Superior capitis, subditus verò membri subiecti loco sit, satis patet, curā ab eo anticipatā ordini aduersari, & ut leuiter interpretemur, minimè decoram esse.

Ratio

Ratio secunda. Modicę humilitatis argumentum est, velle subditum prudentiæ, aut alterius congruentiæ titulo, quicquam à prælato non iunctum aggredi. Quomodò aggredieretur, nisi prælatum non magni faceret? Quod si facit magni, cur non veniam poscit? Certè aut violatę humilitatis, aut obedientiæ neglectę, aut duplici culpa innexus est.

Ratio tertia. Licet res, quam subditus efficere properat, ex genere honesta foret, eo ipso fœdatur illius procuratio, quod ei deest obedientię honestas, quę inesse debuit. Si ergo res honestę sine superioris nutu factę fœdantur, quid de indecoris, aut parum decoris arbitremur?

Ratio quarta. Imprudentiæ, ut minimum, nota est, incio prælato quicquam ordiri, quod nescitur, an ab eo, ubi id rescierit, probandum sit. Quod si excipiat, totum clam prælato absolvendum esse, peior sanè nota est, quę non ad imprudentiam tantum, sed ad continuatam obedientiæ transgressionem refertur. Quid autem boni contingat ei, qui hisce fraudibus se ab obedientiæ ductu subtrahit?

Ratio quinta. Qui ante obtentam veniam negotia inchoat, ipse sibi laqueum tendit, quo capiatur. Seculares enim bona fide quod monachus attentat, interpretantes, id plerūq. prælatis apeririunt, de ipsorum venia factum arbitrati. Quod cum ita non sit, si prælati dissimulent, fraude deprehensa de illo malè opinantur, & in posterum ei minimè fidunt. Si autem simulare nolint, apud prælatos ipsos, & seculares monachus iam malè audiet.

audiet. Mirumq. videtur aliquem mentis com-
potem, ob res satis leues, quales esse solent, quæ
prælati cęlantur, velle bonũ nomen suum pericu-
lo exponere. Satiũs est, oraculũ primò consulere.

Ratio sexta. Monachi parũ fideles ideò te-
las ordiuntur sine prælati scitu, quia varie de re-
bus opinantur, & suam sententiam præponi cu-
piunt. Quod vt efficaciter obtineant, antequam
cum prælato conferant, fundamenta iaciunt, quæ
ille aut nullo modo, aut difficulter possit amoliri.
Cęterum quam sit hæc præpropæra sollicitudo ex-
tra monasticam disciplinam, hoc argumẽto con-
uincitur. Monachus hic in opinionũ campo ver-
satur: at vbi opiniones diuersæ sunt, & prælatus
in alteram partem propendet, ex communi sen-
tentia, subditus ei cedere debet: non ergo bonam
mercaturam exercet, qui ideò anteuertit officia,
ne prælati sententiã præualeat.

Ratio septima. Si expertis fides habenda est,
frequentius monachi parum spirituales errant,
quod se prælati curis immisceant, quàm quod ei
curas proprias deferant. Qui ergo ab horum con-
sortio procul abesse desiderat, enitatur, quoad
poterit, vt iuxta regulæ sensum, ac verba de supe-
rioris arbitrio, quæ agẽda sunt, cuncta procedant.

Quid iam monendum? Quid à vobis præstan-
dum est? Recolite historiam illam Euangelicam
Petri Christum sequi admoniti, bonoq. animo de
Ioanne rogantis: Domine hic autem quid? Ex-
pendite pium Petri animum. Expendite parcam,
& nihil deforme præferentem interrogationem.
Et tamen responsum est ei: Quid ad te? Tu me

G

sequere;

sequere; quod perinde est, ac si Christus dixisset : Petre, Ego præsideo: vestri cura mihi à Patre meo demandata est : quorsum ergo hanc tibi curam vendicas ? Hoc ergo ipsum monachus sibi responsum credat, si Christi ei schola placet . Priorum cura commissa est : quid ergo ipse querit ? Cur se negotijs implicat ? Et quidem, licet hoc tam luculentum exemplum deesset, ipsa mentis maturitas, ipse pacis amor, ipsa obedientiæ fidelitas, quod hortamur, exigeret . Nimirum levitatis signum est sollicitudo illa ante tempus opportunum, secularium more, rebus impensa, quæ & discordiæ semina iaciuntur, & modica erga prælatum fides ostenditur . Vtinam sensus regulæ à multis expleretur ! Profectò iussio illa, ut Prioris cella extruatur propè introitum loci, ut venientibus primus occurrat, gravis sanctio, & perfectionis monasticæ complexio quædam est . Dicitur, rogo, si nemo è vobis venientes alloqui auderet, & humanis rationibus explosis ad superiorem omnia referret, veritus ne legem violaret, quàm longe absisteret ab ijs malis, quæ in rationum contextu recensuimus ? Quantò esset laude dignior, Deo, & hominibus acceptior, qui nihil negotij quantumvis pij, se tentare velle sine prælati iussu fateretur, quàm qui se obtentu etiam pio, sine venia negotijs intruderet ? Non estis adeo cæci, ut non liquidò perspiciatis illum hoc iustiorum, ac prudentiorem esse : illum honestissimam excusationem è proprio statu ortam obtendere, hunc non aliter agere, quàm si obedientiæ voto non esset ascriptus . Stultum est sanè, nolle pacè à

Deo

Deo concessa frui, & spinas ferere, quibus imprudens laceretur fator . Reijcite alienas curas , & quandiū licet, cogitatus omnes in Deum iactate . Hæc est pars libertatis vestræ nõ exigua . Hac ergo frui pergitte, & in æternā libertatem suspirate .

Exhortatio de perpetuo orationis studio .

Cap. XIII.

V Erba regulæ , quibus cellarum custodia , & perennis oratio nobis præcipiuntur, digna planè sunt , quæ animis vestris non ad ære ferro, sed suavi Dei spiritu imprimantur . Sunt enim legi gratiæ, & noui testamenti suauitati mirificè consentanea . Duo verò capita complectuntur, è quibus vnum, quod ad cellæ amorem pertinet , superius, vbi textus id exigebat expensum fuit ; alterum quod ad iugem diuinæ legis meditationem spectat, nunc digerendum est . Principiò ergo sensum capite . Animus quippè legislatoris est , siue in cellis, siue iuxta eas, vbi eremitico more separantur , monachum diuinis rebus intentum esse, debere, ac in ea animi intentione, quoad humana fragilitas fert , vbique persistere, nisi occupationes iustæ à prælatis iniunctæ orationem interpellent . Hic communis ac germanus sensus est : qui quam sit, vti præmisimus, noui testamenti suauitati consonus , ex eo liquet, quòd in lege gratiæ plurima vtriusque sexus millia, curis omnibus generosè despectis, in hoc incubuere, vt mentem in Deum semper intentam gererent , & casta diuini amoris oblectamēta alto mundi cōtemptu requirerent.

rerent. Quanti vero ponderis sit huiusmodi præscriptio, ex rationibus subiectis animaduertite.

Ratio prima. Ciuitas, quæ obsidione crudelium inimicorum cingitur, nocte, dieq. peruigilat, omnesq. vires exerit, ut auxilium ab ijs, qui illud ferre valent, obtineat. Res comperta est vniuersis, sed ijs maximè, qui obsessi fuerunt, & exploforum tormentorum crepitum cum subitanæ mortis formidine horruerunt. Quàm verò certum, vulgatumq. sit, nos ab hostibus sæuissimis obsideri, ex quotidiani officij monitu illo pater: Sobrii estote, & vigilate, quia aduersarius vester diabolus circuit quærens, quem deuoret. Verba profectò hæc tam crebrò repetita, quam raro pro dignitate perpenſa, ea sunt, quibus aptiora in excubijs militaribus, instante prælio cogitari non possunt: quæ à sponsa Christi Ecclesia irruptionem formidante, ac salutis filiorum sollicita ante solis occasum, quotidie enunciantur. Si ergo absque intermissione obsidemur, & pericula tremenda, perenniter imminet, quid magis appositum, ac salubre, quam perennis oratio, & indefessa auxilij cælestis imploratio?

Ratio secunda. Tametsi externi hostes in nos impetum minimè facerent, corpus ipsum, quod corrumpitur, aggrauat animam, & bello intestino infestamur, ut congruat etiam monacho Apostoli sensus ille, Mente seruiſſe legi Dei, carne autem legi peccati. Si ergo intra nos bellum perene geritur, è quò nisi ope cælesti victoria reportari nequit, iudicet quisque vestrum, quàm sit opportuna perennis oratio, ne corpori succumbat.

Ratio

Ratio tertia. Occurrunt crebra negotia, quæ solo humanæ providentiæ ductu non satis feliciter expediuntur, & quò quis oculatior est, eò cernit apertius, necesse esse, lucem è cælo precari. Quin etiam ipsi quotidiani actus non sat fructuosè exercentur, si langueat studium perenniter orandi, quod, qui rerum diuinarum consultus est, ignorare nequit. Quomodò ergo nos, & nostra, & aliorum negotia pietatis intuitu suscepta geremus, si orationis curam intermittamus?

Ratio quarta. Prætexitur difficultas apparen- ter insuperabilis. Verum si regulæ sensus penitus capiatur, nihil excipi potest. Si enim negotia, quæ vulgò incompatibilia appellântur, puta lectio scholastica, scriptio, & id genus alia, quæ intellectu intento peraguntur, obstant, si ea pietatis gratia, uti decet suscipiantur, præuia directione consueta, orationis vicem gerunt, præsertim si pijs affectibus intercalatis in Deum referantur. Ijs autem exercitijs, siue actibus exceptis, totum id tempus, quod reliquum sit, diuinæ maiestati cur non consecremus?

Ratio quinta. Prætexitur adhuc arduitas. Quomodò enim aiunt, per totum tempus illud orationi vacetur, sine graui capitis decremento? Ceterum prætextus hic in speciem prudens facile reiicitur, si varios orandi modos discernatis. Non enim regulæ sensus est, debere nos meditationi semper insistere, eo prorsus modo, quem statis orationis horis certo partium ordine exercemus: sed mitiore alio modo, qui ex Dei præsentia, & brevissimis, ac intercalatis meditationi-

culis, varijsq. virtutum actibus, varijs item pijs cogitationibus cōponitur, ita vt, quoad fieri potest, monachus semper pium aliquid sine conatu, mente pertractet, nec deliberatē in res alias, nisi ex obedientiæ nutu, animum intendat. Hoc autē modo planē suavi perennitēr orare minimē durum est.

Ratio sexta. Scriptum est, qua hora non putatis, filius hominis veniet, diuinoq. consilio animus noster oraculo hoc suspensus est, ne hora exciperetur vna, qua mortis insultus non timeretur. Si ergo quauis prorsus hora interire, & ad iudicium postulari contingit, profectō horis omnibus Deus iudex orandus, & propitiandus est. Vis rationis huius est planē fortissima, vt hoc liquet exemplo. Qui nauigant licet parūm pij anteacto tempore fuerint, statim ac animaduertūt, se ligno fragili vehi, præsertim vbi cœpit mare tantillum cōmoueri, compendiaria religione oratores euadunt, periculiq. imago menti iugitēr impressa orationis exercitium protrahit. Res omninō perspecta est. Si autem mercatores, ac vectores alios rogetis, cur tam perseverāter orent, respondebunt periculum perseverantēr instare. Cum ergo in horas singulas cuiusvis ætatis funera videamus efferri, nosq. certō sed incerta hora efferendi simus, ac proindē in perpetuo discrimine versetur; quid aliud nobis tam salutare imperari potuit, quā vt perseverantēr oremus?

Ratio septima. Intellectus noster non itā quiescit, vt nihil omninō meditetur. Cum ergo aliquid mente pertractandum prorsus sit, & ope diuina

uina res celestes contemplari, terrenas respirare possimus, mirum videtur, nolle monachum quem piam bonum habere delectum, & fluxarum rerum conceptus æternarum meditationi anteferre. Porro fatuus videretur, qui crystallinum vas prætio multo emptum, quod balsamo imbueri posset, mallet cæno replere. Si ergo intellectum diuinis conceptibus illustrare potestis, cur terrestribus obsecuretis?

Ratio octaua. Licet alia rationum pondera deessent, hoc vnum satis esse deberet, quod maiestas diuina nostræ consuetudinis cupidissima frequentius, quam dici queat, obliuioni ab hominibus traditur, per paucos inueniuntur, qui ei vacare perseveranter velint. Res porro notissima est. Si ergo & ij, qui orationis studium profitentur, pias meditationes leuibus ex causis intermittere, & mentis intentionem crebro relaxare consuecant, Deus in re, quam expetit maxime, à suis creaturis deseretur.

Animaduertite, patres, quid Deo spondere volueritis, ubi solemnia vota iuxta regulam nostram, nuncupastis. Perinde enim egistis, ac si in hæc verba professionem emitteretis: Ego promitto tria solemnia vota, iuxta regulam hanc, per quam mihi imperatur perennis oratio. Rem æstimate, & fideles promissi redditores estote. Consideret quisque vestrum, quid in seculo moliretur, si efficaci vocationis gratia à clementissimo Deo præuentus non fuisset. Quibus nunc rebus vacaret? Quibus negotijs dies, ac noctes impenderet? Hic iurisprudentiæ, ille medicinæ, alius

militiæ se totum dederet, nec exciperet horas, quibus institutum intermitteret, si ex continuo studio honores ampliores, aut lucra speraret. Non ne videtis pictores, & scalptores imaginum, quas fingunt, pulchritudine velut captos, quinas, & senas horas in opere perdurare? Quid iam de agricultoribus promam, qui proni dies integros, vix horam vnâ cæne, aut somni causa interquiescunt? An hi homines non sunt? An labor ille, improbus difficilior non est, quàm iugis morulisq. breuib. intercisa meditatio? Cur ergo monachi rei difficultatem causentur? Ceterùm lentis oratoribus demus hoc, vt labor æqualis sit, dummodo fateantur illi, meritum esse cumulatiu. Si ergo fructus vberior est, cur æqualis labor detrectetur? At maiestas diuinā his ignoscat iudiciis, qui diuturnam eius præsentiam inter molesta reponunt, quasi ex ea cōsuetudine non merita dumtaxat, sed oblectamenta cælestia neutiquā promanarent. Iustè satis de monachis multis Deus conqueri posset, vt olim de ingrato populo, in hæc verba questus est.

1ere. 3. *Videte verbum Domini. Nunquid solitudo factus sum Israeli, aut terra ferotina? quare ergo dixit populus meus, Reccessimus, non veniemus ultra ad te?*

ac si planius sic effaretur: Quid est hoc? An ego, qui sum ipsa bonitas, euasi sterilis, instar terræ solitariæ cultura carentis, aut terræ quidē cultæ, sed fructum serò reddentis? Minimè quidem. Sum enim ingenio liberalissimus, more pinguis terræ cum scœnore multo prouentum refundentis.

Cur

Cur ergo Israel à me recessit, statuitq. se ultra non reuersurum, quasi è mea consuetudine nihil boni demum expectaret? In hunc profectò modum de monachis eius præsentiam obliuioni tradètibz querimonias multas posset Deus efferre. Quicquid autèm alij cogitent, vos, quibus ingrati animi nota teterrima foret, ne Dei consortium respuite. Quarite potius Dominum, & confirmamini, quæritè faciem eius semper. Hæreat animo illud vatis diuini optatum, ac propositum: Tibi dixit cor meum, Exquisiuit te facies mea, Ps. 34. faciem tuam, Domine, requiram.

TEXTVS SEXTVS.

De horis canonicis.

HI, qui horas canonicas cum clericis dicere norunt, eas dicant secundùm constitutionem Sanctòrum patrum, & Ecclesiæ approbatam consuetudinem. Qui eas non nouerint, viginti quinque vicibus Pater noster dicant in nocturnis vigilijs, exceptis Dominicis, & solemnibus diebus, in quorum vigilijs prædictum numerum statuimus duplicari, vt dicatur Pater noster vicibus quinquaginta. Septies autèm eadem dicatur oratio in Laudibus matutinis. In alijs quoque horis, septies similiter eadem dicatur oratio sigillatim, præter officia vespertina, in quibus ipsam quindecies dicere debeatis.

Observatio thematum, quæ ex hoc textu peti possunt, ad exhortationes solitas.

POtest haberi sermo de officij diuini dignitate, & fructu. Præterea dici poterit de modo officium diuinum persoluendi.

Exhortatio de horarum canonicarum dignitate, & fructu. Cap. XV.

ECclesia militans, quæ ad triumphantem tanquam è bello ad pacem, iugi contentione suspirat, quoad per vitæ mortalis conditionem licet, ea præstare conatur in terris, quæ ad cælitum mores proximè accedant. Quo circa cum in superna Dei ciuitate felicissimus ille beatorum summo bono fruendum cœtus diuinam maiestatem perpetua laude cōmendat antiquo ritu quotidianum horarum canonicarum pensum soluere consuevit, vt Deo, quam posset, laudem cælestes choros imitata rependeret. Quò quidem in officio, indefesso studio permansit ob immensam Dei gloriam, cui tot quotidie in orbe terrarum chori religione concordēs, ac diuinæ charitatis fœdere sociati constanter acclamant, & ob eximium bonorum affectuum prouentum, qui ex eo planè angelico exercitio percipitur. Aequum ergo erit, patres, qui officij diuini vinculo innexi estis, eius dignitatem ac fructum è rationibus subiectis expendatis, vt horas canonicas religiosius recitare, ac fructu vberiore gaudere possitis.

Ratio

Ratio prima Mos officij diuini statis horis recitandi sacer admodum, & perantiquus est: atque adeò caput extulit super ritus alios religiosos: videturq. quoddam nobilitatis insigne, quo clerici sacris ordinibus initiati à reliquo populo discernuntur, tanquam humanis ab officijs feriat, & soli addicti diuino. Hoc ergò officium sanctitate, & antiquitate commendatum, & velut opus proprium vobis demandatum, cui alijs curis abdicatis vacandum est, ita æstimare debetis, vt spontaneas preces alias cum illo comparare minimè audeatis. Inuenta quippe alia antiquo, & communi ecclesie instituto æquare, nefas creditur esse.

Ratio secunda. Officium hoc non ipso dumtaxat nomine, sed re vera diuinum est, habetq. cum angelicis choris communem quãdam planè diuinam mentis eleuationem verbis sacris, quæ proferuntur, consentientem, Eius quippè persolutio patriæ actus est in diuinam maiestatem intentus. Si ergo quæ genere diuina sunt, & magni pendii, & religiosè admodum exerceri debent, profectò ex hoc capite ad horas canonicas multas, cum religione recitandas, vel canendas estis astricti. Quale enim portentum esset, diuina à vobis, quos oportet rerum diuinarum æquos æstimatores esse, parum diuine celebrari?

Ratio tertia. Horum canonicarum sunt ipse textus Scripturæ sacræ Spiritu sancto dirigente, conscriptus, & sanctorum scripta, quæ spiritus ipse suggessit. Quis ergo adeò delirus sit, qui non consideret, quàm attentè, quàm puro mentis in-

tis intuitu ijs interesse debeat?

Ratio quarta. Perindè est horas canonicas persolvere, ac supplices libellos à Christo dictatos ad impetrandam salutem æterno Patri offerre. Si ergo libelli principibus terrenis porrecti ab aliquo, qui gratia apud eos valet, commendati, tantoperè æstimantur; quis non iudicet, hos nostros maximi fieri debere, & plurimum interesse, qua mentis dispositione porrigantur?

Ratio quinta. Credendum est, Deum copiosius favere ijs, qui conceptis ab eo verbis utuntur; ut eum colant, quàm alijs, qui varias precandi formulas excogitant. Quis enim adeo est obtusus, qui non dignoscat id tam perspicuum, precandi discrimen? Si ergo vberior gratiæ proventus est? quomodo pleriq. tam segnitè officium recitare assuescunt?

Ratio sexta. Horarum canonicarum pensum, quotidianus, ac perpetuus meritorum census est, preces verò aliæ spontè fusi non ità perdurant, & & facillè intermittuntur. Quantò ergo fructuosius est, perpetuos, & certos quasi redditus, quàm temporarios, & incertos magni facere? Profecto non leuiter seducuntur, qui preces nescio quales insolitas, & ad proprium sensum aptatas religiosissimè frequentant, & officium diuinum lentè ac parùm accuratè persolunt.

Ex his, quæ deprompsimus, liquet, patres, quàm sit honestum, ac vtile canonicarum horarum debitum, qua decet pietate, diuinæ maiestati reddere. Ex quo efficitur, ut nisi desipere velitis, in opus hoc absque dubio diuinum sedulò

incum-

incumbere debeat. Cum enim Deus curas alias vobis ademerit, & in locum sacrum, tanquam paritios suos cooptauerit, ut eius laudes caneretis; merito à vobis pœnas exigeret violatę fidelitatis, si alijs exercitijs cum officij diuini detrimento, videret intentos. Benè hæc nouit sœuissimus nostrę salutis hostis, qui capturus incautos, exercitia alia varijs pietatis coloribus in speciem honestat, ut monachos à cœlesti exercitio diuertat, subtiliq. astutia, alia dulcescere, hoc amarescere facit, ut victoriam eo fuco reportet. Ceterum rei dignitas, & utilitas vobis iã perspecta est, ut excusationē afferre nequeatis, si dulce honesto antefertis. Expendite Apostoli sensum.

Omnis, qui lactis est particeps, expers est sermo Heb. 5.
nis iustitię, paruulus enim est. Perfectorum autem est solidus cibus eorū, qui pro cōsuetudine exercitatos habent sensus ad discretionē boni, ac mali.

Si lacte mulcemini, paruuli consultò esse vultis. Si tamen solido cibo ali more grandium optatis, sensus internos ad rerum honestarum, & salubrium discretionem exercete. Quod si voluntas à vobis omninò expetitur, ne hac de causa torpeatis: certum quippè est, ecclesię cantu affectus suauissimos excitari: quod benè sensit Augustinus hac de causa plerūque vim lachrymarum effundens, cui similes in hoc genere alios ætas nostra perspexit. Profectò, si sciretis, quàm sit è re vestra, hac etiam de causa, in cœtu iustorum Dei maiestatem ecclesiastico ritu laudare, ægre ferretis à choro abesse, ob eum multorum animorum in cælum aspirantium concentum externa,
preca-

precatione testatum. Si daretur semel saltem spiritualem celi rorem; quo cœtus ille conspergitur, intueri; ad canonicas horas dato signo celeriter accurreretis. Ibi quippe omnino verum, probatur illud diuini vatis effatum:

Ps. 132. Illic mandauit Dominus benedictionem hoc est copiam, ubertatem.

Præmiserat propheta sociati cœtus laudem à bono, atque iucundo petitam. Non enim bonum modo, sed iucundum, siue voluptuosum est, iustorum cœtui interesse: quod illa subiecta roris hermonij Sionem humectantis similitudine satis expressit. Cœleste refrigerium, ros arcanus est, quo fatigatus animus ab æstu mortalis vitæ recreatur. Hinc, credo equidem, legitimi certatores nostri horarum canonicarum amore capti, die, nocteq. mira velocitate chorum petere, & ad laudes sacras celebrandas se accingere consuecunt. Hoc imitamini, cum his ad victoriam generosè certate; & inter diuinas laudes gaudia vestra, & coronas vestras exquirite.

Exhortatio de modo diuinum officium persoluendi. Cap. XV I.

EXprimitur nequit, quam religiose antiqui monachi diuinas laudes celebrare cōsueuerint. Nimirum rei dignitatem, & prouentum æqua lance librantibus aptissimum fructui percipiendi modum inire curarunt. Modus autem ille ad duo potissimum capita redigi posse videtur, ad intentionem scilicet animi, & ad corporis decoram coaptatio.

ptationē. Omninò enim decet, vt qui diuinæ maiestati sacrificium laudis oblaturus afflittit, & mentem intendat, ne diuagetur, & corpus modestè componat, ne quid deforme præferat. Hęc fuit prisca, & penè angelica officij diuini persoluendi ratio, vbi Dei spiritus viros illos sanctitate claros afflabat: ceterum eorum posteri, nec animi intentionem, nec externam modestiæ disciplinam retinentes, ad lentum quendam & parum decorum canendi, & recitandi modum processerunt, qui teporem animorum facile indicat. Ab his longè absistere, & ad antiquitatem propius accedere opus est, si quod professi sumus, explere velimus, quod vt feliciter succedat, harum rationum momenta perpendite.

Ratio prima. Non leuis irrogarerur iniuria, principi mortali, si quis cum eo verba faciens spontè ad alia cogitanda diuerteretur, aut mentem lentè applicaret. Vtroque enim modo proderet, se principem non magni facere, quod æger rimè ferri solet. Si ergo diuersio, modicaq. attentio principem mortalem offendit, quid de immortali dicemus? Quis non acriter reprehēdat mentis euagationem, ac teporem, vbi cū infinita maiestate agere, eiusq. laudes efferre decretum est?

Ratio secunda. Non euagatio, aut torpor tantum, sed error multiplex alius idoneum diuinas laudes celebrandi modum perturbat, vel obtruncat, qualis error illorum, qui exercitia spiritualia importune, ac imprudenter officio diuino intrudunt, quibus ab intentione, ac deuotione maiestati diuinæ debita animum auertunt. Cum enim

ipsæ

ipse officij partēs, quæ Scriptura sacra, & sanctorum homilij constant, sint satis pinguis animi pastus, digeriq. vix queant, si alijs exercitijs vario artificio compositis præstetur attentio; quis non animaduertat, per exercitia illa intencionem animi diminui, & vires in studia diuersa dissipari? Neque hoc loco prætexenda est pietas eorum, qui ad singulos horarum canonicarum versus, pedem, vel manum Christi Crucifixi osculantur, aliasq. adorationes certis numeris astrictas frequentant. Importuna quippè est tam exacta adorationum artificiosè succedentium observatio, quæ ab attentione principali, & à percipiēdo officij diuini sensu animum certissimè abigit. Officij diuini pensum syncerè, & grauiter, & sine labore, qui caput lædat, more Sanctorum in Deum referendum est.

Ratio tertia. Non modò mens in varia studia diuidenda non est, verum ad morem seraphicum omnes animi vires colligi debent, vt in Deum virtus vnita fortiùs feratur, quàm dispersa, quod totum illis latitæ actibus ita consonat, vt diuisio dissonet. Totum quippè hominem Deus in his religionis actibus sibi cupit assistere, & quicquid decerpitur, in eius iniuriam cedere videtur.

Ratio quarta. Prætexitur corporis pondus, quo deprimitur anima, ijs præsertim horis, quibus à somno surgitur. Verùm hæc iustorum prælia sunt, vt valide pigritiam excutiant, & corpus animo seruire cogant. Num somnum excusarent, si à principe mortali ad eius præconia celebrāda vocarentur? Non dubium, quin sedulitate multa se

iplos

ipſos excitarent, ne quid indecorum appareret. Cur ergo erga omnium rerum conditorem non eandem diſciplinam obſeruent?

Ratio quinta. Prætexitur vel æſtius calor, vel frigoris aſperitas, quæ obſtant, ne corpus ita decore aptetur, ut par eſſet. Cæterum qualis prætextus eſt hic? Exploratum eſt, fortes Chriſti athletas hæc obſtacula deſpicere, & glorioſè ſuperare concepta diuinæ maiestatis præſentia, & functione tunc obeunda. Cur ergo alij irà non vincant? An qui vincunt homines non ſunt? Homines planè ſunt, ſed ope cæleſti hæc impedimenta depellunt. Vos ergo, patres, qui inter ignauos recenſeri non vultis, modum diuina officia exequendi ſpiritualem, decorumq. ſeſtamin. Cùm enim ſtatus veſter angelicus ſit, turpe eſt, carnis concretionem prætexere. Quin etiam fatuum eſt, corpori in hoc opere non imperare. Si enim officium id ſub mortifero peccato quotidie explendum eſt, an vobis ſtultum non videtur, illud modo ad fructum minimè appoſito perſolvere? Etenim ſi officium omitti inculpate poſſet, ab huiſmodi moleſtia è corpore genita facilè vos expediretis: at cum id fieri nequeat, & onus illud omnino ſubeundum ſit; non ne perſpicitis, rem veſtram agi, ſi à vobis perfectiſſimè ſubeatur? De merito quidem, quod vos dignè æſtimare ſupponimus, nulla controuerſia obtenditur: Conſtitutū eſt quippè, religioſam mentis, corporisq. coaptationem auctioris meriti, quam irreligioſam eſſe. De ſola ergo rei difficultate diſceptari poſſet. Cæterum vos ipſos iudices conſtituo, rō-

goq. vtra sit grauior difficultas, in officio lente, ac incomposite perdurare, an sub initium tribus, exempli gratia, validis cordis motibus pigr̃tiam excutere, & ad reliquum tempus, mente intenta, corpore aptato, capiteq. exonerato euigilare? Porro respondebitis, rem esse experientia probatam, multosq. qui videbantur somno opprimendi, aut repente incidentibus doloribus torquendi, alijsue modis diuertendi ab officio, serenitatem quandam, & libertatem cælestem præmissis aliquot mentis ascensibus nactos fuisse. Rectè quidem: nos etiam idipsum obseruasse fatemur. Si ergo is modus non solum meritis fœcundior, sed facilius est; quid existimatis sentiendum de monacho, qui foris loquax, in choro mutus, foris agilis, in choro grauius oppressus deprehenditur? Quid de illo censebitis, qui breuiarium sustinere non posse videtur, qui omnia circumspectat, & tantum exeundi cupidus accelerat?

Isaïe 6. Recolite Seraphim, quando (iuxta Isaïam) clamabat alter ad alterum, Sanctus Sanctus Sanctus, & humanam fragilitatem aspernati seraphi cos mores æmulamini. Recolite Sanctorum consuetudinem, vt recitetis psallatisq. sapienter.

Ps. 46. Quid putatis, sibi velit vox illa, sapienter? perinde est, ac si diceretur more sapientum, qui sensa diuina percipiunt eorumq. dulcore delectantur. Eloquia Dei dulcia esse è psalmographo didicistis, per verba illa,

Ps. 118. *Super mel ori meo.*

Si ergo melle dulciora sunt, profecto sapienter psalli, ac celebrari decet. Hæc ergo alte recondite, hæc

te, hæc cogitate, & animis in cælum intentis, cor-
poribusq. modestè coaptatis in quotidiano di-
uinarum laudum officio, choros angelicos imi-
tari certate.

T E X T V S S E P T I M V S.

De non habendo proprium.

Nullus fratrum sibi aliquid proprium esse
dicat: sed sint vobis omnia communia, &
distribuatür unicuique per manum Prioris, vel
per fratrem ab eodem ad idem officium deputatum,
provt cuique opus erit, inspectis atatibus, & neces-
sitatibus singulorum.

*Observatio thematum, quæ ex hoc textu duci
possunt, ad exhortationes solitas.*

Differi potest de vita communi. Mox agi po-
test de recurſu ad Priorem pro rebus ne-
cessarijs. Possent, & alia pertractari quæ ad
Prioris officium attinent: verum scripto huic
non congruunt, nisi ea, quorum ipse monachos
debet admonere.

Exhortatio de bono vitæ communis.

Cap. XVII.

Communis vitæ bonum adeo excelsum, ac di-
uinum est, vt qui disciplinæ monasticæ con-
sulti sunt, id & summis præconijs extollant, & pro
eo sustinendo nullum laborem formidandum esse

H 3 con-

consentiant. Habet nempe id bonum cum celesti patria affinitatem non exiguam, quā prae oculis deest habere. Vt enim commune beatorum aeterna pace fruuentium bonum cuique, proportionē seruata, totum cōmunicatur, nec alter alteri illius consortium inuidet; ita in cœtu monachorum communem vitam ducentium, quicquid habetur boni, ita est omnium, ut sit quoque singulorum, quoad opus est; nec patet inuidentiæ locus, ubi in quotidianæ prouidentiae decursu, non personæ sed necessitatis modus expenditur. Vitæ ergo cōmunis, beatæ vitæ adumbratio quædam est. Hinc efficitur, ut generis humani hostis, qui à vita beata, qua caret, inuidentiæ stimulo percitus homines conatur auertere, simili quadam peruerſitate monachos à communi vitæ studio enitatur dimouere: quod portentosa ordinum multorum ruina testatur. Danda ergo opera est; ut bonum hoc, quod cælesti munere apud nos integrum perſtat, accuratissimo studio conseruetur: quod his rationibus videtur persuaaderi.

Ratio prima. Exploratum est, communem vitam pacis esse feracem, cum non subsit dissensionis causa, ubi nemo quicquam, uti proprium sibi vendicat. Pacem autem vniuersę creaturę appetunt, & quā sedulo possunt, inquirunt; cuius veritatis experientia notissima est, nam & bella geruntur pacis acquirendæ gratia, ut crebris liquet exemplis: præterquam quod passim cernimus, & animantes, & res sensus expertes ad quietem, hoc est, pacem quamq. suam naturali propensione moueri. Si ergo vitæ communis ratio

pacis

pacis ybertate fecundatur, qui fieri potest, ut monachus tanti boni conscius, eam non alere, ac promouere conetur?

Ratio secunda. Vbi in commune pietate monastica viuitur, monachi singuli quadam sane nobili conditione gaudent. Quemadmodum enim orbis terrarum principes, quæ fercula apponenda sint, quod criticum emendum, quænam alia victui opportuna seligenda minime cogitant, sed cura alijs demandata bonis paratis fruuntur; ita & monachi: quod ita perspectum est, ut nec à proteruis negari posse videatur. Et quidem quicquid alij sentiant, vos quotidie ad mensam accumbitis, & nulla præuia cura victu necessario diuina prouidentia nutrimini, quod de vestitu, alijsq. ad hanc vitam requisitis asserimus. Si ergo hæc vitæ communis ratio vos principibus similes efficit, & à sordida conditione plebeiorum vilia tractantium eximit; profectò non ob rationes tantum diuinas, sed ob politicas, si eo nomine uti liceat, eam alere, & perficere deberetis.

Ratio tertia. Ij, qui paupertatis votum fideliter obseruant, Deum quasi fideiussorem habent, cuius est curam gerere eorum, qui omnia reliquerunt, ut ex ipsius prouidentia dependerent. Ex quo efficitur, ut Clementissimus Deus monasterijs, vbi nihil possidetur, diciturue proprium, liberaliter adsit, & in rebus etiam esculentis augendis miracula interdum patret, quod è monasticorum ordinum chronicis, & nouissimis quoque Congregationis nostræ constat historijs. Si ergo, qui communis vitæ fidus custos est, Deum

annonæ velut sponsorem habet, quomodò in eius vitæ studium non constanter incumbet ?

Ratio quarta. Monachi ad peculia degenerantes infelicissimum hominum genus est, cum in claustris Deo dicatis easdem curas suscipiant, quas in matrimonio gessissent. Victum quippe vestitum, lectum, libros, supellectilem variam contrahunt, & cellas farciunt, tam solícite, ac seculares auari, qui rei familiaris sicim explere nequeunt. Cum hac verò solícitudine immodica, orationis, officij diuini, sacrificij missæ religio quomodò possit cohærere ? Status profectò lugendus est, quem dum perhorrescimus, in communis vitæ cultû impensius conspirare debemus.

Ratio quinta. Plurima, & sanè tremenda mala ex proprietatis vitio existunt, vt adulatio ad beneuolentiam secularium diuitum captandam, recursus ad consanguineos, iurgia in cœnobijs ob peculia ab alijs vsurpata, vel mutuò accepta, nec reddita, aliaq. eiusmodi, quæ nimis prolixum foret per censere. Ceterùm ea omnia ad hoc vnum caput compendio rediguntur, quod ea vitæ ratio in æternæ damnationis periculum suos sectatores adducit, & cōscientiam præsentis remorsu dilacerat. Hæc omninò vera, & testata sunt. Si ergo per vitæ communis studium hæc damna vitantur, & libertas à mundi seruitute, monastica perfectio, conscientiæ pax, & sempiternæ vitæ spes imis radicibus nixa multis incrementis augetur; qualis dementia foret, vitam hanc cælestem, vel minima ex parte deserere ?

Omninò credendum videtur, neminem è vobis
tam

tam fore suæ salutis immemorem, qui proprietatis à sanctis damnata non modo vitium, sed & nomen non detestetur, sicut regulæ textus exigit. Nemo, inquit, aliquid sibi proprium esse dicat. Satis esse videbatur, paupertatis votum superius præscripsisse, cum quo nequeunt sensa, & verba illud vitium innuentia conciliari. Ex quo enim monachus paupertatis votum emisit, mendacij arguitur, si vel solo nomine sibi quicquam attribuat. Si ergo id verum est, quorsum hæc secunda tam exacta præscriptio, ne quis aliquid sibi proprium esse dicat? Nimirum res, de qua agitur, pondus habet immensum, debuitq. ad eius observationem, non operum tantum, sed verborum forma decerni. Ex quo inter nostros pronomina illa meum, & tuum horroni sunt, vestimentumq. quo induitur, non meum, sed nostrum quilibet appellat. Verum non hic consistendum est: ulteriusq. progrediendum, donec animus, vti fidus voti custos, ijs rebus, quæ per obedientiam ei concessæ sunt, & quibus maximè indiget, ita utatur, ut cordi non hæreant, atque molestè non ferat, si repellantur, auferantur permutentur. Qui huc non pertingit, licet gravi vulnere conscientiam non fauciauerit, facillè reuincitur, aliqua tandem vitij proprietatis initia libenter admittere, nolleq. venenatam mali radicem euellere. Radix quippè, quæ prodigiosam postea succrescit in arborem, affectus ille immoderatus est, quo monachus res concessas ita retinet, ut earum ablationem indigne ferat. Hoc initium est; neque enim timorati animi in scopulos statim grauium peccatorum.

impingunt. Amor autem proprius vires sensim acquirit: & vbi satis creuit, proclive est, interdicente etiam Præfato, quod arctè adhæsit, nolle relinquere. Capite ergò vulpes paruulas: leues culpas ne serpere patiamini. Non enim vos, vt

Ios. 7. Iosue Achan, vel vt Petrus Ananiam, & Saphiram redarguo, sed ad profectum adhortor. Achan furatus est aliquid de anathemate, qui propterea lapidatus est, quod abstulerat, ignis absumpsit. Ananias, & Saphira de pretio agri venditi partem retinentes morte repentina sublati sunt. Anathema est, quicquid post nuncupatum paupertatis votum affectu immoderato vsurpatur: fraus est, quicquid abdicatis iam rebus, aliquo proprietatis sensu latente possidetur. Longè malum hoc propulsandum est, cautione rerum, exiguarum præuia, quæ noxias herbas recentioras, vti falx exacuta refecet. Profectò tametsi alia non timerentur damna, quam diuini amoris decrementum, deberemus nos omnes minimas in hoc genere culpas, vt mortem ipsam refugere: verum est quippe illud Augustini meritò celebratum. Minus te amat, qui tecum aliquid amat, quod non propter te amat: cum ad proportionem amoris rebus temporalibus impensi, nec ad maiestatem diuinam directi diuinus decreseat amor, fatuo mercatore aurum cæno permutante. Absit à vobis insania hæc eò execrabilior, quòd plura secularia bona reliquistis, vel relinquere optastis. Mirum sanè foret, vt amore vilissimæ vestis ad vsum permissæ tam vehementer caperemini, vt quadam vitij proprietatis vestigia

gia imprimerentur animis, qui pretiosa mundi ornamenta spreuerunt. Estote magnanimi mundi contemptores: nudi cum hoste nudo congredi-
-satagite: & communem vitam à patribus nostris hereditatis amplissimæ loco acceptam, legitimo rerum usu conseruatam, & auctam ad successores nostros generosè transferte.

Exhortatio de recurſu ad Priorem pro rebus necessarijs. Cap. XVIII.

Observatione profectò digna est regulæ præscriptio, qua decernitur, ut è communibus bonis, quæ christiana charitas in cœnobiaz intulit, Prior per se ipsum, vel per alium, cui curam demandet singulis iuxta ætatem, necessitatemq. opportuna prouideat. Hæc quippè sanctio Prælatos, ac subditos stricto quodam charitatis vinculo connectit, ut Prælati paterna prouidentia, subditis adsint, subditi verò ad Prælatos velut ad parentes fidenter accedant. Omnino enim æquum est, ut nos qui vestri curam gerimus, vobis, qui omnia reliquistis, ut Christum sectaremini, parentum loco simus, teneroq. affectu non patris tantum, sed matris ac nutricis functiones obeamus, ut olim Moyses in populum, sicut scriptum est:

Nunquid ego concepi omnem hanc multitudinem, vel genui eam, ut dicas mihi, porta eos in sinu tuo, sicut portare solet nutritor infantulum? Num. 11.

Hic Dei sensus fuit, ut Moyses ita afficeretur in singulos, ac si eos concepisset, vel genuisset. Hunc etiam sensum Apostolus expressit in filios, quos
cum

cum semel parturijsset, iterum se parturire professus est, ut in eo maternum affectum dignoscerent. Hunc & nos sensum erga vos habemus, & omnem operam pollicemur, ut officij nostri partes expleamus: qua de re plura subtexere non oportebit. Reliquum ergo fit, ad amoris fœdus utrinque sanciendum, ut vos in quavis occasione ad nos fidenter recurratis, quod his rationibus Deo opitulante suadebimus.

Ratio prima. Quamdiù præsumus, institutio Dei est, ut paternam curam geramus. Si ergo Clementissimus Deus curam hanc nobis licet indignis credidit manifestum fit, eos, qui parentes alios quærunt, ut obtineant ea, quibus indigent, Dei voluntati reluctari. Quocirca credendum non est, filios parentem declinantes Deo infesto unquam fore felices.

Ratio secunda. Licet Prælatus monachus aliàs imperfectus sit, ex quo tamen cooptatus fuit, ut præesset, Deum velut sponforem habet, ut ei lucem infundat, instruatq. ad subditorum bonum, quod gratiæ diuinæ genus alijs, qui minimè præsident, non æquè impenditur. Hoc certè nostis; hoc planè creditis. Si ergo quod proferimus, cognoscitur, & creditur; quonam consilio Monachus Prælatum adire recusat? E quibus lacunis aquam haurire gestit, qui fontem à Deo probatum natus est?

Ratio tertia. Admittamus, Monachum Prælato non fidentem aliundè tandem necessarium aliquid elicere Prælati ipsius venia ad id retinendum impetrata. Nolumus enim de ijs agere, qui
fine

sine consensu Prioris quicquam retinere certant, quos Deus inter nostros hucusque non permisisse videtur. De his ergo qui peius errant, minimè differimus, sed de ijs, qui aliquo denique obedientiæ nutu, quæ optant, habere contendunt. Rogamus nunc, ipsi norunt, se parùm fideliter, libros, vestesq. has, aut illas, habito ad alios, quos Deus non elegit, recursum obrinuisse. Quomodò ergo pacato animo illis vtuntur? Respondebunt, se tandem Prioris veniam impetrasse. Ceterùm mirabile est, Monachos hoc prætexere, quos oportet germanam obedientiæ notionem peperisse. Nonne apertè perspiciunt, licentiam illam penè coactam esse: & Priorem, ne ipsi peiora committant, conniuere fragilitati, qua laborant? Nonne vident, recursus illos, quos captant Priori displicere, veniamq. non spontè natam, sed extortam esse?

Ratio quarta. Qui re aliqua indiget, nec ad Prælatum recurrit, ei proculdubio iniuriam irrogat. Eo quippè ipso prodit, se non habere parentis loco Prælatum, neque credere, se habere Pontificem, qui ei compati velit: quod ab ea sinceritate, quæ bonorum Monachorum nota est, longè distat. Iam autem id à Prælato deprehendi, certo statuimus, cum adeò stupidus non sit, vt modum hunc agendi parùm fidelem minimè dignoscatur. Si autem dignoscit, facile videt, se non, vt par esset, æstimari; atque adeò perspicit sibi iniuriam inferri. Quid autem boni contingat ei, qui patrem iniuria afficit, & in sententia persistit?

Ratio quinta. Prætexitur aliquid à Priore negari.

gari. Verùm adeò indomitæ passiones ferociant, ut monachus à prælato, quæ occurrunt, postulare nolit, quòd rem aliquam non indulerit? Hæcine est monastica perfectio, ut quia semel, aut bis chartæ folium non concessit, statuatur monachus, se non ultra ad eum, qui Dei loco præest, recursum? An si in sæculo remansisset, parentes proprii omnia concessissent postulata? Profectò prælati nostri in hoc genere mitiores, ac promptiores, quàm parentes seculares esse solent, non in ijs dumtaxat, quæ ad necessitatem, verum etiam in ijs, quæ ad solatium pertinere videntur. Quapropter à vero monacho prælati fuga velut barbari, ac efferati hominis culpa censenda est. Quid expectatis, patres? Quid de productis rationibus vobis videtur? Omnino credendum est, nullam legitimam posse excusationem obtèdi ab ijs, qui ob raras, modicasq. repulsas terga prælato vertunt, noluntq. mitescere. Etenim non usque adeò cerrum est, quicquid à monacho petitur, esse disciplinæ monasticæ, ipsiusq. postulantis salutis consentaneum. Quid ergo mirum, si prælatus nonnunquam, quæ poscuntur deneget? An quia non indulget noxia, non impertietur salubria? Neque obstat, quod degeneres prætexunt, se iusta deprecere. Quid enim si eis iusta videantur, & Prior secus censeat? Vtra sententia non solum monasticè, sed ciuilitè præferenda est? Cæterum quid cunctor? Ille ex nostris, quos veris virtutibus absque exceptione præditos esse, fama est; non ità cum prælatis disceptant. Non excandescunt, si petita non impetrent. Quinetiã

cum

cum prælatis paciscuntur, ut pleraque abneget, atque in hunc modum exerceri satagunt, bene fidentes necessaria sibi non defutura, quod ex voto succedit. Conferte modo monachorum classes duas, alteram eorum, qui ex denegato deus postulato irritati, ad Priorem se in posterum recurrere nolle decernunt, alteram eorum, qui sibi, quæ præsertim concedenda videntur, prohiberi contendunt. Classes circumspicite, classium merita comparate. Quid ergo respondebitis? Nos iudicium feremus: Arcta est via, quæ ducit ad vitam. Felices monachi, qui sub agonis finem, longum rerum interdictarum catalogum Christo cognitori legendum, ut more nostro dicamus, exhibere poterunt. Quam cumulata mercede gaudebunt? Satis rem calleris: Honestum agnoscitis. Percutiamus ergo coram diuina maiestate, superius indicatum amoris, & monasticæ perfectionis foedus; ut nos scilicet paterno affectu vobis ad regulæ sensum inspecta ætate, & necessitate res opportunas distribuamus, vos verò filiorum vñ fiducia, illas candidè postuletis, & si quid interdum negetur, aut prorogetur, boni consulatis. Ac in hunc modum, pro decore domus Dei, erecti spe salutis æternæ dimicemus.

TEXTVS OCTAVVS.

Quod licet habere in communi.

A Sinos autem, siue mulos, prout vestra expositularit necessitas, vobis habere liceat, & aliquot animalium, siue volatilium ad nutrimentum.

Obfer-

Observatio thematum, qua ex hoc textu peti possunt ad exhortationes solitas.

D Ici poterit de diuina erga nos in rebus quoque infimis prouidentia. Deindè posset differi de vsu iumentorum ad modestā vecturam.

Exhortatio de diuina erga nos in infimis quoque rebus, prouidentia. Cap. X I X.

D Vm præsents textus sensum contemplor, subit mentem illud, quod per Ieremiam Clementissimus Deus extulit.

Iere. 31. *Factus sum Israeli pater, & Ephraim primogenitus meus est.*

Ita enim erga nos afficitur Deus, vti pater erga primogenitum affici solet, dum in rebus quoque minimis nostri curam gerit, quod ex hac regulæ præscriptione conuincitur. Legislator quippe diuino, vt credi debet; spiritu afflatus animalia alia ad vecturam, alia ad nutrimentum ægrotantium, vel etiā prosperè valentium haberi posse decreuit, vt ad omnem euentum monachis necessaria suppeterent, omnemq. proindè curam in Dei prouidentiam reiicerent. Textum explorete, & comperietis iumenta ad onera varia in claustrum inferenda, vel ad monachum aliquem pedestre iter facere non valentem, vehendum, volatilia verò, & animantia alia, vel occisa in esum ægrorum, vel viua in fœtum ouorum, & lactis ad ægros valentesq. pascendos destinari. Quid ergo sibi

sibi vult hæc tam accurata rerum modicarum præscriptio? Ij, qui spirituales oculos nati sunt, facile animaduertunt, diuinę opus providentię fuisse, vt in textu adeo breui, & graui hæc Dei erga nos cura testata remaneret, vt nos, nostraq. omnia in eum referremus: quod subiectæ rationes euincunt.

Ratio prima. Deus Clementissimus certo hoc regulæ capite prælatos monitos voluit, vt ægris, beneq. valentibus, siue domi, siue foris, siue in aduersa, siue in prospera valetudine prouiderent ea, quæ sanè ad omnem euentum opportuna videntur. Si ergo hæc iam præmonita, & prouisa sunt, quam erit cæcus monachus, qui diffidentia morbo laborauerit, & sui curam in Deum minimè retulerit?

Ratio secunda. Hæc diuinitus inspirata regulæ pars obliuioni tradita non est, cum prælati eam, quo ad opus est, fidissimè exequantur, vt quisque vestrum crebra experientia perspectum habet. Quid ergo queritis? Quid cogitatis, si in animis vestris ulli sollicitudini aditus patet? An esse vultis è numero illorum, qui malè locuti sunt de Deo? Expendite, qua nam ratiocinandi arte vti sine. Percussit petram, & fluxerunt aquæ, & torrentes inundauerunt. Hoc providentiæ genus planè mirandum iam ipsi experti fuerant, & tamen sic rogant: Nunquid & panem poterit dare, aut parare mensam populo suo? Stulta hæsitatio de potentia, aut voluntate Dei. Debuerunt sententiam in hunc modum contexere: Percussit petram, & fluxerunt aquæ: Ergo & mensam non solum poterit

terit parare, sed parabit. Vos ergo, nisi ex antea Dei providentia de futuris eventibus spem altam concipitis, in populum parum fidelem degeneratis.

Ratio tertia. Ex quo monachus exemptum hoc vitæ nostræ genus profiteri cæpit, probavit illud oraculum.

Ps. 54. *Iacta super Dominum curam tuam, & ipse te eruet.*

Liquidq. cernit, id iuxta Dei fidelitatem, in minimis quoque rebus evenire. Etsi enim corvus appensos rostro cibos, ut Eliæ, ac Paulo primo Eremitæ non deferat, vilitate alio modo necessaria providentur. Quoties autem creditam Deo sui curam resumit, oraculum improbat illud, nec iam a Deo nutrirî cupit. Quis autem non iudicet, stultam esse hanc mentis mutationem, quandoquidem nullius creaturæ providentia diuinam valet æquare?

Ratio quarta. Bonorum monachorum mos est, ubi consanguinei, vel amici quicquam agris, aut valentibus offerunt, illud respuere, ne humana providentia diuinam excludat. Cum enim sui curam in Deum coniecerint, & prælatorum fidem in regulæ præscriptionibus explendis probauerint, nolunt iniqua commutatione seduci. Cur ergo non omnes hanc doctrinam sectentur? Quid meditatur, qui sui curam a Deo, & prælatis susceptam externæ providentiæ incertæ, & carptim succedenti non anteponit?

Ratio quinta. Rogamus, an qui curam gerit, iumenta, pecora, altiliaq. vobis nihil cogitantibus

bus

bus parandi, in rebus grauioribus vos deserturus credatur? Respondebitis, omnino certum existimandum, ea quæ maiora sunt, & quæ statum decent nostrum, à Deo prouidenda. Si enim ipse libentius largitur spiritualia, quæ nobiliora sunt, quàm temporalia, quæ illorum dignitatem non æquant: cur non credatur largiturus ea temporalia, quæ alijs pretiosiora sunt, si deceant, & ad bonum status nostri conferant? Si ergo firmis rationibus nixi cēsetis, nihil ad status vestri decetiam, sine vlla vestra sollicitudine defuturum; animadvertite, quam debeatis à curis superuacaneis abhorreere, & totum, quod estis, vni Deo rerum vestrarum curatori sacrare.

Id. Credo equidem (vos ita esse animo comparatos, vt & diuinam erga res nostras prouidentiam commendetis, & vos totos in Dei curam dedere velitis. Ceterum non satis propterea sit officio, cui obnoxij estis ex tot beneficijs, quæ Deus quotidie confert, in ijs quoque rebus, quæ textu regulæ tactæ sunt. Quæ enim seculares summis laboribus ad se alendos hinc inde conquirunt, vos ab ipsis donata sine molestia vlla sani, & griq. percipitis. Reddite ergo multæ tributum gratitudinis, quæ fons diuinæ largitatis velut incitatus fluat vberius. Rem hanc attente obseruate, ne in errorem illorum incidatis monachorum, qui non magis diuinorum beneficiorum experientia molliuntur, quàm si stricto iure illa eis deberentur; quibus æquo iudicio rependi solet, vt ea subtrahantur, & inopia simul ac spiritus ariditate, vexentur. Alebat eos primum Deus, vt nutrix

infantulos: postea ingratos ablaetant. Non ne vobis videtur ablaetandus, hoc est dignus, qui pastu priuetur, is, qui dum quotidianâ Dei providentiam ad ægrotos, valentesq. solandos, & promptuaria implenda in cœnaculo, cibo sumpto, ut mos est, referri audit, nihilo gratior euadit, quàm si censum, quem è proprijs bonis instituisset, acciperet? Porro spirituales monachi dum eleemosynas recenseri audiunt, & officinas bene instructas circumspiciunt, multa animi demissione, & gratitudine, cor in gratiarum actionem attollunt, & procuratorem sedulum Deum appellant. Fidelis monachus crebrò recolit illud sanè suauissimum diuini vatis assertum,

Pl. 22. *Dominus rogat (seu pascit) me, & nihil mihi deerit.*

Nihil sanè deerit ijs, qui nihil præter Deum exquirunt, nã ijs, qui degenerant, omnia desunt, contingitq. illud, quod Hebræis olim accidisse Ieremias commemorat in hæc verba:

Thren. 5. *Aegypto dedimus manum, & Assyrijs, ut saturaremur pane.*

Incunt enim cum secularibus tanquam cum Aegyptijs, & Assyrijs pacta, ut corradant necessaria; qui si Deo se totos deuouerent, haberent etiam commoda, & delectabilia. Nè ergo fœdera peregrina requiratis, sed sub Dei tutela requiescite, & ut ipse liberalissimus prouisor vobis adest; ita & vos omnem sollicitudinem ad eius delectatum amorem, & ardentissima celestis patrię vota referte.

*Exhortatio de usu animalium ad modestam
vestituram. Cap. XX.*

PARS providentiæ in Superiori exhortatione laudatæ est usus animalium ad vestituram. Cum enim non omnes monachi pedites iter facere possent, expedire visum est, iumenta non modo ad onera gestanda, & ad ægros, aut debiles vehendos haberi. Quod non temere præscriptum censendum est, cum regula in infimis quoque rebus cælesti consilio dictata videatur. Et quidem rationi, ac disciplinæ monasticæ mirifice congruebat; ut gens, quæ humilitatem à primævo statui professa fuerat, in ijs præsertim occasionibus, humilem disciplinam retineret, in quibus facilior lapsus, & excusatione dignior videretur. Perfacile quippè erat, ubi morbus, aut imbecillitas ad esset, equitandi morem parum modestum induci cui malo, anteverso tempore occurrere legislator optavit, dum eam providit vestituram, quæ discipulorum Christi humilitatem, ac mansuetudinem deceret, & nihilò secius instanti necessitati, iuxta charitatis legem minimè deesset. Hæc antiqua institutio, & consuetudo fuit, ubi necessitas cogeret. Ceterum lapsu temporis, & spiritus tepore apud nonnullos equitandi licentia, & abusus introductus est à quo per subiectas rationes vos præcæ sanctitatis æmulos cupimus dehortari.

Ratio prima. Status nostri decor, & proportio exigit, ut quemadmodum dispersam à secularibus vitam domi ducimus, hoc est, austeriorem,

parciorem, humiliorem, ita extra claustra, ab eorum moribus discernamur. Si ergo domi vescimur, cubamus, induimur modestius, quale monstrum erit, ut statim ac iter inchoamus, nulla in equitandi commoditate cernatur discretio? Profectò nullus hic ordo, nullus decor deprehenditur, sed aperta deformitas seipsam ostendit.

Ratio secunda. Ex abusu equitandi exoritur enormis expensarum abusus, quod nimis compertum, & vulgatum est. Quomodo autem cum emissio paupertatis voto ea licentia coherere possit, cum alij eodè astricti voto aut pedites incedant, aut humiliter vehantur, ne tot, tantosque sumptus faciant? Porro res hæc timoratos animos non leuiter vexat.

Ratio tertia. Qui secularium more equitare contendit in religione inopi, arte non prorsus sincera, aliunde viaticum elicere satagit, ac proinde multa committit, quæ spiritui non leuiter offiunt. Res planè testata est, atque vtinam non adeò frequentèr accideret. Quis ergo huiusmodi abusum non perhorrescat? Quantò esset religiosius mori velle, quàm hunc abusum latè serpenterem alere?

Ratio quarta. Qui hæc non curant, & leuibus de causis itinera frequentant, bonum suæ Congregationis nomen obscurant, deformi exemplo altè impresso, quod multis alijs modeste viam carpentium exemplis minimè deletur. Certum est autem, hoc culpæ genus ex ijs esse, quæ à Deo seuerè puniuntur, cum commune bonum, & multis pijs laboribus partam totius

Congregationis existimationem deterat .

Ratio quinta. Licet nulla ingruerent mala, rubor ipse, quo suffunduntur isti equites, ubi monachos alios æqualē, aut fortasse minorem austeritatem professos obuios habēt, deberet eos ab hoc proposito deterrere, ut necessitati, si qua vrget, humiliore vectura, quantū sat foret, occurrerent.

Has, quæ nervosæ videntur, rationes trutinante, patres, & instituti nostri decorem ne contemnite. Non est res adeò levis, quæ reticenda, vel oscitanter prætereunda sit. Recolite antiquos maiorum nostrorum mores. Christum a fello infidentem, in urbem sanctam ingressum cogitate. Non vectus fuit equo phalerato, vel commodè strato; neque enim ferox animal, ornatus & commoditas mansuetudini, humilitati, & inopiæ congruerent. Mundus nostro eget exemplo. Opinio, quam de nostra simplicitate concepit, non sine spiritus iactura interiret. Nos insequentem fugimus mundum, ut olim Dauid pedester Absalonem. Rogo vos, qua fiducia Deum precabitur in medijs itinerum periculis, qui suam Congregationem vectura immoderata quasi diues secularis op pugnat? An Deus apostolicæ disciplinæ osorem tuebitur? Quid si in diuesforijs, aut densis salubus monachus ad commodè equitandū bene nummatus à latronibus obsideatur, & quicquid congescit, cedat in prædam? Quanto foret honestius, ut nudus, & inops reperiretur, & inuasores ad commiserationem flecteret? Non fert animus necessariam vecturam distulere, sed superuacaneam, & profanam, cui qui assuescit, Deo displi-

cet, commune bonum labefaciat, & hominibus sit palam exosus. Notum est, nonnullos è nostris hac in re laudatissimos fuisse, qui vbi iniuncti à prælatis itineris labor incubuit, non conciderunt animo, neque quicquam disciplinæ monasticæ aduersum admiserunt: atque vtinam horum numerus foret auctior. Vos verò, certo statuentes in omni disciplina, quæ perfecta, & omni ex capite absoluta sunt, à generosis animis exquiri, à lentis, & ignavis minimè attingi, nervos intendite, & selecto paucorum numero ascribi conamini. Post labores exhaustos quies porro dulcissima, succedet. Hanc plerumque meditamini, ut ad viandam virtutis arduitatē roboremmini. Ab exilio chaldæorum in charissimam Ierusalem gens, quæ iter laboriosum confecerat, alacriter reuersa est. Vos ergo viam arduā ne refugite, ut in supernam Ierusalem lætus, quem optatis, succedat ascensus.

TEXTVS NONVS.

De Oratorio, & cultu diuino.

O Ratorium, prout commodius fieri poterit, construatur in medio cellularum, vbi mane per singulos dies ad audienda Missarum solemnia conuenire debeatis, vbi hoc commodè fieri potest.

Observatio schematum, quæ ex hoc textu duoi possunt ad exhortationes solitas.

P Otest fieri sermo de legitima Missæ celebratione, & ministrantium officio. Potest etiam disceri

differt de ineundo modo aliquo ad fructum Sac-
rificij percipiendum.

*Exhortatio de legitima Missæ celebratione, &
ministrantium officio. Cap. XX I.*

E textu regulæ, qui modo lectus est, liquet,
patres, olim non tot ad Sacerdotium pro-
moueri solitos, ac ætate nostra. Ea quippè de cau-
sa decernere oportuit, vt in Oratorium quotidie
monachi conuenirent, & vni saltem sacro inte-
ressent. Nunc verò postquam sacerdotum creuit
numerus, antiquæ disciplinæ ratio nonnihil mu-
tari debuit: atque ad eius mutationis propor-
tionem exhortationis forma variabitur. Dice-
mus ergo de legitima Missæ celebratione, vt tam
Sacerdotes, qui plures iam sunt, quàm alios alta-
ris ministros, ad grauissimas functiones ritè ob-
eundas exhortemur, quod sanè officij nostri ratio
exigit. Quanti verò momenti sit legitima iuxta
ritus ecclesiasticos celebratio, ex his rationibus
expendite.

Ratio prima. In veteri testamento planè mira
præscriptio fuit sacròrum rituum, quibus Aaro-
nici Sacerdotes, alijsq. templi ministri fungi iuxta
legem scriptam debuerè. Si ergo Deus ab illis sa-
cerdotibus, & ministris tam exactam ceremonia-
rum obseruationem exegit; quàm erit æquum, vt
à noui testamenti sacerdotibus, alijsq. altaris mi-
nistris exacta rituum cognitio, & exequutio re-
quiratur? Vos iudices estote, & vtrosque sacer-
dotes mutuo conferte.

Ratio secunda. Decor domus Dei ab hominibus Deo consecratis impensè diligendus est, ità vt ex eo amore zelus existat, qui indignos sacro ministerio actus ferre nequeat. Cum ergò decòr Ecclesiæ, quæ Dei perampla domus est, in sacerdotum, aliorumq. initiatorum officijs maxima ex parte consistat: manifestū efficitur, eos si venustè officijs perfungantur, decorem illum alere, & augere, si inuenuste minuire. Quis autem eum decorem curet, si monachi rerum diuinarum studio intenti negligant? Rem hanc perpendite.

Ratio tertia. Ex legitima rituum Ecclesiasticorum obseruatione, vbi ad altare omnia tempestiue, grauitèr decoreq. præstantur, Christianus populus ad pietatem vehementer inflammatur; & è contrario si neglectum deprehendat, indignatur acriter. Quid ergo cogitat monachus sacerdos, diaconus, vel alius altaris minister, qui per ignoratiam, vel inertiam sacras cèremônias, non vti decet, exercet? Profectò nullam excusationem videtur posse prætexere.

Ratio quarta. Monachi ipsi, quantumuis inertes si principi alicui in seculo ministrarent, curiosè satis ritus palatinos ediscerent, & vbi, quomodoq. standum, genuflectendum, surgendum, caput aperiendum, mensæ inseruiendum, aliaq. obsequia reddenda, non oscitanter animaduertent. Cur ergo in obeundis sacris altaris ritibus non vsque adeò decoris curam gerant, & deformiter errent? Regina Saba obstupuit, vbi Salomonis aulicos tam venustè sua obeuntes ministeria vidit. Si ergo famuli Salomonis tam exactè

regi

regi obsequuntur suo; cur Christi famuli non ita accuratè infinitæ sui regis maiestati ministrent?

Ratio quinta. Aetate hæretici. Missam, & ritus alios ecclesiasticos acerrimè oppugnât: quo ex capite; omnino æquum est, veros ecclesiæ filios ad illud præsertim tuendum animari, quod validius impugnatur. Quid ergo respondebit Sacerdos, qui indecore celebrat, & quod ad se attinet, sacrificium illud infinita veneratione dignum dehonestat?

Ratio sexta. Etsi nulla suppeteret ratio alia, quàm quæ è diuinæ Eucharistiæ præsentia petitur, deberent vniuersi sacerdotes, ac ministri alij multam sacrarum ceremoniarum peritiam comparare, & modos officij exercendi maxime decoros addiscere, vt Christo sub sacramento velo latenti cultum afferrent. Si enim ratio hæc eos non vrget, quem Dei sensum naçti sunt?

Nemo adeò ferus esse posse videtur, qui his rationibus auditis non mitescat. Non enim de bonis alijs minùs pretiosis, sed de Ecclesiæ bono, de populi solatio, de christiani sacrificij aduersus sectarios veneratione, & de Christi demum gloria sermo fit. Benè hoc nouit, nostræ salutis dirissimus hostis, qui nihil ardētius eniti videtur, quàm vt altaris sacramentum, si valeat, exterminetur, sin minùs, tractetur indignè. Quod vt obtineat, via nulla directior, quàm sacrorum rituum neglectus, sacerdotibus, clericisq; alijs animo impressus, quo vires acquirente, altaria, vestesq; & vasa sacra sordent, intolerabilisq; euadit sacrorum ordinum abusus. Sat est, alios, quos neque Dei

amor,

amor, neque domus Dei zelus extimulat, Christo rerum inspectori sorduisse, eiusque irā in loco maxime, digno sanctoq. irritasse. Vos verò, qui mundum aspernati estis, & ad Congregationem nostram, quæ in offerendo altaris sacrificio decoros semper modos sectata est, diuinitus vocati estis, legitimas ceremonias mente retinete, & vel apicem vnum ne spernite. Si sciretis, quo pietatis affectu populus ardet, ubi vos aspiciet vestibus sacris ornatos sedatè, & grauitè in locum sacrificio destinatum progredientes, thus venusto brachiorum adolentes motu, eloquia casta distincta, & ad intelligendum appositè proferentes, singulariq. modestia, absque nimia cunctatione, vel celeritate è latere in latus altaris transeuntes, exhibitis intimæ religionis signis sacrā hostiam, & calicem subleuantes, aut deponentes, aliaq. vel simplici, suauiq. cantu, vel silentio sine nota inertie, expeditione temperata præstantes: Si sciretis, inquā, dum hæc expletis, quā piè populus afficiatur; multo altius officij vestri æstimatio, & legitimæ functionis cura imprimeretur. Magna sanè voluptas à frequentissimo populo Israel in dedicatione templi percepta fuit; magna extitit, valdeq. pia animorum affectio, cum sacrarum ceremoniarum ordo, & officiorum functio concinna spectaretur, ubi, ut sacer habet textus,

2. Paral. 7. *Sacerdotes stabant in officijs suis, & leuitæ in organis carminum Domini.*

Cæterum sacratior est ordo vester, patres, & absolutior est Ecclesiæ quā synagogæ pulchritudo. Formosior est noua, quā vetusta Ierusalem,

noua

noua scilicet, quæ à Deo parata est, & sicut sponsa ornatur viro suo Christo, qui concinnitate ecclesiasticorum actuum, & venusto explendorum officiorum modo mirifice delectatur. Quid enim gratus, ac iucundius sponso, quam sponsæ decor, & ornatus? Non ergo ob solum christiani populi solatium, & cumulata pietatis incrementum, sed ob Christi redemptoris nostri gloriam, & eam, quam è decore Ecclesiæ percipit voluptatem, in studium sacrorum rituum debetis incumbere. Certe pro forma hac spectabili ecclesiæ, cuius filij minimè degeneres estis. Functiones sanctas religiosè obire pergite, vt diuinus amplificetur cultus, quem Clementissimus Deus alta mercede replet.

Exhortatio de modo sacrum celebrandi, & audiendi ad eius fructum percipiendum.

Cap. XXI.

Non inculpatè agit artifex, qui eius, quam proficetur, artis exercendæ modum aliquem ad lucrum, quod capiat, appositum minimè excogitat, vel à peritioribus ediscit. Quocirca mirum est, quàm sint reprehensione digni sacerdotes plurimi quotidiano sacrificio assuesi, qui cum inutilia pleraque perspecta habeant, officij tamen sui utiliter explendi modum prorsus ignorant. Si ab eis quærantur subtilia multa, non theologica, vel philosophica tantum, sed mathematica, & politica, nodos soluunt, & magnam sui admirationem excitant: vbi verò de sacrificij fructu sermo insti-

instituitur, respōdebunt fortasse, quid factū opus sit, ceterū de modo eis vſitato rogati, mirabilem planē stupiditatem exhibent. Quicquid autem alij ex suæ salutis incuria cogitent, vos, patres, strictissimo vinculo religati estis ad rei tantæ momentum ponderandum, & modum appositissimum ineundum, quo fructus optatus ex sententia succedat: quod proportionē seruata de ijs, qui sacro ministrant, omninō sentiendum est. Vt ergo immenso debito à vobis fiat satis, subiectas rationes audite.

Ratio prima. Sacrificij altaris dignitas infinita est, cum ibi Christus æterno Patri inuicentē imoletur. Quæ nam ergo rei præmeditatio, qualis mentis attentio, qualis affectus sacrificio tanto debetur? Nonne perspicuum est, angelicam puritatem, & seraphicum affectum requiri? Si ergo cælitum affectio à sacerdote per rei meditationem, & præstitam officio suo attentionem paranda foret; quid pœnæ non merebitur, qui ad altare inconsideratus accedit, & perfunctoriē sacrificium offert? Quid censendum de illo, qui per plateas animo vagatur, verba obtruncat, accelerat, & officio vix expleto recedit?

Ratio secunda. Christus dum se Patri immolandum exhibet, eo ipso cum sacerdote liberalissime agit, nimiumq. obtusus esset, qui ex functione illa lucrum maximū, sacerdotem referre posse habitaret. Quid enim obtinere nequeat, cui infiniti pretij sacrificium creditum est? Si ergo lucri tanti occasio adest? quomodò sacerdos mentis compos non se ad id acquirendum cœlesti auxilio

xilio præuentus adaptat? Qualis dementia est, rem hanc planè grandem æstimare nolle?

Ratio tertia. Apud mortales felix existimatur, qui peculiarem principis audientiam impetrat, cum maior ibi, quàm in publica principis videatur propensio, & ad peculiaria oratoris negotia attentio quoque sit maior. Cum ergo Sacerdos ad peculiarem, vt more nostro dicamus, diuinæ maiestatis audientiam oblato munere gratissimo admittatur: quæ nam ratio alia sterilitatis extremæ, quam in plerisq. Sacerdotibus cernimus, esse possit, quàm ineptus sacrificandi modus, quo diuinæ bonitatis fontem tam sæpè retardant? An possit ambigi, eos feliciores futuros, si idoneo modo sacrum facerent?

Ratio quarta. Sacerdos non sacrificat quouis modo, sed sacrificium peragit sacræ hostiæ, calicisq. sumptione, vbi nisi. per ipsum stet, initur vnio planè mirabilis, qua in Christum arcana velut transformatione mutatur. Si ergo tanti boni desiderio se flagrare sacerdos dicat, & aliunde ad illud diuinæ charitatis opus non se apto cõparet modo, ante, & interim dum ad altare agit, quis ei fidem habeat? Quis eum impostorem non appellet? At sibi nocet ipsi: Deus enim offensus minimè seducitur, seque ipsum vlcisectur.

Ratio quinta. Qui rerum diuinarum sensum adepti sunt, inexplibili auiditate modos dignè sacrificandi, ac sacramentum sumendi passim excogitant, & de re tanta cum viris sanctitate eximijs anxie conferunt, partim rei æstimatione, partim succedentis fructus experientia permoti:

neque

neque quicquam tam arduum, durumue proponitur, quod successuri prouentus spe non peruincant. Quid ergo causæ subest, cur tam multi sacerdotes nō accuratius de modo fructuose sacrificandi cogitent, quā si de prophano pane comedendo in altari ageretur? Credendum procul dubio est, vix ab vllis alijs peccatoribus grauiorem iniuriam, quā ab indignis sacerdotibus Christo irrogari. Credendum etiā, ingratos, & stupidos boni sui censores esse sacerdotes illos, qui licet culpis mortiferis fœdari ad sacrificium non accedant, itā tamen lente, & incuriose accedunt, vt celestium donorū pluuiā neutiquā perfundantur. Non enim in sacrificiū, aut sacramentum, sed in sacerdotem inopia hæc referenda est.

Contemplamini modō, patres, sacerdotes per sexennium, & decennium celebrare solitos. Contemplamini & horrete. Pastus pinguis est. Christi corpore pascuntur: fœcundum calicem hauriunt. Quæ nam ergo est macies hæc spiritualis, qua concidunt, & in sinu matris Ecclesiæ calamitosius, quam paruuli in excidio Ierusalem, velut fame intereunt? Illi matribus dixerunt,

Thren.
1.

Vbi est triticum, & vinum?

At hi non valent vllam excusationem tremendæ sterilitatis afferre. Suppetit abundè panis. Cur ergo non bene nutriuntur, & vegetiores euadunt? Et quidem si ad nutrimenti proportionem vires augeri debent, cum illi diuina esca, potuq. alantur, quomodò vires, hoc est virtutes diuinas, minimè pararunt? Lugenda profecto res est.

Vos ergo aliorum malis eruditi, & cautioreseffecti,

suppon.

effecti, siue ad sacrificium, siue ad solam eucharistici panis sumptionem accedendum sit, vires animi omnes prius colligite, & humillime diuinam maiestatem precamini, adaptet animos vestros ad eum è tanto bono fructum reportandum, quem dignatio tanta pollicetur. Reijcite terrenas, & importunas cogitationes, & corda in celestem illam mensam intendite. Actus plurimos fidei, spei, amoris, & contritionis producite, quibus animus, velut argenteum vas artificis ictibus conformetur, vt balsamum pretiosissimum excipiat. Hostiam illam æterno Patri infinite acceptam, pro ante actis peccatis, pro beneficijs acceptis, pro impetrandis alijs, & in holocaustum suauissimum quadruplici distinctione offerre, & sumptum cibum planè vitalem pensitatione multa tanquàm sani stomachi calore percoquite. Hęc obseruate, & sanctorum exemplis insistite.

Neque verò vobis, quod suademus, durum vlllo modo videri fas est: res quippè vestra agitur: lura hic propria, gaudia propria conquiritis. Si semel, credo equidem, spiritualis dulcedo à vobis proprio in fonte, vt ecclesia canit, gustaretur, incredibilem sui sitim excitaret, efficereq. vos perquam sedulos bonorum priorum curatores. Quàm citò claudi more ceruorum exultarent! Quàm alacriter difficultatum repagula perrumperent, qui prius lèrè incedebant! Quàm profundas mundi despectus radices defigeret! Quàm vehementer è faucijs amore pectoribus desideriorum piorū scintillæ dissultarent! Quàm longum sacrificij præmeditationi, & gratiarum
actioni

actioni tempus impenderetur ! Quam aperta totius veteris hominis in nouum, qui est Christus, mutatio, quæ ad permouendos animos efficacissima foret, se spectandam exhiberet ! Ignauiam ergo omnem Christi milites excutite. Pastum saluberrimum, & dulcissimum vniuersis mundi honoribus, lucris, commodis anteferte. Comedite bonum, & delectabitur in crassitudine anima vestra. Crescite, ut roboremur cibo grandium, & è mensa illa leonibus fortiores denique recedite. Cæleste vobis precor lumen ! & robur, ut rei, de qua dixi, digna æstimatione permoti monita nostra possitis explere.

TEXTVS DIE CILM V. S. I. I. I.

1. De Capitulo, & correctione fratrum.

Dominicis quoque diebus, vel alijs, ubi opus fuerit, de custodia ordinis, & animarum salute tractetis : ubi etiã excessus, & culpa fratrum, si quæ in aliquo deprehensa fuerint, cõcharitate in media corrigantur.

Observatio thematum, quæ ex hoc textu peti possunt ad exhortationes solitas.

Poterit agi de disciplina in capitulo à monachis obseruanda. Poterit quoque agi peculiariter de correptione humiliter ferenda.

*Exhortatio de disciplina in patrum confessu, si-
ue Capitulo obseruanda. Cap. XXIII.*

EX antiqua patrum nostrorum traditione per hebdomadas singulas in cœtu monachorum sermo fieri, & de promotione virtutum, abusuq; extirpatione agi consuevit. Quo ex actu ad monasticam disciplinam alendam in primis appposito fructus porro vberimus perceptus est, vt merito à viris prudentissimis magni fiat, eiusq. conseruatio inter potissima status nostri bona reponatur. Quocirca de disciplina in eo retinenda iuxta sensum regulæ, verba facere rationi, & pietati consentaneum erit. Quia verò fructus, quem optamus, ex voto minimè succedit, nisi animi ad illum tractatum à regula præceptum comparati accedant, & ei mites ac humiles intersint; hoc ipsum ad hodiernū sermonem à vobis præsertim postulamus, vt doctrina hic altè concepta diutissimè permaneat. Hoc ergo animorum affectu præuio, quanti sit ponderis hunc actum magni facere, & eius ritibus benè vti, ex subiectis rationibus iudicare poteritis.

Ratio prima. Nemo è vobis adeò instituti nostri ingnarus credendus est, qui tractatum illum de custodia ordinis, & animarum salute à regula imperatum non censeat rem planè grandem, & ad cōmunem totius Congregationis, priuatumq. animi sui bonū opportunissimam. Si enim actum legum custodiæ, ac spirituali saluti, maturo consilio destinatum non maximi pendit, quo spiritus

afflatur? Profectò actus grauiſſimus, & ſaluberri-
mus eſt, debetq. à Monachis, ſi quo regularis
obſervantiæ zelo excitantur, quauis difficultate
viſta ſuſtineri.

Ratio ſecunda. Diuturna experientia com-
pertum eſt, tractatum illum, velut ignem quen-
dam purgatorium, valdè tamen mitem eſſe, quò
culpæ aliàs admiſſæ expiantur, vt commune cœ-
nobij corpus vigeat, & niteat. Incredibile quip-
pè videtur, quam fit corpus illud robuſtum, &
candore virtutum ſplendidum, vbi frequenti heb-
domadarum ſingularum cœtu, de illo curando, &
à noxijs velut humoribus expurgando confertur.
Quod apertius multo perſpicitur, ſi explorentur
cœnobια duo, in quorum altero capitulum rarò,
in alterò crebrius celebretur: illud enim ſylue-
ſcit, & velut ſpinetis ſuccreſcentibus horret, hoc
viridarium benè cultum repræſentat. illud concidit,
& tanquàm vitali humore deſtitutum are-
ſcit; hoc plantaria in faſtigium validè aſſurgen-
tia procreat, & humectat. Nimirum in illo aren-
tia germina minimè reſecantur, in hoc vel arida,
vel ſuperflua ſylua præciditur. Quis ergò è vobis
cœnobium hoc noſtrum ſanò, & vegeto corpori,
aut horto benè culto, quàm corpori agro debi-
lique, aut ſylvæ arenti noliſſe ſimilius? Rem
æquis bilanciſus appendite.

Ratio tertia. Antiquis, ac recentibus conſtat
exemplis, exedram, ſeu Capituli locum dæmoni
exolum, & intolerabilem eſſe, cùm quicquid ferè
alibi à Monachis lucratur, ibi deperdat, quod ip-
ſe S. Dominico dixiſſe fertur, cùm cœnobij offici-

nas lustrasset, libensq. ingressus fuisset, monitusque, ut in locum illum introiret, validissimè reluctaretur. Si ergo capitalis inimicus noster perspecta rei experientia coactus capituli bonum extollit; quo supplicio dignus foret Monachus, qui illud pro virili parte sua non aleret, eoq. ad salutem vteretur?

Ratio quarta. Quicquid in confesso nostro fit, totum spiritu Dei plenum, & multo charitatis melle conditum videtur; si eius institutio, Prælatorum mens, & mos, & patrum modestia spectetur. Et si enim nonnihil amarulentum proponatur, aut alicui obijciatur; adeò tamèn leue est, & tam leniter profertur; ut qui ea de causa actum illum detestaret, non sanè Monachus, sed miles aliquis cuiusvis admonitionis impatiens appellari deberet. Si ergò, quæ subamara videntur, tanta dulcoris copia temperantur, & ex alijs capitibus actus ille pietatis feracissimus est; quàm acer esset boni communis hostis, qui non illum amaret, ac promoueret?

Ratio quinta. Interest profectò multum, ut in creberrimis vitæ huius ambagibus, & lapsibus sit stata aliqua & frequens medicina, qua uti possimus. Interest, ut à futuris casibus præuijs monitis præseruemur. Interest, ut passim obrepentes extirpentur abusus. Interest, ut spiritus iugi intentione fatigatus roboretur. Cùm ergo bona hæc omnia abundè proueniant in actu illo, quem Clementissimus Deus iuxta Euangelicam doctrinam, prosperare creditur, cùm sint ibi multi in eius nomine congregati: dici vix potest, Mona-

chum aliquem vel communis boni, vel sui curam gerere, qui actum tam pium, quæ hucusque constitit, integritate præstare non satagat, & ritus illos è Christiana humilitate ortos minimè probet, ac exerceat.

Vidistis, patres, quàm referat, actum hunc, quem ex regulæ præscriptione, ac maiorum nostrorum laudatissima consuetudine celebramus, à vobis magni pendi, & inuiolatè obseruari. Communis boni, propriæq. perfectionis pondus pensitastis. Quid ergo superest, nisi vt doctrinam vobis à primis renunciationis vestræ diebus traditam exequi pergatis eò accuratiùs, quò maiores temporis lapsu vos oportet fecisse progressus? Didicistis sanè, Monachum statim ac signum ad hunc actum dari animaduertit, debere se comparare, & animo demisso diuinam precari maiestatem, vt ex concione, cæterisq. ritibus eum, quem expetit fructum referat, puriorq. ex eo quasi balneo prodeat, quàm ingreditur. Didicistis, Monachum aures mites ijs, quæ monentur, præbitorum, & cuiuscumque tandem aptentur, vsurum se illis non secus ac si ipse priuatim instrueretur. Didicistis, quo candore cuncta promantur, & quàm sit turpe ob lenia monita perturbari, aut mæstitiæ pondere deprimi. Hæc, aliaq. similia didicistis. Nihil ergo noui obtrudimus, nihil noui oneris inferimus, sed pro Christo legatione fungentes, & officio ipso astricti obsecramus, vt hoc ipsum, quo sub ingressum imbuti estis, perseueranter seruetis.

Introspectite vos ipsos, & dicite, quid de Monacho

nacho miti, & docili sentiatis, qui hoc in loco quicquid profertur, tanquam oraculum cœleste accipit, syncrè interpretatur, alacriter exequitur? Dicite rogo, quid de illo opinemini? Omnino credendum, eiusmodi monachum spiritualibus bonis diuitem à vobis existimari. Si enim locus hic ad culpas alibi contractas expiandas dicatus est; si est meritorum ferax, si ad futuros armat insultus: negari nequit, quin monachus occasione hac piè, ac prudenter vti assuetus locupletior multò, quàm alij, lenti pugnatores, euadat. Negari profectò nequit, quin Clementissimus Deus leuia errata facillimè illi condonet, gratiamq. vbertim refundat. Si enim publicano, statim ac culpas fateri cœpit, tam liberaliter indulgit; si seruo nequam procidenti immensum decem millium talentorum debitum dimisit; quàm pro parte existimatis, monacho leuiora deprecanti, seseq. coram diuina ipsius maiestate, totoq. patrum confessu hoc in loco prosternenti veniam concessurum? Cæterùm ipse, qui cordium inspector est, nouit, quo quisque affectu hisce proficiendi occasionibus vtatur. Prudentis, ac pij monachi animo hæret illud regij vatis votum:

Proba me Deus, & scito cor meum, interroga me, & cognosce semitas meas. Et vide, si via iniquitatis in me est: & deduc me in via æterna. Ps. 138.

Quasi ad sensum monasticæ disciplinæ in hunc modum enunciaret. Non detrecto capituli actum; nolo esse hæres Adæ, qui à te monitus cœpit excusationem prætexere. Precor porius, vt à te animorum cognitorè examinet: oro, vt opera

discutias mea; vt si quid non æquum latet, corripiar, & corrigar, ne à via exorbitem, quæ ad æternitatem ducit. Quid expectatis vltra? Hoc est votum monacho mundi contemptore, suarum domitore passionum, cæliq. expugnatore dignum. Hæc est inuicta animi fortitudo. Hac planè ratione, in hunc locum ingredi, hac ipsa ceremonias omnes humilitate, ac mansuetudine Christi subnixas exercere debetis, vt copiosus cælestium bonorum prouentus existat.

Exhortatio de correptione humiliter ferenda. Cap. XXXIV.

DE correptione animo demisso accipienda, dicturus, præmitto Apostoli monitum à bonis Prælatiis fida memoria seruatum:

Gal. 6. Si præoccupatus fuerit homo in aliquo delicto, vos, qui spirituales estis, huiusmodi instruite in spiritu lenitatis.

Correptio quippè leniter inferenda est, quod me, dum præsum, obseruaturum opè diuina polliceor. Illud verò hac exhortatione digerendum est, quod ad vos attinet, vt scilicet correptionem humiliter feratis, iuxta doctrinam, quam Christi schola commendat. Nostis confessum hunc per hebdomadas singulas celebrari solitum, ad Congregationis totius, & cuiusq. vestrum bonum esse opportunissimum, & planè suauem. Vnum dumtaxat videtur nonnihil austeritatis præferre, correptio videlicet leuium culparum, qua quis à demone extimulatus posset abuti, ne actum
hunc

hunc omninò probaret. Quapropter ad rem erit, rationes promere, quibus correptionis humiliter acceptæ bonum ob oculos positum animos vestros, ad eam non modò non refugiendam, verùm expetendam permulceat.

Ratio prima. Medicus amaram potionem, præscribens, minister porrigens admonensve, vobis minimè exosi sunt, imo grati, atque dilecti, cum ad eam, quam optatis, sanitatem acquirendam vtilia quædam instrumenta sint. Cum ergo Prælatus corripiciens, vnus, vel alter è confessu admonens ad perficiendam animi salutem, leui quadam purgatione, tanquàm spiritualia instrumenta concurrant, quænam obtendi potest ratio ad correptionem indignè ferendam? Profectò nihil excipi posse videtur, nisi praua ægrotandi voluntas, quam Deus auertat.

Ratio secunda. Meritum bonorum monachorum illatas correptiones patienter ferentium, est planè maximum, non ex eo tantùm capite expensum, quod ad virtutis exercitium pertinet, sed ex adiuncto totius confessus exemplo, quod est profectò efficacissimùm. Habet enim nescio quid viuz cuiusdam energiz illa intrinsecus nata exteriusq. sine simulatione testatà humilitas, cuius vi pectora quoque dura molliantur. Si ergo oblata correptionis occasione meritum ex profectu proprio, & aliorum pia commotione insigniter angetur; profectò parùm sollicitus spiritualium diuitiarum mercator est, qui corripì detrectat, vel monitionem non latus admittit.

Ratio tertia. Seculares intemperantes, nego-

ciorumq. gestores vbi à suis præfectis, aut amicis monentur, animaduertentes id in ipsorum bonum cedere, patienter agunt, quòd sibi omnino persuadeant, si correpti exandescant, se boni nominis iacturam facere, neque ad vllum in Rep. magistratum gerendum, vel negocia expedienda idoneos censerì: immites quippe ex communi sententia, neque consilio, neque præfecturæ, neque negotiorum expeditioni apti creduntur. Quomodo ergò monachus ad opus vllum egregium idoneus existimabitur, qui correptus perturbatur, nequitq. sedari? Sanè sibi ipsi, erga futurum Dei præsensq. hominum iudiciũ, vehementer nocet.

Ratio quarta. David à Nathan correptus humillimè acquieuit. Petrus quoque à Paulo reprehensus mira animi demissione correptionem accepit. Cur ergo monachus à Prælato admonitus indignetur? An iustitiam prætexit? Profectò tamen si foret innocens, eo ipso quod innocentiam tueri, & obiectam leuem culpam reiicere satagit, à bonorum consuetudine recedit, & apud patres confidentes parũ proficit. Nimirum iustus accusator est sui, Deoq. sui defensionem, vbi oportuerit defert.

Ratio quinta. Christus Redemptor noster accusatus tacuit, cùm de innocentis vita perdenda ageretur. Quomodo ergo monachus levis culpæ admonitus correptionem suauem recusat? Quomodo mutato vultu eum, qui monuit, non tam beneuole, ac ante admonitionem intuetur? Nonne hic apertè proditur animus Christi Schola-

pro-

proculdubio indignus, qui è domicilio iustorum expelli meretur? Nonne manifestum secularis animi sub monastica veste impostor iste gestat inscriptum?

En patres, quid rationes allatz conficiunt. Ecce quò procurrit monachus delicatus, ac degener, qui statim ac monetur, resilit, atque repugnat. Eò certè progreditur, ut non monasticam solùm, sed Christianam disciplinã videatur abijcere. Si enim iuxta Evangelicam doctrinam non monachis modò, sed hominibus vniuersis promulgatam, facies percussa aptanda nouo icui est, quid excusare poterit monachus, qui ne capillum attingi æquo animo fert? Pessimè quidem agunt, qui hoc loco, vel alibi dum corripiuntur, aut postmodum, conceptum iræ, aut indignationis sensum indicant; neque credi potest eos, ut par est per arctã perfectionis viam expedite progredi. Porro inter nostros mos inualuit, ut culpe confictæ monachis imputentur ad humilitatem, ac mansuetudinem experiendam, ut scilicet pateat, qua mente correptionem accipiant, an se ab obiectis purgare, & iusticiam propriam asserere velint; vitioq. vertitur, quicquam loqui, vllumve perturbati animi signum exhibere. Nostis hoc. Rogo ergo nunc, an de hac doctrina exequenda cogitetis? Imò rogo, an de Christo imitando constanter agatis? Audite Evangelica verba hæc:

Et cum accusaretur à principibus Sacerdotum, & senioribus, nihil respondit. Tunc dicit illi Pilatus: Non audis, quanta aduersum te dicant tibi.

*Matth.
27.*

Stimo.

stimoniam? Et non respondit ei ad ullum verbum, ita ut miraretur principes vehementer.

Verba hæc feras immanes lenirent, ferrea pectora mulcerent. Nostis, quis & à quibus accusaretur. Christus à Iudæis. Cur ergo non respondit? An suæ iustitiæ conscius non fuit? An non ei luce meridiana patentior fuit accusatorum peruerfitas? Quod si criminatōribus responsum reddere abnujcit, Pilato saltem non ita male affecto cur non respondit? An mundo nocuisset Christi responsio, qua suam tueretur iustitiam? Animaduertite, patres, quid exemplar nostrum Christus in hac re porro grauissima nos docere voluerit. Ne Christi sensum ad excusandas excusationes in peccatis detorqueat. Vtinam arguti quidam monachi disputatores, suiq. defensores resipiscant. Mirum est sanè, eò vsque aliquos excæcari, ut cum efficacissimas rationes, & exempla ad virtutem colendam eis proposita, reijcere nequeant, semper tamen quoties corripiuntur, Christo dissimiles euadant, excipientes videlicet hanc illamue circumstantiam; ob quam æquum sit, iustitiam in particulari euentu propriam asserere: ex quo efficitur, ut penè nunquam à Prælatīs, vel mitissimè corripi queant. Hæc cinne est doctrina, quæ in Christi schola demum ediscitur? Recedite à consuetudine taurorum istorum, qui cornibus pugnant, vos, qui estis agni, mansuetudinem profitemini. Recolite agnum illum, qui coram tondente se obmutuit, tacitique non modo salubria monita, suauī Dei spiritu deprompta. verum & correptiones acres accipi-

cipite, æternæque salutis negocium sollicitè gerite.

TEXTVS VNDECIMVS.

De Ieiunio fratrum.

Ieiunium singulis diebus, exceptis Dominicis, obseruetis à festo Exaltationis Sanctæ Crucis usque ad diem Dominicæ Resurrectionis, nisi infirmitas, vel debilitas corporis, aut alia iusta causa ieiunium solui suadeat, quia necessitas non habet legem.

Observatio thematum, quæ ex hoc textu peti possunt ad exhortationes solitas.

Agi potest de ieiunij bono. Mox differi poterit de iusta causa ieiunium relaxandi.

Exhortatio de bono Ieiunij. Cap. XXV.

Clbi vetiti esus malorum, quibus genus humanum obruitur, origo fuit, ut ex sacra Genesios historia nostis. Noluic videlicet primus parens noster à fructu prohibita arboris abstinere, immensumq. proinde nobis bonum ademit. Quocirca ad tam enormis lapsus correptionem ieiunium in morem inducere decuit, cuius observatio in nouo præsertim testamento vigit, quod in plerisque ordinibus monasticis perspicere potestis, vbi præter leges ieiunij ecclesiasticas, aliæ de eodem bono lata sunt, quibus diuturnior eius custo-

custodia indicitur. In ordinum istorum agmine recensetur noster, cuius ieiunium ab Exaltatione Crucis vsque ad Pascha procurrat. Cum ergo lex hæc sancita fuerit, & eam explere intersit plurimum, ieiunij bonum rationibus multis commendandum est, ut animis hæreat.

Ratio prima. Licet multis, ac sæuissimis bellis in hac mortali vita passim infestemur, exploratum est tamen, carnis prælia omnium esse periculosissima. Cum ergo ad ea vitanda, vel victoriam comparandam, ieiunij remedium sit maxime appositum; nemo victoriæ cupidus illud non probare, & quantum per vires licet, obseruare posse videtur. Et quidem rationis huius energia inde patet, quod subtracta tentationum materia, licet nonnulla excitentur bella, non sunt æque graua, & periculosa, ac illa, quæ corpore bene pasto ingruunt, & vires acquirunt.

Ratio secunda. Qui ieiunio deditus est, mentis aciem non obtundit, neque grauat, quò minus apta semper, ac expedita sit ad negocia gerenda, variosq. virtutum actus exercendos. Quo sanè bono carent, qui corpus epulis farciunt, seq. ipsos adeò hebetant, ut vix rei alicuius discussioni pares sint, & velut inanimes trunci, ad opera homine digna per horas multas inepti desideant. Si autem deformitas hæc in secularibus deprehensa displicet; profectò disciplina ieiunij in monachis laudanda, & alenda est.

Ratio tertia. Ieiunium creat animum vigilem, dum subtrahit longioris somni materiam. Omnino autem patet, vigiliam boni monachi

notam

notam esse, cum somnus ei breuior, quàm in seculo, & longius rerum monasticarum studium, esse debeat. Quomodo ergo vigil, & perspicax erit, si corporis pondere ex ingesto cibo, deprimatur? Quantò fiet vigilantior, ad exiliendum è lecto agilior, & ad obeundos actus quotidianæ disciplinæ promptior, si diuturno ieiunio assuescat, nutrimentoq. necessario naturæ minimè negato, superfluum refecet?

Ratio quarta. Ex instituto nostro Dei præsentiam iugiter menti impressam gerere, & res diuinas meditari debemus: cui profectò mentis intentioni nihil opportunius excogitari posse videtur, quàm ieiunium, cuius observatio perennis quædam oneris detractio, & motuum rebellium animum à rerum cælestium studio diuertentium castigatio est. Quis ergò non videat, proberq. longi ieiunij nostri congruentiam, si meminit officij, quo, ad perennem mentis eleuationem astringimur?

Ratio quinta. Quanti sit ponderis ieiunij bonum, multis ex capitibus alijs posset euinci: cæterum monacho Christi imitatori sat est, nosse, longum sui Redemptoris quadraginta dierum ieiunium, & totius frugalissimæ vitæ suæ decursus. Sat est, nosse tot monachorum, & anachoritarum millia ieiunio penè miraculoso astricta, quæ prudenti consilio, corporalis cibi subtractione spiritualem pastum multò pinguiorem, ac delectabiliorem obtinuerunt.

Hiscæ argumentis minimè ambigendum est, patres, quin vos flecti sinatis, & regulæ præscriptio-

ptio-

ptionem, quam de ieiunij obseruatione accepistis, tenaciter custodire velitis. Quòd felicius ex voto succedet, si mores sanctorum, & multorum è nostris in hoc genere identidem recolatis. Qui strenuus miles cupit esse, bellicosos viros, quos fortitudine excelluisse fama est, crebrò memoria repetit, vt ijs velut stimulis ad fortiter dimicandum incitetur.

Non vobis Basilium aliquem, aut Bernardum commemoro, sed pugnatōres nostros, quorum exempla recentiora sunt. Nobis profectò compertum est, plerosq; è nostris regulæ ieiunijs, quæ videbantur pauca, plura multò addidisse, ac pæne dumtaxat, & aqua, satis frequenter victitasse, vt Prælatos oportuerit esse peruigiles, ne se illi inedia conficerent. Hoc certè nobis perspectum est, fortasse autem, & vobis: possemusq; multorum catalogum contexere, nominaq; proferre, si id aut prudentia, aut mos noster exigeret. Si ergò à Prælatibus laboratum est, vt ieiunij amorem nimium, cultumq; reprimerent, qualis status Congregationis nostræ foret, si aduerso cursu conandum iam esset, vt præscripta ieiunia obseruarentur? Quàm funesta hæc sortis mutatio accideret! spero equidem vos ope diuina roborandos, vt pro viribus antiquam hanc, & meritis fecundam consuetudinem sustinere, & ad posteros traducere integram possitis. Ne concidatis vnquam, neque vincendi occasiones respuatis. Certum prorsus est, bonos monachos fame interdum incredibili torqueri, vt vix, nisi de hora refectioni decreta cogitare valeant. Exploratum est,

est, lautis seculi epulis, dæmonis arte per imagines viuas impressis ita exerueiari, vt immensa excresecat appetentia. Cæterum hæc sunt prælia iustorum, quibus fortiores euadunt, dum mori se malle, quàm ieiunium relaxare constituunt. Non in cassum quotidiano agone decertant: nam præter meritum spirituales opes, solet Clementissimus Deus fatigatos mirificè reficere, lautiorumq. mundi epulis cibum animæ palatoingere, quo illi vegetiores fiunt, quàm si regum mortalium mensis nutrentur. Hunc cibum appetite, qui semel sumptus cor erigit, & austerioris vitæ tenax efficit. Via, quam carpinus, ascensus, quidam in patriam nostram est; ex Aegypto in terram promissionis iter inchoauimus. Quomodo autem onerati ascendemus? Desideria vestra columbæ gemitibus similia sint, columbæ inquam gementis, pennasq. quatientis, vt in receptaculum quieti destinatum quantocius pertingat. Nunc in agone contenditis, in fame, & siti, in frigore, & nuditate: verum non semper in hac lucta cum tot hostibus congregiendum est. Succedet enim fami saturitas, nuditati vestimentum. Fortiter concertate, & ad candidissimam gloriæ vestem, & lautissimam, in Regno Cælorum, Christi mensam per arduam ieiunij viam ascendite.

Exhortatio de causa iusta ieiunium omit-
tendi. Cap. XXVI.

Satis profectò cæcus foret, qui in ipsis austeritatis nostræ præscriptionibus prudentiam legisla-

legislatoris suauitatem admiscens minimè dignosceret, quod vel ex textu hoc, quo ieiunium septem mensium præcipitur, planè conuincitur. Tria quippe capita subiunxit, infirmitatem, debilitatem, aliamq. iustam causam, quæ multiplex esse potest, ut ieiunij abstinencia relaxetur: quæ certè temperie, quod asperum edixerat, leniuit, & suaui se Christi spiritu duci demonstraui. Hic ergo spiritus legum nostrarum est, quod hoc loco præfari, & mihi sanè, & vobis expedire videtur. Mihi quidem, ut non ægris, aut imbecilibus tantum, sed laborantibus, ex itinere fessis, & varijs functionibus, quas obeunt, fatigatis ex lege compatiar: Vobis autem, ut dum Prælatorum paternam erga vos curam contemplantini, iustam soluendi ieiunij causam non laxè interpretemini, quod quàm sit æquū, ex his rationibus conijcite.

Ratio prima. Facilitas in ieiunij abstinencia relaxanda, intemperantis animi argumentum est. Iuxta communem quippe philosophorum sententiam, qualis est cuiusq. affectus, tale fert de rebus iudicium: atque adeò qui facilè iudicat, hoc aut illo tempore, aut occasione abstinenciam legalem esse remittendam, proculdubio se ità affectum indicat, ut abstinenciam oderit, aut tepidè amet. Suspecta ergo est facilitas illa, ac per hoc ipsum, à bonis monachis debet coerceri.

Ratio secunda. Qui sibi in ea facilitate indulget, velut in lubrico loco pedes locat, vnde leui quoque impulsu præcipitetur. Sic enim vsu venit, ut qui ea fragilitate facilis relaxationis laborant,

borant, renitente etiam conscientia, vbi fames vrget, ieiunij legem violent, quod experientia diuturna constitit. Si ergo facilitas illa lapsui, siue transgressioni viam aperit, cauendum profecto est, ne lex ieiunij soluatur nisi causa ad timorati animi sensum, iusta suppetat.

Ratio tertia. Nostræ salutis inimicus famem irritare nouit varijs artibus, quibus ad monachos impugnandos abutitur, & vt in proxima exhortatione obseruauimus, incredibilem plerumq. excitat appetentiam. Iam ergo hoc monasticæ disciplinæ documentum antiqua sanctorum obseruatione deprehensum habemus, ne languori cuiuslibet, aut apparenti necessitati, quæ dæmonis impostura sæpè confingitur, fidem habeamus, sed fortium Christi militum more pugnemus.

Ratio quarta. Nulla tam fraudulenta vulpes est, ac propria caro, quæ incautos monachos crebrò seducit. Nunc enim somni, nunc cibi necessitatem mirificè simulat. Cui certè doctrinæ fidem astruit experientia: Vt enim nonnulli in choro, vel oratorio graui somnolentia oppressi, & necessitatis prætextu ad cellam petita venia recedentes statim euigilant, neque licet id cupiant, dormire valent; ita & alij fame quadam, quæ inexplibilis eis videbatur, exorta incitati, veniaq. impetrata vescentes faciliè animaduertunt, appetentiam illam modica cibi, potusq. quantitate sedari. His ergo obseruationibus fidus legum custos vti debebit, ad iustam soluendi ieiunij causam non temerè credendam.

Ratio quinta. Spectata nostrorum Prælatorum

L

rum

rum charitas in ope ferenda ijs, qui quauis de causa refectione indigent, debet proculdubio fideliores ieiunij obseruatores efficere: quod in quauis alia necessitate pariter asserendum. Quod si quis sibi quicquam deesse causetur, curæ potius sui nimis, quam Prælatorum incuriæ id posset ascribere. Diuino quippe iudicio id fieri videtur, ut qui sui sollicitus est, à Deo, ac proinde à Prælato, qui eius nomine præsidet, obliuioni tradatur, tametsi curet reminisci. Sic nempe culpa illa plectenda est. Si ergo à Deo nutriri optatis, perspectæ charitati eorum, qui præsunt, vos ipsos credere, & quod ad proprium spectat iudicium, in causa soluendi ieiunij censenda, seueritatem potius, quam indulgentiam sectari debetis.

Spero equidem, vos fidos legum fore custodes, & cum hoste domestico validè certaturos, ut Deo probati ample remuneremini. Nolumus vos arctare, aut quicquam adijcere ijs, quæ regula ipsa traduntur. Imo fert animus, lege uti, ad vos largè solandos, cum lex ipsa cum nobis spiritum videatur imprimere, qui ad commiserationem pronus est. Et quidem vestem hanc, qua regimur, exuere, & quemq. vestrum induere, exemplo Ionathæ in David, ad eamq. proportionem cibum nobis subtrahere, vobisq. erogare, vellemus. Id ergo dumtaxat hortamur, quod vobis cordi est, ut bonum, quod possidetis, felicius cumuletur. Quod ut ex sententia cedat, dogma illud pestilens cauete, quo aliqui inter sanctos minimè sancti, velut laqueos, quem tetende-

rant,

rant, capti sunt; prætexentes ad ieiunij nostri observationem eneruandam, culpam solummodo venialem admitti ab ijs, qui ieiunium nostrum, omittunt, culpam scilicet, quæ aqua lustrali possit elui, qualis est linguæ licentia, ad otiosa verba, vel officiosa mendacia: proptereaq. transgressionem illam non ita exaggerari, aut horrore esse, debere. Pestilens est dogma hoc: quod si ad alia etiam disciplinæ nostræ capita deriuetur; de Carmeli flore, qui summo labore renatus cælesti munere alitur, actum est. Væ desertoribus instituti, qui culpas leues, ut mortem ipsam non perhorrescunt. Etenim, ut in hac ipsa ieiunij causa exemplum aliquod tremendum proferamus, nobis constat, aliquos venialibus in hoc genere, culpis assuetos à Deo sensim fuisse derelictos, donec à statu monastico expulsi sunt, vel in laxiorem ordinem infausa commutatione transiere.

Quorsum autem illos ijs culpis leuibus assuetos appellemus cum eas rarò commisisse prudens coniectura sit? Verùm in loco tam exactæ iustitiæ laude conspicuo, ijs culpis vel rarò scdari res fuit adeò deformis, sanctorum consortio adeò indigna, Deoq. tam exosa, ut tepidos illos quadam iustæ indignationis, velut nausea, diuina, maiestas euomerit, ut non ab re eis aptetur celebratum illed:

Adhuc esca eorum erant in ore ipsorum, & ira Dei ascendit super eos. Pl. 77.

Ascendit videlicet ut pessundaret, ac proculcaret ingratos, qui à leuibus exordium ducentes ad culparum mensuram paulatim derelicti, in

graviore demum prolapsi, ac explosi sunt. Has tragœdias certis euentibus notas referre placuit, ut ex aliorum damno cautiore fieri, & salutem ex inimicis nostris similium transgressionum fuga parare possitis. Estote fideles legum observatores, creditamq. Deo vestri curam ne intemperanter resumite. Ieiunia vestra benè repensabit Christus, ad cuius mensam victa iam morte confidebitis. Extendet famelicus monachus manum in arborem vitæ, & fructum dulcissimum carpet, dicetq. lætus: Fructus hic ieiunio emptus est, pro quo esuriem tuli, maluiq. fame torqueri, quàm ieiunij legem vlllo prætextu violare. Ieiunia transiere, vitalis fructus æternus mihi pastus, & tædij expers saturitas erit. Hæc cogitate, & iter cœptum animosè conficite.

TEXTVS DVODECIMVS.

De Abstinentia Carnium.

A Besu carniū abstineatis, nisi pro infirmitatis, vel debilitatis remedio sumantur, & quia vos oportet frequentius mendicare itinerantes, ne sitis hospitibus onerosi, extra domos vestras sumere poteritis pulmenta cocta cum carnibus: sed & carnibus supra mare vesci licebit.

Observatio thematum, quæ ex hoc textu peti possunt ad exhortationes solitas.

D Ici posset de vitanda facilitate esus carniū; verum quia hæc facilitas per rationes,

nes, quas in proxima exhortatione produximus, dissuaderi potest, vtilius videtur de mendicandi exercitio differere. Poterit etiam de bono extra domos nostras exemplo dici.

Exhortatio de exercitio mendicandi.

Cap. XXVII.

A Postolicæ paupertatis exercitium summis votis expetendum est, vt bona plurima, quæ parit, animam verè diuitem efficiant. Cæterùm dolendum est, quàm pauci ex ijs etiam, qui eam profitentur, paupertatis exercendæ occasionem amplectantur. Mirūq. profectò est, quo pacto cū emissio illius voto, perennis, & accurata eiusdem fuga consistat. Constat certè plurimos qui sibi satis iusti videntur, prætexere, nolle se rebus superuacaneis vti, sed id dumtaxat velle, vt necessaria minimè desint. Verùm si res necessariae semper suppetant, qualis paupertatis cultus est? Si autem ita suppetant, vt sine vlllo labore parentur, cur non potius prouidentia commodata, quàm paupertatis exercitium appelletur? Profectò si monachus instituti sui memor, & æquus æstimator esset, non eam commoditatem, sed mendicitatem, in qua voti exercitium, & multiplex pietatis cultus elucescit, optaret, quod his rationibus asseritur.

Ratio prima. Regula nostra, qua Dei voluntas exprimitur, tanquàm certum statuit, monachos iter facientes mendicaturos, quod ex emissio paupertatis voto palam deduci videtur. Nisi enim

excipiatur necessitas, quæ ex morbo, vel alia idonea causa enascitur, mendicandi actus statui nostro nativus est. Quid ergo censendum de monacho illo, qui eiusmodi actum exercere derideat, ubi nullam coram divina maiestate, & viris monasticæ discipline consultis, iustam exceptionem afferre valet? Profecto emissi voti de gener observator est.

Ratio secunda. Vbi monachus prospere valet, neque à Prælati iusta aliqua de causa, commodior aliqua itineris faciendi ratio præscribitur, pedes viam carpere debet. Cur enim si robustus sit, neque via difficilis obstat, aut per obedientiam aliud decernatur, id non observet? Si autem id exequi omnino debet, quid congruentius, quam ut eleemosynam postulet, conscientiamque propriam fidelis voti custodia exhilaret?

Ratio tertia. Certa quidem experientia probatum est, Deum Clementissimum mira providentia mendicantibus adesse, eosque è perspecta in hospitio, & victu Dei ipsius ope voluptatem, haud modicam capere. Cum enim Apostolicis vestigijs insistant, nunquam ita destituuntur, ut rebus necessarijs careant, imò eas latius, quam domi recipiunt. Si ergo mendicandi actus è præfenti Dei auxilio lætitiā elicit, cur ita à plerisque refugitur?

Ratio quarta. Non fert animus asserere, actum illum inexpertis non esse difficilem. Sit planè difficilis. Verum si in arduitate illa superanda Christi humilitas, & mansuetudo succrescunt, cur actus tot, tantorumque bonorum ferax non expectatur?

ratur ? Sanè nonnullis ratio hæc adeò probatur ,
vt videatur eis immensi cuiusdam boni prouen-
tus deesse, si mendicandi desit occasio .

Ratio quinta . Mos verorum monachorum est,
non mendicare modo, vbi id monet occasio , ve-
rùm Deo gratias agere, vbi grauiter repelluntur.
Bonum quippè illud repulsæ ob Christi amorem
acceptæ, pretiosum sanè, ac proinde auidè arri-
piendum eis videtur . Et quidem, quo repulsa est
acrior, eo lætantur magis, impenseq. cupiunt, fre-
quenter reijci, vel ob meritum auctius, vel ob
cælitus delapsam voluptatem . Quid autem cum
his, qui bono conscientia testimonio gaudent,
commune sit illis, qui diuitum secularium more,
iter faciunt, & Christi paupertatem præferre
erubescunt ?

Ratio sexta . Quòd ad Dei iudicium attinet,
minimè dubium est, quin mendicandi actus mo-
nacho inopi sit laude dignus . Quòd verò ad ho-
mines spectat, exploratum est, eos vno, vel alte-
ro excepto ad commiserationem flecti, & de mo-
nacho eleemosynam modestè postulante bene
opinari . Cur ergo id non ametur, quod Deo,
hominibusq. probatur ?

Omniò credendum est, patres, vos non ita ef-
se proteruos, vt Apostolicam doctrinam impro-
bare, aut extenuare velitis . Non hic de ijs disse-
rimus, quos à communi sententia morbus, aut
ratio aliqua à Prælatiis expensa eximit . His po-
tius miseremur, libenterq. nos mendicandi susci-
peremus laborem, qui eis in refrigerium verte-
retur . De ijs ergo dumtaxat agimus, qui pro-

euldubio mendicare, Deo, Angelis, & hominibus iucundum spectaculum exhibere, conscientiamq. propriam exhilarare possent. Hos monemus, rogamusque, cur mendicitatem formident? An dedecori eis sit? Porro honorificentior, quàm equitatio, & larga in hospitij expensa est: hæc enim emissi voti violati, aut ægre seruati suspicionem, illa expleti voti opinionem ingenerat. Quid ergo timent? An necessarij victus defectum timent? Verum quomodo is deesse queat? Audite Christum Apostolos rogantem in hæc verba:

LUC. 22. *Quando misi vos sine sacculo, & pera, & calceamentis: nunquid aliquid defuit vobis?*

Sic Christus interrogat, Apostoliq. respondent: Nihil: Sponsor Christus est, ad cuius fidelitatem necessarij victus, & lecti prouidentia pertinet. Etenim quicquid aliàs ad rem hanc è variis capitibus congeri potest, æquare nequit efficacissimum Christi aliquando mendicantis exemplum. Quid obsecro diceretis, si concessum vobis fuisset, Christi manum extensam ad oblatam, vel petitam eleemosynam capiendam, intueri? Ergo ne Vnigenitus Dei Filius creaturæ suæ mendicus euasit? Quomodo erectæ ceruices exemplo tanto non flectuntur, & non monachus modo, sed Christianus quisque mendicandi occasiones non sedulo captat? Longè alia est via cælestem patriam petentium, ab ea, quæ ducit ad interitum. Illa, arcta cum sit, non capit nisi homines sese arctantes: hæc lata est, & laxè viuentes admittit. Cæterum illa in latissimam Ciuitatis Dei plateam, camposq. æterno virore latos definit: hæc

tar-

tartari demum angustijs astringitur. Quid cogitatis? Quid ambigitis? Benè profectò est transire per ignem, & aquam eos, qui educendi sunt in refrigerium.

Exhortatio de bono exemplo extra domos nostras præbendo. Cap. XXVIII.

O Blata virtutem colendi occasio monachum Dei zelo flagrantem à tepido discernit. Deus animorum cognitor est, nouitq. qua quisque virtute præditus sit: ac homines, qui interna cognoscere nequeunt, facillè seducuntur, dum externa tantum obseruant. Euenire quippe solet, vt eisdem actus virtutum generosus, & degener obire proponant, vt nullum eminens in alterutro discrimen appareat: cæterum præsens occasio, quid quisque sit, & valeat, luculentè demonstrat. Generosus enim virtutis exercendæ occasionem nactus in proposito constanter persistit, degener deficit, & difficultati succumbit: quod & alijs certè multis, & familiaribus quoque disciplinæ nostræ patet exemplis, qualia præsentis regulæ textus occasione cernuntur. Cum enim veniatur, vt pulmenta cocta cum carnibus nostri edere queant, ne sint hospitibus onerosi, & supra mare carnibus etiam vescantur, plerumque contingit, vt monacho anceps cogitatio subeat, an hospitibus molestiam afferat, & an in breui aliqua nanigatione, vbi alia esculenta suppetunt, carne vesci expediat. His ergo in euentibus quæ virtute quisque præstet non obscurè indicat. Nos
verò

verò licet, quod lege permissum est, improbare nolumus, hortamur tamen ad meliora sectanda, & seculares tam in his, quam in alijs occasionibus exemplo bono instruendos, quod ratione multiplici asseritur.

Ratio prima. Sanctitatis persuasio, quæ secularium animis de nostris monachis impressa est, eò processit, ut bonis operibus quantumvis egregijs vix æquari possit. Si ergo in itineribus, & navigationibus sanos, & robustos, sine ullo valetudinis detrimento solitam disciplinæ nostræ abstinentiam retinere valentes, videant laxiora sequi, dicendum videtur, eos non instrui exemplo illo bono, quod prius conceperant. Meliora quippe sibi persuaserant.

Ratio secunda. Monachus, qui accumbens mensæ, ubi ova, & lactei cibi faciliè apponuntur, vel apponi possunt, & rogatus pulmenta incocta carnibus edit, persuadet, ut plurimum, id sibi licere. At si melioris doctrinæ tenax, comiter respondeat, sibi cibos alios, qui suppetunt, satis lautum esse conuiuium, se non licita modo, sed honesta, & meliora sectari conuincit. Cum ergo satis bene pastus exemplo bono possit seculares ad pietatem vrgere, cur id non efficiat?

Ratio tertia. Compertum est, ex facilitate hospitibus conuiuendi, bonum Congregationis nomen alicubi diminutum, cum eo, quod vnus è nostris agere conspicitur, de reliquorum virtute iudicium feratur. Cum ergo monachus bene valet, & opinionem de nostris conceptam sine ullo damno alere potest, quomodo lentescit,

& in

& in mitiora propendet ?

Ratio quarta . Consuetudo nostrorum est, austeram retinere disciplinam, apud eos quoque seculares, à quibus molestius incitantur, siue ob consanguinitatem, siue ob causas alias minimè indecoras . Constatq. eos ipsos, qui abstinentiam ægre ferre videbantur, postea tam commendatæ, eaq. de causa piam animi commotionem ostendisse . Quid ergo prodest facilis assensus rogantibus prætitus, qui animos non ita pie afficit ?

Ratio quinta . Non sunt adeò cæci, aut obdurati monachi nostri, ut occasione virtutis colenda lapsa, non sentiant aliquos ictus conscientie suggerentis, quantò fuisset Deo acceptius, & secularibus utilius, austeræ disciplinæ tenacitatem, quàm laxitatē amplecti. Sit quisq. sui ipsius testis, ac iudex . Si ergò varia occurrit proficiendi occasio, & proximi inde ad pietatem inflammantur; profectò parùm sollicitus opum cælestium mercator est, qui bonum exemplum præbere non certat.

Audistis, quibus rationibus exempli boni æstimatione asseritur, & quàm referat, meliora in hoc genere exquirere . Multa sanè licent, quæ minimè expediunt . Licet quidem ijs, quæ à regula conceduntur, uti, verùm an id expediat, ex circumstantijs censendum est . Sat est, aiunt nonnulli legi non aduersari; verùm nos meliora monemus, bonosq. monachos nouimus, non id spectare dumtaxat, quod bonum, sed quod perfectius est . Quemadmodum enim in generis humani redemptione non id tantummodo præstat

Chri-

Christus, quod sat fuisset, sed largiora refudit; ita pij, generosiq. animi, non quæ sufficiunt tantum, sed quæ meliora, Deoq. gratiora videntur, explere nituntur. Mundus festinat occidere, desertorumq. monachorum scandalis validè concutitur. Hic in apostasiam, ille in hæresim tremendo iudicio prolabitur, alius sordidam ducit vitam, & publicus solemnium votorum violator est. Si ergo multa monachorum infidelium coluies Ecclesiam Christi sponsam dehonestat, apertisq. perturbat scandalis; à quibus rogo monachis, nisi à nostris exigendum est, ut perfectio virtutum exemplo Ecclesiam condecorent? Recolite illum B. Tereziæ fundatricis nostræ zelum, & tenerrimum iam morientis sensum, quo se Ecclesiæ filiam esse, dicebat. Recolite, & sensum illum concipite, vestemq. deauratam reginæ à dextris Christi sponsi assistentis, quam alij dilacerant, vel inficiunt, vos, quoad per vires licet integram, mundamq. servate. Non ergo in ijs solum euentibus, quos textus è regula lecti occasione tetigimus, sed in alijs quibusvis eo affectu, quo Apostolus Titum, hortamur, ut præbeatis vos ipsos exemplum bonorum operum, in doctrina, in integritate, in gravitate verbum sanum irreprehensibile: ut is, qui exadverso est, vereatur, nihil habens malum dicere de nobis. Expendite, quàm accuratè homines, qui prælationes, aut magistratus ambiunt, indecoros actus ea præfectura, quam expetunt, indignos vitare studeant, cum sciant, se à multis attentè spectari, quibus placere opus sit. Divinam vos maiestatem spe-

ciatri-

Aatricem habetis in statu hoc , in quem cœlesti consilio cooptati estis, vt regnum æternum parare niteremini . Quid ergo desideratur , nisi vt Deo perplacere conemini , nihilq. deforme committatis , quod improbet ille , qui vos felicissimi regni sui consortes efficiet , si legitimè certasse comperiat . Hæc mente pertractate , & altè impressa retinete .

TEXTVS DECIMVSTERTIVS.

Exhortationes .

Q Via verò tentatio est vita hominis super terram , & qui pie volunt viuere in Christo , persecutionem patiuntur : aduersarius quoque vester diabolus tanquàm leo rugiens , circuit querens , quem deuoret ; omni sollicitudine studeatis indui armatura Dei , vt possitis stare aduersus insidias inimici .

Accingendi sunt lumbi vestri cingulo castitatis , muniendum est pectus cogitationibus sanctis . Scriptum est enim . Cogitatio sancta seruabit te . Induenda est lorica iustitiæ , vt Dominum Deum vestrum , ex toto corde vestro , & ex tota anima vestra , & ex tota virtute diligatis , & proximum vestrum tanquàm vos ipsos . Sumendum est in omnibus scutum fidei , in quo possitis omnia tela nequissimi ignea extinguere . Sine fide enim impossibile est , placere Deo . Galea quoque salutis capiti imponenda est , vt de solo Salvatore speretis salutem , qui saluum facit populum suum à peccatis eorum . Gladius autem spiritus , quod est verbum Dei ,

Dei, abundanter habitet in ore, & in cordibus vestris, & quaecunque vobis agenda sunt, in verbo Domini fiant.

Faciendum est vobis aliquid operis, ut semper Diabolus inueniat vos occupatos, ne ex otiositate vestra aliquem intrandi aditum ad animas vestras valeat inuenire. Habetis in hoc beati Pauli Apostoli magisterium pariter, & exemplum, in cuius ore Christus loquebatur, qui positus est à Deo Prædicator, & Doctor gentium, in fide, & veritate, quem si secuti fueritis non poteritis oberrare. In labore, inquit, & fatigatione fuimus inter vos nōte, & die operantes, ne quem vestrum grauaremus: non quasi nos non haberemus potestatem, sed ut nosmetipsos formam daremus vobis, ad imitandum nos. Nam cum essemus apud vos, hoc denuntiabamus vobis: quoniam si quis non vult operari, non manducet. Audiuiimus enim, inter vos quosdam ambulare inquietè, nihil operantes. His autem, qui huiusmodi sunt, denunciamus, & obsecramus in Domino Iesu Christo, ut cum silentio operantes, panem suum manducent. Hæc via sancta, & bona: ambulate in ea.

Observatio thematum, quæ ex hoc textu duci possunt ad exhortationes solitas.

Potest differi primùm de tentationibus, deinde de studio virtutum, quæ spiritualis armatura est, mox de familiari usu verbi Dei, denique de otio vitando.

Exhortatio de bono, quod in tentationibus paratur . Cap. XXIX.

PRæfens regulæ textus, grauis quædam, & salubris eruditio est, qua in memoriam reuocatur mortalis vitæ conditio, & perennis militiæ, seu tentatio, qua infestamur. Non disceptat, sed supponit hominis vitam tentationibus obnoxiam esse. Quapropter monachus quisque secum statuere debet, se omnino tentandum, ut non turpem fugam, sed claram victoriam meditetur. At hoc neutiquam præstabit, si bonum, quod in tentatione prouenit, non curet habere perspectum. Has ergo rationes percipiat.

Ratio prima. Suspecta est virtus, quæ aliquo experimento probata non fuit: quis enim credat ei, qui grandia pollicetur, si opera promissis fidem non astruant? Cum ergo tentatio, quædam virtutis experientia sit, qui sibi cupit non esse suspectus, tentationis experimentum refugere, aut ægre ferre non debet. Aurum certè igne examinatur, & suspicionem omnem excludit. Ut ergo qui rudem auri massam non excoxit, sibi minimè satisfaciat, meritoque ambigit, an aurum syncerum sit; ita qui virtuti parandæ studet, neque tentationis experientia, quid valeat, deprehendit, non potest propriam virtutem, non habere suspectam, interestque multum, ut tentari non renuat.

Ratio secunda. Victoria vniuersè placet: quis enim victor esse nolit? At victoria sine bello nequit

quit acquiri, paratur autem edomitis hostibus. Cum ergo certum sit, vobis placere victoriam, æquum profectò est, vt tentationis prælium minimè formidetis. Victoriæ decus, & prædam meditamini, & vim rationis expendite.

Ratio tertia. Lætitia, quæ ex parte tentationis victoria succedit, ea est, quæ bonos certatores ad certamen perurgere valeat: quod varia similitudine explicari posset, qualis hæc: Qui requiem post acres neruorum dolores nactus est, ingens quoddam bonum sibi parasse videtur, ex cuius amplexu, vel possessione magna vis lætitiæ subit. In hunc modum tentatione victa succedit pax lætitiæ ferax, qua totus homo mirificè peruaditur, & exhilaratur.

Ratio quarta. Quicquid de lætitiæ successu asseratur, negari nequit, meritum tentationibus magnoperè augeri. Illa enim spectata fides, patientia, constantia, qua ictus validi excipiuntur, animo interim non concidente, sed generosè reluctante, horreum quoddam selecto tritico plenum est, quo monachus ditescit. Cur ergo tentari nolit? Cur conflacescat?

Ratio quinta. Etsi nullum proueniret lucrum, maximi fieri deberet, diuinæ maiestati iucundum spectaculum inuicta fortitudine exhibere. Quibus enim oculis, putatis, sirenum militem grauius impugnatum, & nunquam cedentem, vel de integritate, & constantia quicquam remittentem Deus intuetur? Profectò gratissimum spectaculū, & amplæ remunerationis spe benè fultū est.

Ratio sexta. Recolite amicorum Dei præclarissima

rissima exempla, & proculdubio animaduertetis, decuisse, vt quò Deo acceptiores fuere, eò grauius tentarentur. Quid durius imperari potuit Abrahæ, quàm vt filium immolaret? Quàm acris hæc tentatio fuit? Quid de Iob subtexam, quem Deus dirissimis inimici telis exposuit? Quid de Tobia, cui lumen oculorum ademit? Hi sanè Deo charissimi fuere, & tamen interfuit plurimùm, vt acerrimè tentarentur. Si ergo inter Dei amicos vos recenseri posse, confiditis, ne terga vertatis, sed armis à regula præscriptis, cum hoste sæuissimo dimicare, honorificum ducite.

Appendite nunc rationum pondera, & iudicate, quàm errent grauiter, qui in statu nostro, semastiria concidere patiuntur, quòd tentationibus vexentur. Diuino munere in statum monasticum asciti sunt, vbi est multiplex armatura, qua obsepti victorias illustres de mundo, tartaroq; referre valent: & bellum degeneri corde detrectant. Quænam imbecillitas est hæc? statim, ac armati sunt, deberent ipsi congressum optare, memores Christi, quem Spiritus impulit in desertum, vt tentaretur. Non est planè Christi militia dignus, qui spiritualia prælia reformidat. Expendite verba sacra regulæ nostræ tui inserta: *Qui piè volunt viuere in Christo, persecutionem patiuntur.* Quam persecutionem? An omnes pij a tyrannis ob Catholicæ fidei defensionem trucidantur? An omnes martyrio coronati intereunt? Non est hic sensus ad regulæ mentem necessarius. Sat est, vt dæmonis, mundi, propriarumq; passionum infestatio non

M

desit.

desit. Hæc est monachorum persequutio, qua excruciantur, cui si validè obstant, catalogo illustrium certatorum ascribi possunt. Hæc est militia, hæc est tentatio, hæc est persecutio, qua vos exercendi estis, si bona immensa parare velitis. Huc conferunt arma spiritualia fidei, spei, charitatis, patientiæ humilitatis, quibus confertis velut loricati ad certamen procedunt monachi a tartaro formidati.

Quid cogitatis? Memoria repetite Apostolos, qui spiritus primitias acceperunt, & eos quasi homines neci destinatos, instructis tartari, mundi que agminibus, & vniuersali quadam coniuratione tentatos aspiciate. Lustrate etiam omnia Ecclesiæ castra, & Dei electos, quorum nomina scripta sunt in libro vitæ, internis prælijs, morbis, doloribus, fame, siti, inopia alijsq; sexcentis malis obsessos intuemini. Si ergo tantorum virorum consortium placet, adeste animis, & virili fortitudine dimiccate.

Ne probetis consilia eorum, qui vnius mensis, vel anni impugnationem se ferre non valere, prætexunt. Illorum potiùs sententiam probate, qui per decennium, & ultra, vno, aut multis tentationum generibus concussi, in Christi amore, & promissa ei fide persistunt. Siue caro rebellet, siue passionessæuiant, siue dæmon extimulet, siue homines obtrecent, siue iniuriæ irrogentur, siue interna ariditas vexet, ne stationem vestram deserite. Respicite Christum Pontificem nostrum tentatum per omnia, pro similitudine absq; peccato, & exemplari nostro aptè congruite. Bellum

deniq;

deniq; transit, pax succedit aeo sempiterno permanens. Præclare cum David actum fuit, ut cum Philistæo congredieretur, quandoquidem illo casu, caput gestans occisi, honorificentissime ab Israel exceptus est. Pugnat, & vos, & prælii finem contemplantini. Assistite Christo tentato, ut amplissimi promissi vos participes efficiat. Promissum audite.

Ego in medio vestrum sum, sicut qui ministrat, vos autem estis, qui permansistis mecum, in temptationibus meis. Et ego dispono vobis, sicut disposuit mihi pater meus, regnum, ut edatis, & bibatis super mensam meam in regno meo, & sedeat super throno nos iudicantes duodecim tribus Israel. Luc. 22.

Ecce quam optandus accubitus, ad Unigeniti Filij Dei mensam, ecce, quam sublimis sessio in thronis à Deo paratis. Hæc est merces, quæ rependitur monachis, qui cum Christo tentari per tulerunt. Huc ergo incumbite, & armatura Dei muniti certate.

Exhortatio de studio virtutum.

Cap. XXX.

Altè imprimenda sunt illa regulæ verba: *Omni sollicitudine studeatis indui armatura Dei, ut possitis stare aduersus insidias inimici.* Hæc præfatur, & mox attexit catalogum armorum, quæ sunt christianæ virtutes, quibus monachum, ad varios insuleus oportet præmuniri. Contextum obseruate, & animaduertite, quam sit ex legislatoris mente studium virtutum, cui

accurata debetur attentio . Neq; id solummodo obseruate, sed vlteriùs procurrite , & prodigiosam monasticorum ordinum calamitatem , quæ ex virtutum neglectu successit , contemplamini, vt similem cladem præcauere aliorum damno discatis . Quod vt efficaciter præstetis , has rationes perpendite .

Ratio prima . Virtus per se spectata, bonum honestum, & amore dignum est, cum hominis naturæ congruat , eamq; perficiat . Est ergo naturali propensione consentaneum , vt homo studio virtutum se ipsum dedat . Si autem id omni consonat homini , quanto est æquius , vt monachus virtutibus veris excellat ?

Ratio secunda . Christiana virtus est quoddam bonum non honestum modo, verum & diuinum, quod homines mundo altiores efficit . Cum ergo monachus statum mundo excelsiorem elegerit, quid superest, nisi vt Christianas virtutes, quæ animum sublimen creant , curet exquirere ?

Ratio tertia . Vires animi peccato originali, & alijs inde ortis malis attritæ sunt , & plurima, grauiaq; imminent bella , quibus vt homo fortiter occurrat, virtutibus Christianis , quæ sunt animi robur , proculdubio eget . Quomodo ergo monachus tot, tantisq; malis non succumbet, nisi se armatura virtutum vndiq; seperit ?

Ratio quarta . Monachus rerum cælestium, debet esse consultus , & in summum bonum cor intentum gerere : quod vt efficiat, sincera fide , firma spe, ardenti charitate, inuicta patientia , alijsq; virtutibus omnino indiget ; nam difficul-

tas è multis orta capitibus, nisi huiusmodi armis minimè superatur. Quàm ergò cæcus erit monachus, qui virtutes has comparare non sollicitè studuerit?

Ratio quinta. Monachi vita, iugis quædam ad Dei vnionem aspiratio est; quid enim aliud optandum superest, postquàm creata omnia, pia animi erectione pertransijt? Constitutum est autem, veras virtutes, nexus esse quosdam, quibus animus noster Deo, velut astringitur, quod diuina præsertim congruit charitati, quæ vinculum perfectionis est. Si ergo vobis vnio diuina videtur expetenda, opus est, vt medijs virtutibus, Deo hædere cõnemini.

Quæ promptissimus, vt credi debet, pios animos possent excitare. Cæterùm hoc mirum videtur, quòd cùm virtutum studium tam pium, honestum, & monachi proprium sit, tam sint pauci, qui veras virtutes colant. Labuntur tempora prolixa, & post monasticæ disciplinæ decennium, non maior patientia, humilitas, mansuetudo, obedientia deprehenditur, quàm sub ipsum primi ingressus initium. Quin etiam, quòd mirabilius est, multò minor præfertur virtus, siue humilitatis, siue obedientiæ, siue mansuetudinis occasio se se offerat: vixq; rebus theologicè perpenfis, concludi potest, vllum esse progressum, cùm rationes validæ suppetant ad regressum persuadendum. Hæc sanè observatio bonos censores torquet, timentq; vehementer, ne via, quæ multis recta videtur, eos ad interitum ducat. Et quidem causa hæc, de qua dicimus, non adeò ab-

strusa est, ut vos omnino lateat. Estote vosipsi Iudices, ac mihi roganti satisfacite. Rogo: Monachus ante decennium a praelato monitus statim acquiescebat, tacebat reprehensus, imposita onera mitis subibat: Nunc Praelato reluctatur, excusationes prætexit, onera palam detrectat, & hoc in morem induxit, ita ut nisi imperata eius ingenio fortuito placeant, vix quicquam, sine auctori saltem animi indicijs, exequatur. Rogo inquam, an iste lapsu decennij progressus, an regressus fuerit? Dicite quid de homine isto censendum sit. Profectò, aut omnis theologica doctrina de medio tollenda est, aut sentiendum, monachum istum retrocessisse. Quomodo enim tam licenter ex more ageret, si veras virtutes comparasset? Si autem verarum virtutum expertus est, quomodo progredi potuit? Ne vobis ipsis blandiamini, patres: ne fragilibus leuium rationum fundamentis innitami. Apprehendite disciplinam tutam, solidam, sanctorum exemplis confirmatam, ne quando irascatur Dominus doctrinis peregrinis irritatus, & pereatis de via iusta, per quam incedere cœpistis. Nullus sanè negotiorum gestor, lucri, aut honoris cupidus opinionibus minus tutis innititur: per tutiora, & opportuniora, lucrum, honoremue perquirat. Actus virtutum, quæ sunt itinera æternitatis frequentate: dum instat difficilis obedientia, humilitatis, patientiæ, arduitas, occasionem cupide arripite, & pro tuenda virtutum honestate, quicquid in hac mortali vita speciosum, & expetendum videtur, excelsè contemnite: atq;

ad

ad hunc modum ad supernæ vocationis palmam
celerrimè currite.

Exhortatio de familiari usu verbi Dei.

Cap. XXXI.

Regula certè nostra, velut turris David est,
è qua pendet omnis armatura fortium. Ec-
quidem inter arma plurima, meritò recensetur
Dei verbum intus impressum, & externè frequen-
tatum, vt patet è textu illo: *Gladius autem spi-
ritus, quod est verbum Dei, abundanter habitat
in ore, & in cordibus vestris.* Ex hoc profectò
textu liquet, legislatoris mentem fuisse, vt de
Deo, ac diuinis rebus monachi nostri crebrò ver-
ba facerent: quæ quidem res, cum momenti ma-
ximi sit, omisso interim verbi diuini in corde la-
tentis tractatu, rationibus multis asserenda est.

Ratio prima. Potior instituti nostri pars est,
rerum diuinarum contemplatio, quod vobis sa-
tis compertum statuo. Si ergo status, & officij
proportio, vti decet, obseruanda est, quibus de-
rebus, nisi de cœlestibus nostri loquantur? Pi-
ctor, Scalptor, Iuriscōsultus, Medicus, & alij pro-
fessores, de instituto quisq; suo passim verba fa-
ciunt, officio penè coacti. Cur ergo monachus,
qui diuinorum contemplationem profitetur, non
de diuinis agat? Non ne perspicua rei proportio
diuinum sermonem à nobis exigit, & contrariæ
consuetudinis deformitatem ostentat?

Ratio secunda. Manifestum est, familiari ver-
bi Dei usu innumeras vitari culpas, quas lingua,

velut syluam senticosam effundit, otiosa nempe verba, officiosa, leuia uè mendacia, detractiones, contentiones, & id genus alia, quæ monachis loquacibus vñcata sunt, vt grauiora fileamus. Si ergo gladius spiritus, quod est verbum Dei, noxiam eam syluam præsecat; quid tam monacho proprium, quam creber eius vsus diutissimè productus?

Ratio tertia. Dei verbum non est qualecunque lucrum, sed pretiosissimum, & vniuersis mundi thesauris longè præferendum. Parit enim pia desideria, cor emollit, mundi cōtemptum inducit, meritaq; proinde maxima cumulat; quod vos dum de diuinis rebus attentè confertis, arbitrator obseruasse. Quin & seculares id in se ipsis deprehendere, compertum est, cum ex vno interdum pio colloquio, vehementer commoti de statu mutando cogitent, & erumpentes lachrymas reprimere nequeant. Si ergo Dei verbum meritis adeò fecundum est: Si adeò est efficax ad obdurata pectora demulcenda; quid monachus excusat, ne id sæpissimè frèquentet?

Ratio quarta. Vel ipsa, quæ ex vsu verbi Dei percipitur, suauitas, acer stimulus est, ad id in morem inducendum. Sentiant planè suauitatem hanc pleriq; qui piorum colloquiorum sitim nunquàm satis explent, vellentq; noctes insomnes ducere, vt eo nectare recrearentur. Quocirca mirum est, monachos, vel eius voluptatis ignaros esse, vel conscios eam non perquirere.

Ratio quinta. Familiare est ijs, qui à patria, longè peregrinantur, vbi conterraneum aliquem for-

fortè conspiciunt, auidè cum illo de patria, eiusque successibus colloqui. Cum ergo nos simus exules, à patria nostra quàm dulcissima multùm disiti; quid agimus, aut quomodò affecti sumus, si de Ierusalem cœlesti, immensisq; eius bonis non identidem differimus?

Ambigi nequit, patres, quin statui nostro sermo diuinus congener sit; vixq; in vniuerso orbe Christiano, gens vlla reperitur, quam proprium institutum ad eum tam arcè, ac nos ipsos astringat. Ab ipsa quippe educatione, à quotidianis, aut frequentibus exhortationibus, à libris, quibus nouitij, professiq; passim vtuntur, à familiari vsu præsentiæ Dei, ab scopo contemplationis multa, & firmissima duci possunt argumenta ad illum efficaciter persuadendum. Quocirca mirum videtur, paucos demùm inueniri, qui de rebus diuinis, tam sæpè, ac expediret, loqui velint. Quid est hoc? Cur non omnes hanc cœlestem eloquentiam ediscimus, & non in concionibus tantùm, sed in familiari sermone Dei præcones disertissimi euadimus? An verum non est illud regis psaltis effatum:

Ignitum eloquium tuum vehementer.

Ps. l.
118.

An non & illud.

Eloquia Domini, eloquia casta.

Ps. 11.

An Dei sermo non est viuus, & efficax? Cur ergo non ei linguæ omnes assuescant? Animaduertite, quàm solícite patritiorum filij palatinum sermonem addiscant, vt principibus placeant. Nonne æquum foret, vt nos Ciuitatis Dei linguæ, siue sermonis periti essemus, & casta verba

con-

contexere pergeremus, ut diuinæ probaremur maiestati. Profecto turpiter errabimus, si sermone diuino neglecto, otiosa, seu uana uelimus efferre. Etenim hoc à nobis officium mundus expectat, & hæreditario iure censet explendum. Parens quippè, & fundatrix nostra Teresia hanc spiritualem patrimonij partem minimè despi-ciendam nobis reliquit, quam dissipare nefas est. Cæterùm licet argumenta decissent alia, hoc vnū omninò conuinceret; quòd si corda cælo affixa sunt, uerba proculdubio cœlestia proferent, iuxta illud Euangelicum.

LUC. 6. *Ex abundantia cordis os loquitur.*

Cùm ergo nos stricto uinculo innexi simus ad corda iugi Dei præsentia cœlis inferenda; aut de cœlesti patria loquendum, aut internum hominem officio deesse, fatendum est. Quid ergo eligitis? quid agere decernitis? Quid consilij capietis exules? Mementote ciuium Ierusalem in captiuitate Chaldaica lugentium, neque aliud, quam Sionem cogitare, aut loqui statuentium in hæc uerba.

PS. 138. *Adhareat lingua mea faucibus meis, si non meminero tui.*

Proprijs linguis captiuus populus imprecabatur malum, si se in alia uerba, quam Sionis excrerent. Et quidem satius foret, ut monachi lingua intus faucibus hæreret, quàm ut se otiosis, aut uanis uerbis pollueret, quod de Sacerdotibus præsertim asserendum est. Quomodo enim audient, linguam, qua consecrationis uerba paulò ante protulerunt, ad uana, uel otiosa laxare?

Ergo

Ergo ne lingua, quæ Dei instrumentum fuit, ad animas sanctificandas, & panem in Christi corpus conuertendum, à dæmone paulò post regenda, & scdanda est? Hæc patres meditamini, ac horrescite: & è casto ac ignito Dei sermone meritum, & puram voluptatem elicite.

Exhortatio de otio vitando . Cap. XXXII.

Non sunt oscitanter prætereunda verba illa regulæ, *Faciendum est vobis aliquid operis &c.* quæ legislator à dæmonis impugnatione, & Apostoli consuetudine confirmat. Nimirum, opus fuit, vt otium lege damnaretur, cum quoddam vitiorum seminarium sit. Sanè vt ager incultus spinas, & vrticas, sic otiosus monachus innumeros culparum aculeos profert, quibus & propriam, & aliorum conscientiam dilacerat. Ne ergo tantum ingruat malum, rationes hæ animo imprimendæ sunt.

Ratio prima. Homo ad laborem natus est, otiumq. communi omnium nationum conspiratione reprehéditur, vt ex varijs artibus ad otium vitandum ingeniosè inuentis perspicitur potest. Si ergo vbiq. vitio vertitur otium, necesse est, vt intra claustra quoque reprobetur, cum infame gestes inscriptum, quod grauium malorum suspicionem ingenerat.

Ratio secunda. Otium efficit hominem inertem, cui accidit; quod ijs, qui diù in compedibus fuere, solet euenire, vt scilicet ægre incedant, vbi soluti sunt. Quo quidem ex malo efficitur, vt ad

virtutum actus difficulter procedat, & in dies ad opera homine digna fiat obtusior. Quis autem non iudicet, mala hæc in monacho, qui ad spirituale palæstram accessit, turpiora, quàm in secularibus esse?

Ratio tertia. Otiosus monachus passiones proprias non modò non coercet, verùm conualescere sinit, quarum impetu peiora interdum admittit, quàm in seculo perpetrasset, quod tragædijs multis compertum est. Corpus quippe nullo labore domitum, & disciplinæ monasticæ impatiens animam vacantem præcipitat, & quò status sanctior est, eò grauior succedit legum transgressio, & conscientiæ peruersitas. Quis ergo tremenda mala non formidet, otiumq. depellat?

Ratio quarta. Loca sacra pijs laboribus dictata otiosum monachum minimè sustinent: ex quo fit, vt ille neque cellæ angustijs, neque claustris septis, se contineat, & vel frequenter domo exire, vel si domi maneat, loca omnia pererrare, non cesset. Hinc existit multiplex damnum, quo legum custodia languet, & varij introducuntur abusus. Quomodo ergo zelo Dei flagrare potest, qui otium non grauiter detestatur?

Ratio quinta. Monachus otiosus complices habere satagit. Cùm enim ipse nihil boni agat, alios à bonis operibus diuertit, vt cum eis verba faciat, & tempus vanè terat. Quis autem non animaduertat, in hunc modum catenam quandam multorum otio torpentium conseri, & silentium, recessum, Dei præsentiam, & pios affectus interire? Profectò otij malum
genus

genus quoddam morbi contagiosi latè serpensis est.

Ratio sexta. Animus otio resolutus vrbs quædam muris minimè septa est, quam nostræ salutis inimicus facilè capit, ac funditus euertit; quod multis prodigiosis casibus ostenditur. Cum ergo monachus eo ipso, quòd otio langueat, se telis sa- uissimi hostis exponat, peruiumq. sit capi, & ad interitum vsque sauciari; quid cogitat, si otium excutere non satagit?

Dicite nunc, patres, quid de otij deformitate censeatis. Dicite, quid vobis videatur de hoc regulæ monito, quò nos ab otio dehortatur. Opus sanè fuit, vt graue hoc malum procul arceretur à claustris, quorum cœtus, quædam spiri- tualium apum examina, sollicita, ordinata, & ope- ri perseveranter intenta esse debent. Expendite graua illa Apostoli verba regulæ inserta: *Audiuius inter vos, quosdam ambulantes inquietè, nihil operantes. His autem, qui huiusmodi sunt, denunciamus, & obsecramus in Domino Ie- su Christo, vt cum silentio operantes panem suum manducent.* Hæc Apostolus, qui ægerrime ferebat genus quoddam hominum, quibus manus inertes, lingua semper exerta fuit, quos grauitè compescere oportuit. Quid autem sentiret Apo- stolus, si ætate hac, monasteria multa, in quibus olim legum custodia, & pia quædam monastico- rum operum contentio vixit, aspiceret? Quem conciperet sensum, si otio torpentes, verbolos, nouitatum obseruatores, cellæ impatientes, ex- tra, intraq. claustra vagantes monachos intueretur?

tur? Quid ille diceret, si vias nouæ Sionis lugentes, & à nemine tritas, chorum, inquam, oratorium, loeaq. sacris actibus destinata, minime frequentata cerneret? Contemplamini vos rerum statum, vbi otium inualuit, & dicite, quàm sit æquum, similem calamitatem præcauere, & pios instituti nostri labores, velut præseruatiuam medicinam æstimare. Consideret etiam quisque veltrum, quid Christo responsurus sit, si talentum in terra defodiat, neque scænus aliquod reddat. Consideret filiorum huius seculi prudentiam, & incredibilem ad honores aucupandos, opesq. congerendas sedulitatem. Quem rogo laborem detrectant, quam commoditatem non respuunt, quas noctes non peruigilant, quæ itinera non conficiunt, vt quod animo conceperunt demum obtineant? Parentes filios instruunt, vt otium auerfentur, seduloq. laborent, vt in senectute quiescant. Vos ergo, qui æternam requiem, quam Ecclesia è vita migrantibus precatur, meditamini, qui amplam mercedem in cælo repositam vobis esse confiditis, cur otio velitis desidere? Breues dies hominis sunt, iustusq. è corporis custodijs liberatus dicitur implexisse tempora multa. Qui enim spiritu Dei agitur, præsentem laborem futuramq. remunerationem mutuò confert, atque perpendit, præmijq. successuri spe erectus, ac roboratus, ne punctum quidem temporis, sine pio labore aliquo vellet elabi. Hæreant animo verba illa Christi:

Luc. 19. Negotiamini dum venio.

Hæreant altè, hæreant perseveranter: & tanquam

quàm solliciti Regni Cœlorum mercatores, otio depulso, opera operibus adijcite, laboribus labores addite, & ad optatissimam requiem, quam expetitis, quantocyùs peruenire contendite.

TEXTVS DECIMVSQVARTVS.

De silentio.

Commendat autem Apostolus silentium, cùm in eo præcipit operandum. Et quemadmodum propheta testatur: Cultus iustitiæ silentium est: & rursus, in silentio, & sp̃s erit fortitudo vestra. Ideò statuimus, ut dicto completorio; silentium teneatis usque ad primam dictam sequentis diei. Alio vero tempore, licet silentij non habeatur obseruantia tanta; diligentius tamen à multiloquio caueatur. Quoniam sicut scriptum est; & non minus experientia docet: In multiloquio peccatum non deerit. Et qui inconsideratus est ad loquendum, sentiet mala. Item qui multis utitur verbis, lædit animam suam. Et Dominus dicit in Evangelio: De omni verbo otioso, quod locuti fuerint homines, reddent de eo rationem in die iudiciij. Faciat ergo unusquisque stateram verbis suis, & franos rectos ori suo, ne fortè labatur, & cadat in lingua sua, & insanabilis sit casus eius ad mortem, custodiens cum propheta vias suas, ut non delinquat in lingua sua, & silentium, in quo cultus iustitiæ est, diligenter & cautè studeat obseruare.

*Observatio thematum, quæ ex hoc textu duci
possunt ad exhortationes solitas.*

Potest dici de silentio. Poterit etiam differi
de linguæ lapsibus.

Exhortatio de observatione silentij.

Cap. XXXIII.

Mirum profecto videtur, ut in regulæ nostræ
textu adeo breui, de cultu silentij tam lon-
gè differatur. Breuitas ea est, quæ maior vix esse
potuit, & tamen ubi legislator ad silentij leges
accessit, penè prolixus euasit. Quæ quidem ex
re illud confici videtur, ut silentij cultus momenti
maximi in monastica disciplina sit, & è linguæ
moderatione bonorum spiritualium seges multa
proueniat: quod his rationibus suademus.

Ratio prima. Ipsum certè silentij nomen, quod
non sine consilio in aliquot cœnobiorum locis
grandi caractere solet inferibi, habet nescio
quid veneratione dignum, & lectum dūtaxat, vel
auditum, religiosum quendam sensum à mundi
strepitu exemptum imprimere videtur. Quocir-
ca vel ob eam religionem, quam nomen ingene-
rat, magni fieri debet.

Ratio secunda. Silentium adeo monachi pro-
prium est, ut eius officium homini verboso repu-
gnare videatur. Functiones quippe monasticæ,
quæ animo in res diuinas intento exercentur,
rectè obiri nequeunt, nisi lingua cohibita,

& ad

& ad pauca verba , vbi oportet , exerta . .

Ratio tertia . Perenne orationis , ac præsentis Dei studium , quod profitemur , cum verborum copia proculdubio pugnat . Quomodo enim interna virium collectio , quam studium illud planè requirit , cum earundem virium dissipatione , quæ per verba fit , coherere poterit ? Verborum autem multitudine collectionem illam discuti , ac interire ita notum est , vt confirmatione vlla non indigeat .

Ratio quarta . Linguæ moderatio , quàm difficillima est , vt disertè Iacobus Apostolus ostendit in hæc verba :

Linguam nullus hominum domare potest .

Iac. 3.

Præmiserat feras à natura humana domitas , & subtexuit linguam indomitam . Cum ergo domesticus linguæ inimicus tam sit proteruus , necesse quidem est , vt silentij studium , quo illi vires adiunguntur , accuratissimum sit .

Ratio quinta , Silentij cultus ita hominem honestat , vt illum alias exigui meriti , mira quadam virtutis persuasione laudabilem efficiat . Res vera , & vulgata est . Constat quippe , hominem tacitum prudentiæ famam compendio quadam acquirere , & ab alijs , velut quadam sapientiæ arcam benè clausam existimari . Quo quidem ex capite id boni exoritur , vt quemadmodum thesauri thecam omnes aperiri cupiunt , vt auri repositi aspectu delectentur ; ita hominis taciti labia diduci optent , vt verba expensa denique audiant . Hæc silentij æstimatio est . Si ergo ita se res habet , profectò monachus loquax

N

non

non disciplinæ tantum monasticæ, sed propriæ etiam existimationi nocet.

Ratio sexta. Qui tacitus est, culpas vitæ innumeras, & velut syluam quandam veprium ictu vno succidit. Manifestum est quippe linguæ licentiam sine multiplicibus erratis non posse permitteri, quod vos expertos fuisse statuo. Si ergo tot mala monachus taciturnus cauere potest, quo spiritu afflatur, si præstituta silentij claustra perrumpit?

Ratio septima. Christus Dei verbum, cui verba officere non poterant, cum quicquid proferebat, diuino prius consilio fuisset expensum, adeo silentij tenax fuit, vt triginta annis tacuerit, tribus verba fecerit, quod sancti dum considerant, obstupefcunt. Cum enim mundus doctrina eius saluberrima, diutissimeq; expectata indigeret, & vaticinia vbertim explenda speraret, quibus prædictum fuerat, ipsum Dei Unigenitum præceptoris munere functurum; mirum sanè visum est, vt è breui triginta trium annorum periodo, annos triginta silentio, tres prædicationi destinaret. Quis vnquam hoc excelsum, & abstrusum Dei consilium sibi persuasisset, nisi Deus ipse id ob diuinam auctoritatem suam credendum, Euangelico textu expressum euulgasset? Aruerat mundus spirituali rore destitutus, & ad verborum Christi optatissimam pluuiam anhelabat: & tamen Dei Verbum decuplo plus silentio, quam sermoni tribuit? Quid est hoc? An hoc fortuito successit? Nonne æternum senatusconsultum est? Quid ergo dicemus? Profecto dicendum videtur, Christum non minus

filendo, quam loquendo in admiratione habendum: credendumq. omnino, illud vnigeniti Filij Dei silentium diuinæ sapientiæ fuisse congruentissimum, vt homines exemplo tanto erudirentur. Quid monachus aduersus exemplum hoc possit excipere? Quomodo non vniuersi monasticæ disciplinæ professores silentij amore capiantur? Non dubium, patres, quin ad Christi scholam celesti munere vocati fueritis. Non dubium, quin silentij decorem ametis. Non enim obduriistis, vt tam salutaris doctrina cordi non hæreat. Ceterum non fat est, silentium, vtcunque, obseruare. Altius ascendendum est: vt scilicet, vbi iusta loquendi ratio vrget, parcè, & modestè admodum dicatis. Quod vt vobis persuaderi possit, non rationes, aut exempla multa congeremus. Insistite proposito Christi nostri præceptoris exemplo. Contemplamini illum ad Pilati tribunal multis teterrimis criminationibus accusatum, & videte, an multa verba faciat, longamq. orationem ad sui defensionem subtexat. Instant acerrimi calumniatores, & tacet: & vrget iudex, vt quicquam loquatur, & tacet, atque ita tacet, vt præses miretur vehementer. Quale silentium est hoc? An non de vita innocentis agebatur, poteratq. seipsum efficacissimis rationibus, & celesti eloquentia sine vlllo lingvæ lapsu mueri, & obiecta omnia diluere? Cur ergo filet? An Verbo Dei verba defunt? Altum est secretum hoc, & volucres cæli latet. Nos ergo ne secretum timeamur, sed miremur silentium, tam ar-

Et seruatum, vbi loquendi causa perurgere, & penè cogere videbatur. Si ergo Dei Filius in eiusmodi occasione tacet, quid mirum, si monachum hortemur, vt parè, ac modestè loquatur, vbi tandem loqui necesse est? Profecò Christi silentium disertissimos homines in claustra, vel deserta abditos, quodam modo fecit elingues. Et ne longinqua petamus, scitis, inter nostros verissimam viguisse silentij disciplinam, ita vt per nutus, ac schedulas plerunque negocia expediri consueuerint, vt ab vno, vel altero verbo, nocturni præsertim silentij tempore, abstinere. Hæc aliaq. antiquorum patrum gestis similia, proposito Christi silentis exemplari mirificè consentiunt, & loquaces monachos Christo dissimiles, sine vlllo linguæ vsu, tacita, & diuina quadam energia redarguunt. Quid ergo expectatis? An Christo in re tam decora, & status vestri propria congruere non vultis? Compescite linguam, & ori custodiam, ostiumq. circumstantiæ tandem apponite. Estote taciti rerum diuinarum contemplatores, diuinamq. eloquentiam, qua in Ciuitate Dei vsuri estis, addiscite.

Exhortatio de lingua lapsibus.
Cap. XXXIV.

Mala, quæ ex linguæ lapsibus oriuntur, aded à regula exaggerantur, vt quemlibet suæ salutis cupidum mouere debeant, ad aliquid peculiare ea de causa meditandum, quo se à lapsibus ope diuina seruet immunem. Quis enim ita

stupi-

stupidus sit, qui non subsistat, & sibi prospiciat, dum legit verba illa: *Faciat ergo unusquisque stateram verbis suis, & franos rectos ori suo, ne forte labatur, & cadat in lingua sua, & insanabilis sit casus eius ad mortem?* Profectò si lingue lapsus ad mortem usque animum sauciant, accuratissimè cauendi sunt, quod his rationibus monetur.

Ratio prima. Statuamus monachum aliquem loquacem esse, idque vitium respuere nolle. Rogamus nunc, quid de hoc homine verboso sperandum sit? Certum est quippe, eo ipso, quòd linguam soluat, præfixam virtuti metam transgressurum. Si etenim, qui taciti esse student, in re nulla frequentius, quàm in sermone se errare fatentur; quid de homine loquaci censebimus, qui immoderata verborum conglobatione latatur? Profectò absque numero labetur.

Ratio secunda. Quotidiana liquet experientia, eos, qui Dei timorem non prorsus abiecerunt, stimulos conscientia pati ex verbis, vel otiosis duntaxat, vel damnosis; aut enim tempus se vanè consumpsisse, aut alicui loquendo nocuisse, cum ad se redeunt, deprehendunt. Hoc experiuntur timorati: quid ergo si Dei timor absit? Porro, & culpa, & stimulus culpæ mala sunt, quæ præcaueri debent.

Ratio tertia. Satis frequens malum est detractionis, quæ inter crebros lapsus verbosi monachi recensetur, & quasi lepra quadam lingue non coercita est. Eoq. solet excrecere, ut vix loquax monachus linguam exerat, nisi ad alios carpen-

dos, vel mordendos. Quàm ergo salutare consilium foret, pietatis freno, ab huiusmodi lapsibus linguam præservare?

Ratio quarta. Nihil familiarius verboso monacho, quàm altercatio in cœtu patrum, ubi patet, & modestè loquendum esset. Quale autem malum sit altercatio, ex bono pacis, quod auferi, censi potest. Pax bonum quoddam divinum est, quod in claustris, quandam celestis patriæ imaginem refert: atque adeò altercatio pessimum pestis genus est, quod pia linguæ moderatione vitare, plurimum interest.

Ratio quinta. Satis crebrò loquaces monachi in vanæ ostentationis culpam prolabantur, dum laudes proprias amplificanti, quod ab humilitatis studio longè abest. Huic autem malo præsentaneum remedium parcitas sermonis expensi est, cum Dei timore connexa: quod memoriæ imprimi debet ab ijs, qui de spiritus cultura non sègniter agunt.

Ratio sexta. Christianorum concionatorum cura verbis impenfa; argumentum efficax struit ad lapsus familiaris sermonis præcauendos. Illi enim accuratè sententias, & verba præmeditantur, studioq. prævio demum enunciant; & tamen multi ab auditoribus lapsus deprehenduntur, quos ipsi minime dignoscunt. Quos ergo lapsus non incurreret, qui absque consilio vlllo linguæ indulget, & nunquam dicendi finem facere vellet?

Ratio septima. Grauiore lapsus mendacij, periurij, calumniæ, & aliorum peccatorum, quæ lingua perpetrantur, licet à loquacibus mona-

chis,

chis, se nihil graue committere velle prætendenti-
bus, non formidentur; procliuē tamen est, vt
postquā loquendo incaluerit, in illā se quoque
præcipitent, casusq. subsequatur ille, quem re-
gula insanabilem appellat, non sanè quod sanari
nequeat, sed quod de resipiscentia monachi lo-
quacitati assueti, & in errata grauiā prolapsi mo-
dica spes supersit.

Lapsus, quos attigimus, satis multi sunt, cū
tamen alios multos reticere oportuerit, quos
prolixum foret hoc loco referre. Incredibile
quippe ijs, qui rem hanc minimè sunt contempla-
ti, videtur, linguæ lapsus in tantum excreſcere
numerus, & disciplinæ monasticæ tantoperè of-
ficere. At ij, qui rem perspectam habent, facili
consentiunt in florentibus ordinibus monasticis,
numerosius multò, & grauius linguæ lapsibus,
quā alijs actibus peccari solere, quā de re sæpe
inter prudentes monachos præuia obseruatione
collatum est. Cū ergo tot mala è linguæ licen-
tia originem dueant, quis adeò instituti nostri
capitalis inimicus sit, qui non existimet, linguam
quodam timoris Dei cauterio potius vrendam,
quā licenter ad verba laxandam? Vos ipsi di-
cite, quoties verba fecisse pœnituit? Verisimile
autem est, vos etiam de silentio rogatos respon-
suros, nunquā ob linguam coërcitam, vllam
pœnitudinem subijsse. Vnde putatis, tot mona-
chos duabus quotidie statis horis orationi va-
cantes, & rerum diuinarum scientiā satis instru-
ctos, post annos multos tam esse aridos, & à Dei
gustū alienos, ac si in sæculo remansissent?

Prudens veteranorum coniectura est, monachos istos ob frequentem linguæ licentiam aruisse, ac propemodum obduruisse, ut iam spes profectus penè nulla suppetat. Ut enim desperatur vita, ægroti ingestum stomacho cibum diu euomentis, ita & profectus istorum, qui tametsi aliquod spiritus alimentum quotidie traiciant, eodem die lingua laxata reiiciunt, atque adeò spiritus minimè alitur, & ferè ad interitum ægrotat. Vtinam doctrinam hanc dignè æstimatam non calamo, sed spiritus sui digito cordium vestrorum, tabulis Deus inscriberet. Quàm feliciter progredere mini si lapsum linguæ syluam caderetis! Quàm suavis vobis accideret sermo Dei intus loquentis, & subtractum ipsius causa sermonem repensantis? Imperate vobis ipsis, & instrumento linguæ ad pietatem dumtaxat utimini. Otiosa verba à Christo iudice improbantur, quantò magis noxia? Ne iudicem irritate. Exerite potius linguam ad Dei laudes celebrandas, & eloquijs cæcis ad legis diuinæ lineam exactis eruditi, erga cætera taciti, æternorū desiderijs conflagrate.

TEXTVS DECIMVSQVINTVS.

Exhortatio Prioris ad humilitatem.

TV autem, frater Brocarde, & quicumque post te institutus fuerit Prior, illud semper habeatis in mente, & obseruetis in opere, quod Dominus ait in Euangelio: Quicumque voluerit inter vos maior fieri, erit minister vester: & quicumque voluerit inter vos primus esse, erit vester seruus.

Ob-

*Observatio thematum, quæ ex hoc textu peti
possunt ad exhortationes solitas.*

Dici poterit de humilitatis cultu; Poterit
etiam agi de actibus ad humilitatem pa-
randam opportunis.

Exhortatio de humilitatis cultu.

Cap. XXXV.

TAmetsi lecti textus titulus Priori dumtaxat
destineatur, causa, de qua agitur, communis
est; cum perspectum sit, humilitatis cultum ad
omnes pertinere. Ergo, & me ipsum, & vos ad
tantæ virtutis studium hortabor, quod tantò di-
ligentius impendendum est, quanto rariùs humi-
litas imis radicibus nixa provenit, & quanto est
felicius in selecto paucorum humilium numero
recenseri. Ut verò res cedat ex sententia, has ra-
tiones expendite.

Ratio prima. Nemo prudens extruendæ ali-
cuius fabricæ cupidus, de fundamento bene firmo
non cogitat. Cum ergo humilitas sit spiritalis
fabricæ fundamentum, sine quo nihil satis tutum,
firmumve construitur; omnino necesse est, ut
monachus eius virtutis cultui se accuratissimè
dedat, neque sine hoc studio, spiritui quantum-
vis sublimi credendum existimet.

Ratio secunda. Humilitas hoc parit bonum
sacè maximum, ut animum divinorum munerum
capaciorē efficiat. Depellit quippe superbia

ventum, quo mens vana distenditur, & quandam velut cauitatem relinquit, quam Clementissimus Deus donis celestibus explet ea fidelitate, qua in rebus naturalibus locum depletum implet, ne quid vacuum remaneat. Cui certè doctrinæ fidem conciliat pietas, quæ non obscuris indicijs deprehenditur in viris humilibus, quos in schola Christi feliciter prosperatos, quàm alios virtutum cultores animaduertimus.

Ratio tertia. Vir humilis cordium dominus est. Experientia quippe constat, eius consuetudinem esse omnibus acceptissimam, eumq. cordibus sine renisu imperare, quod & ratio ipsa persuadere videtur. Cum enim ipse omnibus cedat, nihil in eo asperum deprehendunt, cuius prætextu displiceat: E contrario verò mores suauissimos experiuntur, quorum vi efficacissima capiti ei semper hæere vellent. Quod adeò verum ac testatum est, vt in cœtibus monachorum ijs, quos humilitate præcellere exploratum est, ab omnibus impensè amentur, & omnes ab eorum confortio separari timeant, quod vos obseruasse credimus. Si ergo monachus humilis impensè diligitur, ac proinde omnibus dominatur, & velut regno quodam non quidem affectato, sed ab alijs sponte delato potitur, cur non omnes hoc modo imperare, siue regnare velimus?

Ratio quarta. Humilitas pacis feracissima est. Nihil enim affectat ex ijs, quæ discordiam parere solent: non honorem, non primos accubitus, non commoda, vel vtilia. Credit quippe vir humilis, se omnium vilissimum esse, rationiq. congruere,

vt no-

ut nouissimo in loco recumbat, & postrema fors ei
in rebus quibuscumque obtingat . . Sublata verò bo-
norum honorificorum, vtilium, delectabilium,
appetentia, libenter alijs defert, quæ ipsi cupiunt,
sibiq. attribuit quæ alij reiiciunt: quo ceterè pò-
fito, pax dulcissima, & constantissima succrescit .
Cum ergo creatura omnes pacem appetant, pro-
fectò monachus humilitatis neglector extra ra-
tionis metas vagatur, sibiq. ipsi consulere nescit,
dum discordiæ sementem spargit . .

Ratio quinta . Clarissima sunt exempla san-
ctorum, qui virtutis huius ardentissimo amore
capti rara mundo spectacula exhibuere, vt Ale-
xius, Alexander Carbonarius, Franciscus, alijq.
permulti, quibus nihil fuit antiquius, quàm vt se
ipsum aspernarentur, & alijs despicabiles appare-
rent: quos tamen luculentissima gloria, in hac
etiam mortali vita Deus illustravit . Si ergo
exempla sanctorum pondus habent, quo nomine
dignus erit monachus, qui ijs insistere renuerit?

Ratio sexta . Recolite genus vestrum, estis
enim, Beatissimæ Virginis filij . . Quò autem,
non pertigit Mariæ humilitas, quæ vnigeniti
Filij Dei cor, permulcere potuit? Profectò non
sine sublimissimo consilio, diuina maiestas, ad
incarnationis mysterium Virginis, assensum per
nuncium caelestem postulauit, & expectauitq. re-
sponsum profundissima humilitate redditum . .
quo accepto, mox sese Virginis viscibus in-
fudit, & Verbum caro factum est . Si ergo qui-
dam perfectissimæ humilitatis actus fuit, velut
vltima, ad incarnationis mysterium dispositio, in

ea Virgine, quam vt matrem diligitis, ac veneramini; aut genus negetis, aut humilitatem impensè colatis necesse est.

Ratio septima. Contemplamini Christum pedes discipulorum abiuentem, & obstupescite. Audite illum postquàm recubuit, humilitatis scholam instituentem his verbis, quibus ferè indomita mitescerent:

10. 13. Scitis, quid fecerim vobis? Vos vocatis me Magister, & Dominus: & bene dicitis, sum etenim. Si ergo ego laui pedes vestros Dominus, & Magister: & vos debetis alter alterius lauare pedes.

Hæc mitissimus, cordeq. humillimus Redemptor noster. Quomodo ergo vniuersorum hominum colla non flectuntur, & studium Christianæ humilitatis cupidissimè arripiunt?

Profectò rationes hæ & me, qui à regula moneor, & vos, quos ad necessariæ virtutis cultum adhortor ego, pervincere, & ad humilitatis cultum vehementer inflammare deberent. Quid enim non fecit Vnigenitus Dei Filius ad mortalitatem nostram delapsus, vt nos humiles efficeret? Quænam impropéria non pertulit? Si pedum ablutio dura pectora mollic, cur non & facies sputis respersa? Si Christus æternus Deus ad discipulorum pedes genuflexus humilitatem efficacissimo docet exemplo; cur non & Crucifixus, ac publicè irrisus illam persuadeat? Contemplamini statum vestrum, & Christi discipulos representate. Apostoli hoc Christi magisterio eruditi facti sunt tanquàm purgamenta huius Mundi, impropériū Crucis Christi sustinentes, vt

magistro congruerent suo. Vos ergo cum eundem nacti sitis præceptorem, quid cogitatis? Nondum saluator noster salutem operatus fuerat in medio terræ, & David coram fœderis arca tripudians, se humiliter acturum iuravit: Cur ergo nos prauo tanti præceptoris exemplo, humilitatis studio nos totos addicere non decernamus? Quid dicam vobis? Porro si prudentes negotiorum gestores esse velitis, modus cū diuina maiestate feliciter agendi, est ipsa Christianæ humilitatis affectio, quæ tam est efficax, vt Deicor, quò velit inflectere posse videatur. Sit peccator quilibet tartaro penè demersus, humiliterque clamet; & statim ira posita illum Deus amplectetur. Nonne publicanus humili sensu, suiq; despectu Deum precatus, confestim inter amicos relatus est? Si ergo eos, qui cum in peccatorum cœno iaceant, diuina gratia excitati humiliter agunt, Deus amplexurus accurrit, vt ex dulcissima filij prodigi parabola censere quoq; potestis; quid non præstabit ijs, qui cum à peccatis abstinuant, tantæ virtutis studio se totos dedere certant? non dubium quin clementissimus Deus eos in delitijs habeat. Pergite ergo patres, & Christianæ humilitatis cultu bona immensa comparete.

Exhortatio de assibus ad humilitatem parandam opportunis. Cap. XXXVI.

EX Evangelico textu liquet, viam, quæ ducit ad vitam, esse arctam, & à paucis carpi, quod

quod tam legendum, quam verum est. Quid enim luctuosius, quam à salutis via exorbitare, ac proinde ad tartari præcipitium ferri eos, qui Christi sanguine redempti summo, ac sempiterno bono frui possent? Profecto, deslenda est raritas hæc, cui fidem astruit humilitatis penuria; quæ in ijs quoq; deprehenditur, qui eam profitentur, vt raro vir humilis appareat vnus è plurimis, qui mundum despexisse videntur. Nimia sanè sterilitas, est hæc, cuius causam si peruestigare velimus, comperiemus proculdubio, fugam humilium actuum tanti mali originem esse. Vt enim ad exercitium humilitatis ventum est, incipit degener animus à proposito resiliere, neq; vult pretiosissimam humilitatis gemmam duro humilium actuum exercitio comparare. Erit ergò ad rem, vt eiusmodi actus animosè obire decernamus, quod hæ rationes exposcunt.

Ratio prima: Omnes in sententiam conspiramus hanc, virtutem scilicet humilitatis esse præstantissimam, meritoq; per agones, laboresque, quærendam, vt è proxima exhortatione censere potestis. Cum ergo humilia obsequia, & vniuersè actus illi, quibus se quis neglectui habendum ostendit, ad eam virtutem parandam magnoperè conferant; quo iudicio valet, qui actus illos passim detrectat?

Ratio secunda. Familiare est monachis, in quotidianis occasionibus versari, quibus possent ministeria postrema disciplinæ monasticæ exercere, à doctrina, vel prudentia ostentanda abstinere, obiectis culpis nullam excusationem ob-

tendere, solitos humilitatis ritus, puta alijs cedendi, genuaflectendi, vel se prosternendi, obseruare: quibus actibus omni dubio procul norunt ipsi sterni viam ad virtutem acquirendam. Quomodo ergo eam parabunt, si eas occasiones vident, ijsuè abutantur rationibus ducti humanis? Nonne manifestum est, ea viuendi ratione, non modo humilitatem non parari, sed superbiam, ali? Nonne luce clarius est, eiusmodi monachos veste, quam gestant indignos; hypocritas censendos esse, qui animi elationem humili vestimento contégunt?

Ratio tertia. Vehementer ad pietatem commouentur animi, vbi qui in cœtu monachorum antiquiores, & varijs dotibus doctrinæ, ac prudentiæ cultiores sunt, humilibus, insistant obsequijs, quod in Congregatione nostra ab origine huc vsque obseruatum est. Quo quidem exemplo, & humilitas colitur, & aliorum animi ad æmulationem incitantur. Qua ergo mente leuibus excusis, ministeria humilia recusentur, aut lentè exerceantur?

Ratio quarta. Quàm indecorum est, patritio, seculari mechanicis actibus se dedere, tam speciosum est monacho, postrema cœnobij ministeria exequi, rebus quoque iuxta hominum opinionem, expensis; patetq; omnino, monachum, propriæ existimationis causa, ijs se subtrahentē, apud seculares, nedum apud monachos alios, boni nominis decrementum pati. Si ergo humiles actus apud Deum, & homines honorifici monacho sunt; quam ob causam illos refugit? Nonne aper-

aperta fatuitas est?

Ratio quinta. Profectò inter nostros mos percrebuit, ut magna fieret concertatio, ad humilia obsequia alijs præcipienda, vel precibus impetranda; qua ex contentione insignis Dei gloria cum miro monachorum profectu existit. Nostis hoc. Qualis ergo ausus foret, aduerso flumine nauigare, & consuetudinem hanc antiquæ sanctitatis æmulam, ob indomitas passionés auferre, vel remorari? Absit hæc dementia, vel proteruita.

Ratio sexta. Exprimi nequit, quàm Deo spectatori placeat strenuitas fortium militum superbix, sensum humilium actuum assiduitate extinguere conantium; quando videlicet in palæstra monastica, monachus propriæ existimationis stimulo excitatus à Prælato anxie flagitat, imponi sibi postremum aliquod ministerium, cui assuescat, donec sensus ille deficiat, dæmonq; timidus recedat, veritus ne fortè dimicantis meritum augeatur. Porro gratissimum est diuinæ maiestati spectaculum hoc, deberemusq; nos omnes id elementissimo exhibere Deo, cui velle placere, filiorum, quales nos esse, decet, proprium est.

Quid ergo moramur? Quomodo sitim humilium obsequiorum, & actuum sedare possumus? Obseruate motus naturæ, & gratiæ. Natura cupit honorari, gratia despectum suggerit. Natura dotes claras ostendat, gratia celat, & vilia prodit. Natura optat præesse, gratia subesse. Natura primum, accubitum, gratia postremum exquirat. Quid ergo vultis? An naturam gratiæ

præ-

præferatis ? Absit. An prudentius consilium non probetis eorum, qui ibant gaudentes à conspectu concilij, quoniam digni habiti sunt pro nomine Iesu contumeliam pati ? Ne cœptum iter intermittite, patres, sed qui collum iugo Christi subdidistis, animadvertite, quo consortio digni existimemini, & quàm foret turpe subiectas Christo cervices erigere. Optabilius est, nouissimo, quàm primo spiritualium nuptiarum loco recumbere, ut audiat postea honorifica, & lætitiæ plena monitio illa : Amice ascende superius. Bene est, ut votum non ambiendi emiseritis, quod humilitatis votum inter nostros cœpit appellari. Ceterum non satis officium expleretis, qui ad eximiam sanctitatis celsitudinem aspirare cœpistis, si votum illud à Deo inspiratum frequenti humilium actuum exercitio minimè confirmaretis. Agite ergo, & in schola mansuetorum, & humilium de profectu contendite. Ne sinatis lucri immensi occasiones elabi, sed oblatas arripite, quin, & non oblatas quærite. Utinam adesset Pynuphius aliquis, qualis ille, qui cum in Aegypto sanctitatis fama clareret, humanam refugies laudem, à monasterio numeroso, cui præerat, clam recedens, ad intima Tabennensium monachorum secreta contendit, ubi veste mutata, prolixis precibus, ut susceperetur, obtinuit : monachoq; horticultori, in adminiculum destinatus, cum triennium humillimè ministrasset, à fratre quodam qui ex Aegypto aduenerat, cognitus, & à Tabennensibus, quibus occultus inseruiuerat, stupentibus honoratus, summa cum mœstia,

Cass.
coll. 2.
cap. 1.

tia, & lachrymis, quod ministerij illius occasio-
nem amisisset, in cœnobium, cui præfuerat, redu-
ctus est. Hæc digna est tantæ virtutis æstima-
tio. Nos minora suademus. Ne ergo animi
concidite, sed ad humilitatis palmam per humi-
lia obsequia properate.

TEXTVS DECIMVS SEXTVS.

Exhortatio fratrum, ut Priorem

suum honorent.

Vos quoque ceteri fratres, Priorem vestrum ho-
norate. huiliter, Christum potius cogitan-
tes, quàm ipsum, qui posuit ipsum super capita ve-
stra. Et Ecclesiarum præpositis ait: Qui vos au-
dit, me audit; & qui vos spernit, me spernit: & non
veniat in iudicium de contemptu sed de obedi-
entia mereamini vitam æternam mercedem. Hæc bre-
uiter scripsimus vobis, conversationis vestrae for-
mulam statuentes, secundum quam vivere debea-
tis. Si quis autem supererogauerit, ipse Dominus,
cum redierit, reddet ei. Utatur tamen discretione,
qua virtutum est moderatrix.

*Observatio thematum, qua ex hoc textu duci
possunt ad exhortationes solitas.*

Dici potest de honore Prælati deferendo,
mox de operibus supererogationis, co-
rumq; modo.

Exhortatio de honore praelatis deferendo.

Capitulum XXXV. I.

Videmus hic regulæ textus, si ad me referatur, non modica ex parte, sua carebit energia; neque enim is sum, qui vllum honorem merear. Quia vero res, de qua agitur, vniuersè accepta momenti maximi est, dicendum videtur de honore praelatis deferendo, qui ad monasticam disciplinam magnopere confert, vt è rationibus subiectis censerì poterit.

Ratio prima. Filij vniuersi ductu quodam naturæ parentes honore afficiunt, neque gens vlla adeo fera, & inculta est, quæ in hanc sententiam minimè conspiret. Cum ergo monachi praelatos suos parentum loco habeant, cum ipsa naturæ propensione pugnabunt, si eis honorem deferre recusent. Etsi enim ab eis, quod ad naturam spectat, genti non sint, naturæ tamen lumen dicat, vt postquam parentum vices gerunt, paternum honorem accipiant. Et quidem ratio hæc vim multam acquirit, si praelatorum nostrorum mores genti paterni spectentur, siue culturam spiritus, siue corporis necessitatem contemplantur: vtroque enim ex capite, carnales parentes, vel æquant, vel certè superare contendunt. Qualis autem deformitas esset, his honorem debitum adimere.

Ratio secunda. Prælati non, vt pater tantum, sed vt magister, & vt Dei Vices gerens honore maximo afficiendus est. Vt enim parentis,

& magistri functiones fileamus, quisnam titulus illustrior, & honore dignior excogitari potest, quam qui ex munere illo nascitur, quo prælatus Dei vices gerit? Porro qui perspicaces, mentis oculos nati sunt, profunda animi demissione Prælatum venerantur, memores amplissimi honoris, qui debetur ijs, quos Christus in excelsissimum fastigium euexit aïens: Qui vos audit, me audit, qui vos spernit, me spernit: Nihil enim altius in hoc genere, mente concipi posse videtur.

Ratio tertia. Prælatus est quidam canalis, vel aqueductus, per quem cœlestia dona in subditos derivantur: Illi quippe Deus adest, affulget, instruit, ut subditos moderetur: eamq; diuinæ lucis, & consilij gratiam, in bonum subditorum cedere compertum est: Quis ergo non affectat honorem ei, per quem Deus tot bona largitur? Nimia cœcitate pleriq; laborant, qui in prælato, nihil altius, quam corporis præsentiam cogitare norunt, quos humi repere, & parum spirituales esse palam est: At eis rependitur, ut steriles sint.

Ratio quarta. E contrario abusu, vel enormi errore iudicare licet, quàm sit debitus prælatis honor. Profecto, qui eò processit, ut prælatum asperneretur, pessimus monachus, & damnationi proximus est: Quem meritò reponimus in illo numero infelicium monachorum, quibus peiores homines nusquam reperire licet. Ita enim se res habet, & sanctus censuit Augustinus, qui neque meliores, quàm qui in cœnobijs profecerunt,

Epist.
117. ad
plebē
Hippo-
nensē.

runt, neq; peiores, quàm qui ibi deliquerunt, se expertum fuisse commemorat. Quòd licet in alijs peccatorum generibus, ad proportionem sanctitatis, quam status exigit, crescentibus verum quoq. probetur, ceterum in ea impudentia, qua prælatis contemnuntur, maximè verum est, cum in contemptu illo plus multò malitiæ, quàm in alijs peccatis, quæ à monachis committi solent, inesse credatur.

Ratio quinta. Quàm sit turpe, prælatos non venerari, facile perspiciet, qui iram Dei conceptam in eos, qui in hoc genere peccant, dignè perpenderit. Sanè cum Aaron, & Maria aduersus Mosè parum reuerenter locuti essent, apparuit Deus, & è nube, velut è tribunali grauter reos reprehendit, lepraq; Mariam continuò in pœnam resperfit. Cumq; Moses, vt erat mitissimus, pro ea precaretur, minimè vt optabat, exauditus est, donec Maria septem diebus, castris exclusa, vltimoq; reuocata, cœptum iter persequi permissum est, Deo iniuriam Mosi illatam exemplo tremendo vlciscente, vt discerent posteri, quem honorem ijs, qui præsunt, deferre deberent. Nimirum iniuria prælatis irrogata, in Deum, cuius nomine præsunt, refunditur, sicut scriptum est, *qui vos spernit, me spernit.*

Contemplamini nunc, patres, quid de honore prælatis debito opinari debeamus. Quid de re hac porro grandi dicam vobis? Incredibile planè videtur, monachum officio satisfacere suo, qui prælatum non intuetur ijs pæne oculis, quibus Christum ipsum aspiceret. Si autem hoc

intuitu candido, simpliciq; illum spectet, ardua
 quaq; pervincet, debitoq; illum honore venera-
 bitur, quod clarissimo David erga Saulem, tunc
 regno præfidentem exemplo patebit. Venerat
 Saul, tribus electis militum septus millibus, ad
 peruestigandum David, quem interficere cupie-
 bat, ut in regum historia memoriæ proditum est.
 Cumq; in antrum quoddam, egerendi causa, se-
 recepisset, & in recessu antri interiore David
 cum comitibus lateret, peropportuna insonti
 occasio Saulis necandi oblata est, quod milites
 vehementer hortabantur, promentes, ut credi
 debet, iustissimas tyranni occidendi causas, præ-
 fertim cum in summo ipsi vitæ discrimine versa-
 rentur, nisi cum inculpatæ tutelæ moderatione
 inimicum perimerent, qui ad ipsos interimendos
 eò furens accesserat. Rationes profectò vali-
 dissimæ urgebant. Et tamen David oram chla-
 mydis Saul tantummodò præcidit: hominem
 omnino nec tetigit, neq; attingi à militibus passus
 est. Quin etiam conscientiz remorsum sensit,
 quòd oram chlamydis præcidisset? Quid est hoc?
 Quæ de causa non infert manus tyranno, à quo
 parùm abest, ut capiatur in hoc, ac necetur? Er-
 gone conscientia innocentis torquetur, quòd ve-
 stis oram præsecet, qui iure potuit hostem injus-
 tè persequentem trucidare? Quid cautæ sobest,
 ad tyrannum tantopere reuerendum? Cur con-
 fringit militum animos, ne in hostem insiliant?
 Ipsi enim urgent. Cur eos retardat? Audite
 verba David: Propitius sit mihi Dominus, ne
 faciam hanc rem Domino meo Christo Domini

ut mittam manum meam in eum, quia Christus
 Domini est. Ecce quam rationem profert, cur
 eum attingere non audeat, neq; laedi a militibus
 sinat, quia scilicet Christus Domini, quasi dice-
 ret: Bene animaduerto, quam sit Saul crudelis,
 & quam iniuste me persequatur. Animaduerto
 etiam, me & vos milites meos in periculo extre-
 mo constitutos esse, ut ab eo capiamur, ac necemur.
 Caterum omnia hæc mihi ferenda videntur,
 quia Christus Domini est, quia videlicet rex
 est, loco Dei præsidet. Ratio verò hæc altè adeò
 illius animo insedit, ut egressus è spelunca Saul-
 lem nihil tale opinantem pronus in terram ado-
 rauit, & crudelis tyranni feritatem ad fletum
 usq; lenierit. Expendite nunc quo affectu, &
 quibus externis actibus eum, qui præerat, hono-
 rauit. Si ergo David tunc miles puro intuitu
 regni præsidem suspiciens, & non qualis esset, sed
 cuius loco præflet considerans, interim dum ad
 necem ab eo quærebatur, illi honorem tantum
 detulit; cur monachus prælatum, qui non vitam
 adimere, sed tueri cupit, non honore afficiat?
 Cur monacho satis non sit, nosse, prælatum
 Christum Domini esse, ut æquo animo illius mā-
 data ferat, nec audeat vllam, vel leuissimam ei
 iniuriam irrogare, tametsi ab eo acerbè traheretur?
 Porro exemplum hoc adeò videtur efficax,
 ut monachus quisq; timoratus, non solum ubi a
 prælato suauiter accipitur, verum etiam si fustibus,
 & a lapis cadatur debeat illum, & amare, &
 honore pariter afficere? Ne rationibus humanis
 viam aperitis, & opus fidei politicè interpreta-

ri velitis . Christum ipsum in prælato intuemini, eiq; reddite honoris tributum, quod lex ipsa exigit . Certò statuite, mitem prælatos honorandi morem, ritum esse Sanctorum antiquissimum; Deoq; gratissimum, & in cœlesti patria cumulatè remunerandum . Ergo in opus incumbite, & quod debetis, officium expletes spe altè nixa, in præmia vobis parata mentis aciem, & pia vota collimate .

Exhortatio de supererogationis operibus .

Cap. XXXVIII.

Postquàm regulæ auctor leges paucas selectas, & ad instituti nostri appositae tulit, adiecit verba illa . *Si quis autem supererogaverit, ipse Dominus, cum redierit, reddet ei.* Quasi apertius diceret . Præscripsimus pauca, quæ prudens exigebat legislatio: exterùm nobis exploratum est, vos his limitibus ita includi vellet, ut maiora moliri neutiquàm prohibeamus, Maiora interdicare minimè debuimus, imo admonemus, Christum vobis maiora patrantibus mercedem, cum redierit, redditurum . Hæc regulæ auctor; qui patrum illorum, quibus leges scripsit, spiritum sanè validum contemplatus, monuit denique prudentiam, ne quid nimis . Eris ergo maiorum nostrorum exemplis consona, supererogationis tractatio, quam hîc rationibus digeremus .

Ratio prima . Filij huius sæculi, qui iuxta Christi oraculum, prudentiores filij lucis, in
 gene-

generatione sua sunt, sibi minimè satisfaciunt, si ea tantùm bona vtilia, honorifica, & delectabilia exquirant, quæ ad vitam decenter ducendam, sufficiant: sed inexplebili cupiditate plura, & maiora conantur, ut ex congesta in annos multos pecunia, ex horreis plenis, ex curribus, equis, hortis, palatijs, ex honorificis titulis pretio multo emptis, facile perspiciatis. Cur ergo, ubi de bonis æternis parandis agitur, meta vobis præfigatur, quam transilire nolitis? Porro seculi cupiditas à bonis monachis, in argumentum cælestis prudentiæ vertenda est.

Ratio secunda. Viri, qui in sæculo cordati censentur, si quid mediocrè in regum aulis querant, eam vim, ac navitatem adhibent, quæ ad maiora sat esse videatur. Si enim mediocri honori mediocrem curam dumtaxat impenderent, vix, aut nunquam voti compotes evaderent, si expertis fides habenda sit. Quocirca ut tutiorem agendi morem sectentur, ea sollicitudine mediocria conquirunt, quæ ad magna satis foret; atque ita securius eis res ex sententia succedunt. Si ergo hic cordatorum virorum mos in temporalibus est, cur id prudentiæ genus ad res non traducatur æternas, ut securior earum fiat acquisitio? An in rebus divinis perquirendis ea desideretur prudentia, quæ affluenter impenditur humanis?

Ratio tertia. Experientia constat, monachos etiam fervidos, qui annis prioribus, supererogationis opera necessarijs addebant, decursu temporis conflagrescere, ac vix necessaria opera

præstare. Quid ergo si sub initium ultra necessaria, nihil minus cogitassent? Profectò & è necessarijs, temporis processu, aliquid dementent, vt crebris etiam experimentis probatur. Et hæc profectò ratio experientia confirmata apud sapientes monachos, hoc efficit, vt grandiora exequi conentur præfagientes, quod futurum creditur, vt vbi disciplinæ monasticæ pondere se fatigatos senserint, omittant aliquid eo usque supererogatum, & quod legitimum est, perseveranter retineant.

Ratio quarta. Profectò generosi animi in re hac, quam pertractamus, domesticum, & satis efficax exemplum habent B. Terefiæ Fundatricis nostræ, cui adeò modicum visum est, quod ex legibus nostris Deo redditur, vt sponte rarum illud votum emiserit, exequendi, quod inter multa occurrentia, Deo gratissimum crederet. Non enim animo illi grandi satisfuit, quæ nobis imperata sunt, explere, & vt sibi satisfaceret, quod in quouis euentu Deo acceptius esset, se facturam pollicita est. Parùm ergo parenti nostræ congruunt, qui sibi metam lege præfigunt.

Ratio quinta. Christus Redemptor noster genus humanum vna sanguinis sui gutta perfecte redimere potuit: & tamen quasi ruptis fontibus abyssi magnæ, ac disruptis cæli cataractis totum profudit sanguinem, & nostræ salutis siti rapidissimum dolorum, ac irrisuum torrentem exhauit. Qualis ergo gratitudo est illa tepentium monachorum, qui fatentur quidem, se, quæ præscripta sunt, efficere velle, nolle tamen maiora, moli

moliri? Si enim ideò nolunt ampliora, quia legiti-
ma sufficiunt; an minor dolorum acerbitas
Christi peritura ad eos redimendos non suffice-
ret? Profectu ratio hanc nobilissimam orbis ter-
rarum partem domuit, domitamq. ad egregia
virtutum opera, sine meta præstanda vehementer
impulit. .2 1 M 1 7

Vos ergo, patres, Christi castra oculis inter-
nis lustrate, & lectissima, Martyrum, Confesso-
rum, Virginum agmina recensete: comperie-
tisq. permulta, & planè grandia ultra Dei præ-
cepta, & consilia voto promissa patrasse. Neque
enim diuina lege, aut Ecclesiastica, aut monasti-
ca adigebantur ad tot, tamquè grauià pœni-
tentiz opera, ieiunia, vigilas, verbera, & id ge-
nus alia, quibus parum abfuit, vt modum exce-
derent. Cæterùm scriptum est: *Si dederit homo* Cant. 1.
omnem substantiam domus suæ pro dilectione,
quasi nihil despiciet eam; atque ita cum Christum
amore summo diligerent, nihil se magnum agere
crediderunt, tametsi se ipsos amore incensi, la-
boribus penè conficerent, aut sanguinem quousq.
profunderent. Hæc altè recondite, neq. discre-
tio illa siue prudentia, quæ virtutum est mode-
ratrix, vos ab hoc proposito retardet. Si enim
grandia concessu Prælati tentetis, prudentia at-
tinimè deerit, vti deerit ijs, qui arbitrato proprio
virtutis opera metiri gestiunt. Qui verò obē-
dientiz ductu reguntur, non est, cur scopulos
formident, cum Deum moderatorem, ac fau-
torem nacti sint, maioraq. interdum efficiant,
quàm se præstare posse putassent. Christum er-

go impensè diligite, & vos totos obedientiz credite, grandiaq. audete : ve Christus ipse rediens, coram vniuersi mundi theatro, vos amplissimis honoribus æquus remunerator exornet.

F I N I S.



ERRATA.

<i>Pag.</i>	<i>Lin.</i>	<i>Errata.</i>	<i>Corrige.</i>
3	3	tanta regula	tantæ regulæ
ibid.	31	alicui	alicuius
8	23	indiciu	iudiciu
33	11	pascuz uz	pascuz suæ
ibid.	30	delebat	delibat
46	24	obedientia	obedientiæ
50	23	aduersum	aduersam
57	37	suspitarent	suspirarent
81	26	longas	longa
131	7	& ad	sed ad

1871
1872
1873

